

Jesus Nusubymiy Jvaayada

Sutañuyada Judenu ruuva, rajpani rintu jiryeyju

¹⁻² Jaryi ravyatadamu ripa yimura cetera, Tiyójinu. Jasiy ratyuchu cateramu yivara. Ratarya jpajadamu ratyuchoda samiy yivantirya títaju jiryatiy sajotada jvaayada Jesúsra, sadatyadoda jotara jarye risajuntiy, sasubeda runda saraju, varityi sasubeda navajyu. Sasubeda tuudiche jidyetyadoda riy yisa rupivye tevay. Sadatyadoda Judenu Jnutu jtedamuju variryi: “Nurya jiryajvaachara ribiva.”
³ Samisadanumatiy jidyiyadacosiy crusityasasiy, sadyanunumayajada variy yisa rúpivyeju, ridyetyadaju, junuñuntya sanicha, junuñu; sadatyadoda varintyiryi nutyu sansuñuyadatiy Judenu darya vuy. Daryajuyu vuyajuy runda saraju sadyadoda tamityayu.
⁴ Jiryatiy simyñuyada Jesús variy ruusantiy, suteda variy jasiy ruuva: “Ne jiryasiquitya Jerusarímusiy. Jasiñiday jiryanutuyasirya Rajye jteda, jiryatiy ratyuchuti jiryivantirya.
⁵ Ne jiryinuy Juánbay jtyanunuyada jaata day, jiryé jita rajtyuyasiy Judenu Jnututa day, netimyu ne rani ramiy rajuu runda didye.”

Sasubeda Jesús jarichumuju

⁶ Jiryatiy riintyeryadeda variy jasiyu, ruutajadoda jita variñi Jesús: “¿Nutyityu, diyeniviy yabay sitenu nucyuracaju Irayénu mucadimu?”
⁷ Suteda variy ruuva: “¿Tarajura

jiryedyetyarurya? Niday Vujye datya day varityi sajvaaryuy daryadarya, tapi niniday datya jiryinudyerya. Niday Vujye datya day nutyeryivye rajvaarya. ⁸ Jirye jita rajmutyara Judenu vanutyada, sanumatiy juuje Suntu jiryivaju. Variñi jita jiryatuchu rañijyu Jerusarimu, titaju Judéya mucadimu jarye, Samáriya mucadimuntiy, titaju mucadisutyeryasaraju.” ⁹ Saniquemuyadanumatiy Jesúsra jirya niqejada, sasubeda jarichuvimuju varicharaju ridiyadajache. Sajayada variy rajirujuryanube, ne ridiyada variy sivanuday. ¹⁰ Jiryatiy runuryijada jarichunacho susijyu, mityamusiy nanumutijada danujuy nijyamijuy rityuunu, pupajatyanyuy. ¹¹ Naniteda jita variy ruuva Cadidéya mucadi janvay: “¿Tajura jiryepyiraniy jarichunacho day, taju? Niní Jesús jiryatiy sarayasumiy jiryisasy jarichuvimuju, niday rajtisara junantiy. Daryatiy sayasy jarichuvimuju, daryaday satarya rumusiy jiyujuntiy.”

Rijeryetadani Matyasibe, Judásibe jubivaju

¹² Rityeryada jita variy jamumusimysiy jiryatiy Odivu ritya. Rityeryada jita muchiy nujiipyude Jerusarimuju, ne jaryi ripya ravichada, jiryatiy riryupichara jiyutuyada rundamu riva day. ¹³ Rijeñuvijada jita navaryorivyimu variy, jasityi rimechonuyada variy Pyítru, Juán, Santiyácu, Antrésiy, Vedípe, Tumása, Bartodomévu, Matévu, Santiyácu jiryatiy Ajéñubay denuni, Siimyó jaryi vanira niquera, Judásiy jarye jiryatiy Santiyácu denuni. ¹⁴ Jivye jita rañi tuchutadeda sisa Judenu,

rijechiñuyencha variy jasiñi. Rivyichada vatuy variy ruusantiy, Jesús jnoda jarye, sataryiveda jarye.

¹⁵⁻¹⁶ Variryundamu jita saradeda Pyítru jityeryiveda parudamu, jiryatiy rivyichada jasiy taraqui pacha, darajuy vuyajuy rinchaju. Satuchoda variy ruuva: “Jiryajnuy, ratyeryiveda, daryanuma ritosara cetera nuchara sanchiy Judásibe, jiryatiy tariy saniquejada Judenu Jnutu Davyíbe jtosidyerya. Niday Judásibe jatachoda variryi nijyanvadye, riryatidye juriy variñi Jesús. ¹⁷ Niñi vichanuyada nudyisa vichi; sajaryetada Jesús nudyisa jvaayasijuni. ¹⁸ Neviy yinuy riche mucadini jiñu vanu jicyuriquiy murichirya day, jiryatiy sumutyajidyetyadoda murichirya, taji vichadeda murichirya jarye. Jasiñi sajuuy mucadincha yinota variy, rabuy sapude variy, rajuy sasiquidijuu varintyi. ¹⁹ Ridyetya jita Jerusari janvay titaju varidyerya, ramunitiy rutay jiñiquejadamura ritya Asendama, jiryatiy vuryitay Nuda mucadira. ²⁰ Ne yinuy sanijyu nucharara murrapedyede:

Dañuma ramacho saroriy mitya roriy, ne ti racha jasiy sarorimyunuday.

Tara nuchara jtantyi:

Sama jay ti subivaju, yinsujyomu.

²¹⁻²² Ramunitiy vuryajaryeta diye tiqui vanu subivaju Judásibe. Vuryajaryeta vuryisa vichavay tenu, jiryatiy sasiyarisara vuryisani Nutyityu Jesús, Juan jtyadodivasiy, Jesús jasubedasaraju. Vuryajaryetani nitidye racha tuchu vuryisa, jiryatiy samisama Jesús diibyimusi.”

23 Ribeyada jita variy danujuy vanujuy, riryatidye jaryetani tiqui sisasiy. Tiqui vichanuyada Jusiy jtyati, siyajuve vichanuyada Barsabasiy, ravichanuyada siya taryarantiy, Justu. Nuntiy vichanuyada Matiyasiy. 24-25 Rityuchoda variy Sisa Judenu, nurya: “Jiityi datya titajura rijechiy vaduy, Nutyityu, yadatyandu diye nuy, mi vanura jijeryeta, satidye jay subivaju Judasibe, nityi racha nusuyasi nudyisa. Ne yinuy satochimy Judasiberya yivaayada day, jiryatiy yipajada ranachoni, jadchiñuma sayati jidyijjomuju day.”

26 Rijeryetada jita variñi Matiyasiy subivaju Judasibe. Richaradoda jita varintiyu: “Ritomantiy, vuyajuy danujuy vunchaju.”

2

Sitimada Judenu Jnutu

1 Tadjyoy vuyajuy runda vichada rivasiy Páscó. Tara vichtya rundanuma vichada varintiyi. Rivyichada jita Jesúsmu tuvachuvay vatajuu variy jasiy. 2 Mityamusiñiday ransada jarichumu nutyu jamu riicho, ramuchadede rasuyadara roriy variy, jiryatiy rinyasada variy jasiy. 3 Varicharaju ridiyada riva nutyu jiiday, ruyada variy ruuva, nuvantiy, nuvantiy, nuvantiy. 4 Titaju rinyuchada Judenu Jnutumusi variy. Rijyotada jita niquejada varirya tara nijyanvay niquejadantiy, Judenu Jnutumusi riñiquejada daryá.

5 Rivyichanuvijada Judíyueda variy Jerusarímu, samirya jachityavay daryaju riy. Ruutinuyada titaju tavichadivasiy.

6 Rityuvachodanumatirya ransada, richiyada jita nijyanvay variy ranacho, rityittada varirya jiryatiy rityuvachoda daryajura tavay niquejada nuñi riñiquejadamu. 7-8 Runteda variy, rityittada varintyirya: “Nutyu riñi riñicha Cadidéya mucadi janvay jivye titaju, nutyu vuñi tuvachunuvi nuñi timusiy sitenu vuñiquejadamura. 9-11 Vuvyicha jita jiyu nuñi taji mucadimu vichavay. Vumyucadi jitya jita Pártiya, Médiya, Edá, Mesupotámiya, Judéya, Capadósiya, Póntu, Ásiya, Vuryíjiya, Pajídiya, Ejíptu, Díbiya jiryatiy Siréne tuunu vicharara, Créta, Arábiya jarye titaju. Vutyevay jarye jañuvye jiyu, Rómamusivye. Vuvyicha Judíyueda titaju, vuy jita sitenu Judíyueda day, jivye jita vutyevay vichavadye. Titajunuma vutyuvachu sitenu vuñiquejadamu darya jiryatiy sivaay Judenu samiy jidyetyadata darya.” 12 Rityittadamu yiteda variy: “¿Nutyura vuryajachipiya, nutyura?” Ruutajadoda jita nuñi riyu: “¿Tarajura ranicha jirya? ¿Nutyurajura ranicha day, nutyuraju?” 13 Tini jteda yarupadodamu day: “Niyubiyimiy dyetya, jiryatiy riryatosirya bínuja vadija daryaju, titaju ripyoyasiy varirya.”

Pyítrubay tuchoda nijyanvavya

14 Saradesubeda jita Pyítrubay variy, vuyajuy Jesús nusubiyimiy sisaju, tiqui rinchaju, saniquejada jita jaryi variy: “Vaduy, Judíyueda, jiryatiy Jerusarí janvay jiryé: jiryentya datyara, jiryentya tuvachu ramu rañiquejada. 15 Tamá niyubiyimiy nuñicha, tamá. Niyubiyimiy dyetya jiryeyyu nudye. Tamá vasetuunu vichita ranicha didye, tamá.”

16 Suteda jita Pyítrubay varintyi: “Nutyu jiryeni tuvachumara jiryatiy saniquenuyada tariy Judenuju tuchubarya, ravichanuyada siya Jovenu. 17-21 Suteda jita Jovenubay tariy variy:

Tamitya rundamu, sutay Judenu, ranuma rumiñi rintu titaju nijyamiva, riryatidye nique jiryedyedyeñu vaduy variy rajyu, jiryedyetueda jarye. Vaderovay rajnurya vacha variy, rimyityumiy jita ramaryisa jimeyantiy. Ramyuhechivyedava rarumiñi Rintu variryundamu, ramyuhechityuedava jarye, riryatidye nique variy rajyu. Radityanu tittasara variryi, jiryatiy jarichumura, mityamusiy judejada jarye mucadincha: nuda, jiiday jarye, nuvachijyuu jarye. Jiñi ratituy nupocudiju variy, jarimyuni jarye ratituy nudaju, jamu runda jtijadajisiy, jiryatiy Judenu jchanayada runda racha. Nitiy vata darya jantyutyada siva Judenu day, varityi sanatuy siyamuyu, sajantyutya variñi.

22 Jiryentya tuvachura jiryia niquejada, vaduy, Irayenuveda. Jesús jita, Nasaryé jamí, savichanutyi jiryequibyimu. Sani datyanunutyi Judenu jiryé: Sunityi Jesús ritedamu. Sadytanunutyi mityamusiy judejadatara, tittasara, mityamusiy datyadoda jarye jiryatiy sivaayada jiryequibyimu Jesús jomututara. Jiryeni datyisaviñudarya. 23 Niní Jesús, nitiy machosiy batyisiju Judenu jtedamuju, jiryeniñiday jurityiñi, jiryeni jvatyanityi variy crusityasa jamirya vichavañi. 24 Sumuryatiy jita Judenu sadiiyadamusiyu, jiryatimyu ne ravuunuruyada

diiyada jasiñi, samisanimya titaju varintyidyeñi.
 25-28 Davyibe jita jtañuyada tariy sanijyu:

Radyichara siva Rindenu ratyuunu, tapi savicha rayntyityudamyuju daryaju day, ne ti siquityatadedasara varirye. Ramutiy richanay rajechiy, radyechiy jarye niqe richanayadamu. Rabeyi jarye rajituchara, ne rajachipiyasara ranijyu nundyey, tapi ne yatochiñi rabeyanu radyiijyomu, dantyamuy ne yaponusarani jivyatasi, jiryatij jeryeti samirya jachityi dañi. Jini datyadoda sitenu jnyada ray, nutyuramusiy ravichasara samirya, yamuchanichara jichanayadata ray ranumatij jutij jityuunu.

Darya sutañuyada Davyibe tariy. 29 Diye vaduy, ratyeryiveda, ratyuchu vijyomujache jiryiva, ratyuchu sanijyu tariy vumyunatyj Davyibe: sadiiyadanumatij, rumuchoda variñi. Vuryinuy diye sarajura sabapyo. 30 Nini datyanuyada sitenu saniquejada Judenura:

Jidyedyeñu tenu rajachara yibivaju curacaju.

31 Jiryatij savichanuyada Davyibe Judenuju tuchuntij, sadatyama variy saniquejada Judenu ranijyu Cristu misasubeda diibyimusidye, jiryatimyu ne satocheda jidyijyomunij jibeyanu, dantyamuy ne rapuuchara sababyi varintyi.

32 Nini Jesus samisanichiy Judenu diibyimusiy, nuy jita datya samirya, nutyuchunumaya variy ranchintyi. 33 Vujye Judenu jasuminichiy yintyityudamyujunij Jesus, sasachiy variy Yintunij, jiryatij sutatyj darya siva. Jesus jita rubesiñi Yintu nudyivantidye, jiryatij jiryinuyasiy,

jiryetyuvachosiy diyedentirya. ³⁴⁻³⁵ Tama ni Davyibe rañi jasubeda jarichumuju, tama. Niday jtedantiy:

Sutay Nutyityu siva Rayntyityu: Yamasanuvī rayntyityudamyuju, jasicharajūtiy ravuunutaniryi jimyityasimyi.

³⁶ Darya suteda Davyibe tariy. Jiryantya datya diye titajura, tapi titaju Irayenuveda tevatya jirye: Jiñu Jesús jiryatiy jiryebetyi crusityasani, Vujye Judenu jita bayada Nutyityujuni, vuryeyada rañuju jarye, jiryatiy vuryitay Crístuni.”

³⁷ Rityuvachodanumatiy nijyamijuu, varicharaju rajachipiyajada rijechiy taji variy. Jadchiy jita ruteda siva Pyitrubay, tavay nusubymivya jarye: “¿Diye nutyura vuryecha, taryiveda, nutyura?” ³⁸ Suteda jita Pyitrubay variy ruuva: “Jiryanuma paruy riva taji jachipiyajada day, jiryanuma jtyanutaniy nuñi tiquimusidyeyu, Jesucristu jtyamu, satidye ramityaniy Judenu variy jiryivara jiyuuchurveda, sasay Yintu variy jirye. ³⁹ Tapi sutedama Judenu jiryeyju darya, jiryedyedyeñuju jarye, titaju ripya vichavajyu jaryentiy, dañuma ti sanatuchara yimuju Nutyityu, Vuryindenu.”

⁴⁰ Rajuura niquejadamusiy satuchunuyada Pyitrubay, sadatyanunuyada variryi: “Jiryaramitya ruumusiy jamirya jvaadyivyeyu.”

⁴¹ Riñi jita jiryatiy rityuvachoda ramu saniquejada, riityuyada variy. Variryundamu riryasayada sisa datyavay variy, mumuri varanca tuudicheju. ⁴² Titaju rundamu runiñuyada jityuvachodanacho, jiryatiy ridyetyanunuyada

Jesús nusuvye variy, rivyichanuyada jasiy ruusa variy, ripyatatiñuyadara pa, rityuchunuyada sisa Judenu varintyi.

Nutyura rivyichada Jesús siityarivavyedabay munatya, nutyura

⁴³ Runteda jita nijyanvay variy jiryatiy Jesús nusuvye jvaañuyadara tittasara daryaju, mityamusiy judejada jarye risaju. ⁴⁴ Jiryatiy titaju rityuvachunuyada day, riñiday vichanuyada jityojomu varidye. Titajumusiy riberya varidyeriya. ⁴⁵ Rityeryutyanuyadara jimyucadi variy, riberya jarye, richeñuyada variy jityevavyara ramurichirya, rity jantyuyadavadye. ⁴⁶ Titaju rundamu ne richutyaryinuyada jiyada Judenu nijyu jachipiyajomu. Ripyatanuyada varirya pa jiryorimyu, riimiñuyada jichanayadamu varirya, samirya rijechipiyanuyada jijechitya varintyi. ⁴⁷ Rityuchudoda jita nuñi riyu: “Vujye jita samirya vichara.” Ridyiñuyada titaju nijyanvay variy samirya ruuva. Nutyityu Jesús jasachutityiyada titaju rundamu varidyeryi, jiryatiy saramityanityityiyada ruuvara jiyuuchueda variy.

3

Samisada vanu jarapuyanibay

¹ Tarundamu sayanuyada Pyítrubay, Juánbay jarye. Nadayada jadchiy Judenu nijyu jachipiyajomuju. Ninu jtimu vichitanuma ravichada variy, Judenujsa tuchoda tuununuma variy. ² Jasiy savichanuyada tiqui vanu jiryatiy sarupeda jarapuyani. Titaju rundamu

sututaniñuyada Judenu nijyu jachipiyajo rorijyumujuyu, ravichanuyada ritya rorijyu Jerumósa. Jadchiy jita sajachiñuyada yentyuyadamu ruuva nijyanvarya tara, rityi jañuyada ravimu Judenunijyu jachipiyajo. ³ Sadiyadanumatiy nadiva Pyítrujube, Juánbatya nanujaryuyadamu, sajachiñuyada variy nadivara tarantiy. ⁴ Sunuyada Pyítrubay samiy sanachō variy, Juánbay jarye, suteda variy siva: “¡Yajnuynañecho!” ⁵ Sunuyada jita variy nanunachō, mitya sani jachipiyajada variy: “Tara dyetyate sasarye.” ⁶ Suteda jita Pyítrubay variy siva: “Ne criquityi pupadarye, netimyu ne vinu ruunadye. Ratiy rimu, raní jita rasay ji: Jesucrístu jtyamu, jiryatiy Nasaryé jamini, ¡Yarupi!” ⁷ Sireda jita santyityuday jomutuni, sanubesityadeda variñi. Varicharaju ravanuyada sanumutu, sūvichiy jarye. ⁸ Sarayada jita variy jiñumututa, sarupicheda variy jadchiy. Sajayada jita variy nadisa Judenu nijyu jachipiyajomu. Sarupiñumayajada, saratyiyajada risaju jichanayadamu, suteda jita variy siva Judenu: “¡Yentyumyate riva!” ⁹ Titaju nijyanvay diyada variy siva sarupiñumayajada, sīchanatyada variy ridiyani Judenu. ¹⁰ Jasiy ridyetyada variñi: “Nutyu niniday rañichanuchiy Judenu nijyu jachipiyajo rorijyumu, jiryatiy Jerumósa ritya.” Mitya rityittada variñi, runuyada variy juvara sanachō nutyichiñuma saratyentiy, nutyichiy.

Pyítrubay tuchoda rupijyo rorimyu

¹¹ Jadchiy jita ne sajiintyeñuyada jarapuyani misi Pyítrubay nichañuday, Juánbay nichiy

jarye. Rityittada jita nijyanvay variñi, riintyeryadeda varyi rityuunu rupijyo rorimyujuyu, ravichanuyada ritya Pórticu de Sadumú. ¹² Sunuyada jita Pyítrubay varyi riñecho: “¿Nutyuramura jiryetyittara jirya, Irayénueda, nutyuramu? ¿Taju jiryinuy nañecho, taju? Nañita rupityaniy jidyetyadatani jiñu vanu day, dantyamuy ne sarupi jiryatiy samirya jachityanujyuy nañicha. ¹³ Vumyunatyavay Judenu vichaniy daryadañi. Nini sanicha tariy Rundenu: vumyunatyavay Avurábay, Isácubay, Jacóbubay jarye. Judenunuma vichaniy daryadañi, sichanayta daryajuni Jidyenu Jesús, jiryatiy jiryeñi puchityi Pyidátumuju ni. Sani jmuryarutyi Pyidátu variñi, jiryatiy sami nijyami sanichati sadiya daryaju, ne jiryevyatati jmuryadaju varidyeñi. ¹⁴ Ne taradera jiryimuryarutyiñi, nutyu nini sanicha Judenu juintyasi, vase jvaarya risajuni. Jiñu jita jiryeñi jmuryarutyi, nitiy rañicha juvi. ¹⁵ Tapi jiryetya jvatiñi nitiy rañi jnutyaniñuyada vuy, Judenunuma misanityi sadiijyomusidyeyu. Nutyu nuñi rañicha sanchiy tuchuvay. ¹⁶ Ne jiryinuñi jiñu vanu. Jiryedyetyisatyaní savichanuchi jarapuyani, sani ratyevidyey jiryatiy satuvachu daryaju Jesús jtyamu. Samiy tuvachodamu sundefada Jesús vuy, ramunítiy samisadesiy samidyeni jiñu vanu jirye diya.

¹⁷ Diye, ratyeryiveda, radyetyisatya ne jiryedyetya, dantyamuy ne jiryentyityu datyaruy nutyura jiryevyichaniñi Jesús. ¹⁸ Judenu jteda daryá, sitotanirya jñiquejada jijyu tuchuvabe

jtosiy:

Saparutyasara Crístu jidyiyada sarajuyu.

¹⁹ Jiryānuma paruy riva taji jachipiyajada, jiryānuma jachipiya sanijyu Judenu day, satidye puy variy jiryivasirya jiryejyuuchueda, variy jita jiryajiituy rivasiy, ne jiryinuy rajti jiituyada Judenumusiy. ²⁰ Jadchiy jita sajaty jpadani Jesúsntiy, jiryisajusiju, jiryatiy vuryeyada ráñuni. ²¹ Dañuma samachosara jarichumu Judenu jdutyada rundasaraju, sanumatiy jaty j dutyadara samirya vichada runda varintiy. Darya niday sutañuyada tariy vichada rundamusiy, jiryetavabe jtosiy, jiryatiy saju tuchuvabedyeryi. ²²⁻²³ Muyusésibe jita jtedantiy:

Jiryiva tuchuju sabay Judenu jiryetyenute. Daryaday sachantiy nutyu ray daryantiy. Jiryetyuvachutata simuntiy, daryatiy sanique jiryiva. Rityimyu ne ratuvachu simu, riñi jita rabaryi nijyanvay cabyimusi.

²⁴ Titaju tuchuvabe tuchodantiy, nutyura racha diye rundamu, darya satuchoda Siméñubay, jadchiy jita titaju jiryatiy ruutijada susijyu. ²⁵ Jirye jita tuchuvabe dadyeñu day. Samirya day ranicha jiryejyu, Judenu jachipiyajada daryaju tariy jirymyunatyavabeñijyu. Suteda jita Judenu siva Avurabay variy:

Jidyedyeñu tenumu rajvaay samirya riyadaju, titaju mucadiva vichavay jiyadaju.

²⁶ Jiryimuni sajotada jpadada Judenuni jidyenu, samisanichiñumatiy variñi. Supajadani jidyenu satidye jachipiyataniy samirya vichadaju jirye,

jiryatidye paruy nuñi jirye variy riva vacha jachipiyajada.”

4

Satuchoda Pyítrubay Juánbatya japuvedabay tuunu

¹ Nanuniquejada jsaju rimyutijada caserdótevyeda variy, Judenu nijyu jachipiyajo nutyityuta, Saadusévuedata jarye. ² Riñiquettada varirya jiryatiy nanudatyanunuyada Pyítrujube, Juánta daryaju riy nijyanvay. Satuchunuyada Pyítrubay daryaju ruuva: “Jesúsmusiy vuryi jriryá diibymusiy misada.” ³ Rureda jita variñada Pyítrujube, Juánbatya. Rityanuvudoda variñada ratařimysijyu nupocu rorivyimu, jidyenuma ravichada daryaju varidye. ⁴ Tiquitya tuvachunuyada daryaju ramu nanuniquejada. Vadujyuu vichanuyada rajuu, tadajyo varanca tuunudera rivyichanuyada daryaju.

⁵ Ratarya rundamu jita riintyeryaniñuyada japuveda Jerusarímuyu. Jasiy rivyichanuyada nutyityuveda variy, rimyityuveda jarye, Judenu niquejada datyanuvay jarye. ⁶ Jasiy savichanuyada Anásiy jtyatibay varintyi, caserdótevyeda nutyityu, Cayivásabay, Juánbay, Adejántrubay, satevay jarye titaju yisaju. ⁷ Riñatuyada jita variñada, Pyítrujube Juánta, jiquebyimuju, ruutajadoda variy jasiñada: “¿Nutyurata sanumisaniñi, nutyurata? ¿Chi jtyamura sanumisaniñi, chi jtyamu?” ⁸⁻⁹ Samuchadeda Judenu Jnutuní Pyítrubay, suteda jita variy ruuva: “Temusiy jiryitajanuruy dyetya nay, nijyanvay nutyityumiy, Irayénuveda rimyityumiy

jarye. Jiryajtajanute nacyu, ¿nutyuramusiy saratyeye jarapuyani, nutyuramusiy? ¿Chinate misaniñi jiñu jarapuyani, chi? ¹⁰ Jiryedyetyadaju ratuchu jiryivara, titaju Irayenuvedava jarye: Samisajay jiñu vanu jarapuyani Jesucristu jtyamu, jiryatiy Nasaryemu savichanuyada. Nutyu niday jiryeñi crusiñutintyi, Judenu misanityi variy sadiijyomusiyu. Sutedamuju saraniy jiñu vanu misi jiryetyuunu. ¹¹ Jiñu Jesús rañichada ravichu, jirye jita roriy jvaavyedye, jiryetyasimyani javiryutyasi, sani bamyá Judenu rajotya ravichujuni, satidye roriy sanchara jiryoriy. Jiryatiy vuryitay saroriryi, rivyicha simu tuvachuvay daryaju. ¹² Ne yinuy ne ti rarachara vuryeyada jadchiñuday. Ne tara jyatara jadchiy jarichu jarijyunuday, jiryatiy sasayada Judenu jiñu vanu Jesúsra, nitidye rarachara variy vuryeyada.”

¹³ Runuyada jita japuveda sanacho variy: “Nadani jita sitenu nique jivyanuyadata, samiy nanudatyadata, vuñi datyisatya ne nanudatyara catera nuyada, tapi jantyuanijuy daryaju nada jiñujuy nijyamijuy.” Rityittada variñada. Ridyetyada jita variy nadanchiy: “Jiñujuy Jesúsja vichanujyuy.” ¹⁴ Jiryatiy ridyñuyada siva vanu misanichi jityuunu, ne rutaryuyada tara variñuday. ¹⁵⁻¹⁶ Pariche rupajada jadchiy jityuunusiñada, Pyitrujube, Juanta. Jasiñuma riñiquejada nuñi rijyuu yiva: “¿Nutyura vuryechaniñada jiñujuy vanujuñuday, nutyura? Ne ti raramicha datyada nadanundy, jiryatiy mityamusiy juderuy daryaju nada. Titajuma ridyetya Jerusari janvarya, ne

vanay nta vuryitañundyē: Ne nanumisanīy sītenunī. ¹⁷ Rañuma juray junay tuchodanūday, vuryajiyarōnu nada nañuma nique junañunrya Jesús jtyanūday.”

¹⁸ Jadchīy jīta riñatuyada variñadantīy, rubayada jīta variy nanajīsīrya: “Ne sananīque junañunrya Jesús jtyanūday, dantīyamūy ne sanadatyanu Jesús jtyamunūday.” ¹⁹ Pyítrubay, Juánbatya nanīmutyajada varīryi: “Jīryantya jachīpiya samīy, samīryavidye sādīy Jūdenū vuryīva, nañavidye sītye jīryejyū, varīmīyata Jūdenūjū dyetya. ²⁰ Nay jīta ne parūryūy rīva nīquejada day, jīryatīy nādīy rīva, natyuvachura darya nīquejada.” ²¹ Rīyarododīvasīy, yīmūryada variñada, rutāmyatīy: “¿Tarajura vuryatanuvūnu nada, tarajū?” Tapi tītajū nījyamītya jchanatyada daryajū variñī Jūdenū rīva, jīryatīy mītyamūsiy sūndejada daryajū rīdyīya. ²² Daryajūyū vuyajūy vaatātīnuma vanū jīryatīy samīsada jarapūyadamūsiy.

Jesúsma tuvachuvavyedabay vatadara vanūtyada simūsiy

²³ Rumūryadanumatīy nada Pyítrujūbe, Juánta, nadayada jīta variy yīsā vīchavamyūyū. Nanutūchoda variy jāsīy ruuva: “Caserdótevyeda nutyītyūmīy, rīmītyūmīy jarye jtesīy darya nādīyīva.”

²⁴ Rītyuvachodanumatīrya, riñīquenūyada jīta tītajū sīsā Jūdenū variy: “Nūjyē, jīñī Jīta jūdejadara jarīchu, mucadī jarye, jamū nava jarye, vīnu ranī tītajū ranīcha yīmūsiy. ²⁵⁻²⁶ Jī

jteda sutosiy jimyuchechiy, jiryatiy numyunatyī Davyibeñi:

¿Tarajura riñique munuñumiy, taraju? ¿Tarajura rijechipiya nijyanvay vacha, taraju? tama samirya ranicha, tama. Riyaronu jita mamyi nutyityumiñi, curacaveda jarye jiyaronuni Judenu, sajaryeti jarye jiyaronuyu.

²⁷ Sitenu jita riyaronuni jidyenu Jesús. Nini jita jiveryeti sami. Riyaronu jita nutyityuvedani. Jeródes, Púnsiyu Pyidátu, munuñujuu, Irayénueda jarye jiyaronuni. ²⁸ Ruutotanimya titaju varidyerya, jiryatiy jidyetyanuyada taridyerya. ²⁹ Diye, Nujye, yajnuy nutyuramu riyaronu jiñiquejadata nuy. Yavanutyaniy nuy jimyuchechimyintyidye, nuñatidye niñique jichuvuyasadamura jiñiquejadantidye. ³⁰ Yajmutya jijyomutu ratyasarata, yatidye judanu variy, yatidye jvaantiyrya mityamusiy datyadodantidye, tittasara risaju, jidyenu jiintyasimusi, jiryatiy Jesús jtyatini.”

³¹ Ripyaruyadanumatiy riva Judenujsa tuchoda, ramichutyada tara varirya roriy, jiryatiy riintyeryaniy ravimuyu. Samuchadeda Judenu Jnutu variy titaju ruuvayu, riñiquejada jita jichuvuyasadamu varirya Judenu niñiquejada.

*Rutañuyada titajumusi jiberyanchiy:
“Vuberyanuma day”*

³² Jiryatiy rityuvachoda rajuuvay nijyanvay, vatajuu rijechipiyajada variy. Ne ti niqenuyada: “Jirya raberya day.” Vatajuu riberyani yitañuyada darya, ratiy vichanuyada ruumu.

33 Rityuchunuyada jita sansubyimiy jichuvyasadamura Nutyityu Jesús misasubeda. Rityi tuvachunuyada simu, samiy jvadichavay rivyichanuyada nijyanvajyu variy. 34 Ne timusiy rasutyeñuyada tara; jiryatiy mucaditavay daryaju rivyichanuyada, rityeryutyada varirya, riryoriy jarye jityeryutyanyuyada risaju, ramutimyu ne rasutyeñuyada tara ruumusiy. 35 Jiryatiy rumutyanyuyadara jiberya murichirya, rutunuyada Jesús nusubyimimiyujura, ribeñuyada variy rityuunura. Jadchiy jita richeñuyada yivara daryatiy rivyata day. 36 Darya niday sivaañuyada Jusíberya. Tajiñuma ruteda nusubyimiy varidyerya sitya day, Bernabenuma ruteda varidyerya, jmutyadacanuy sutachada day. Devyibe juriñuti, Chipyirye ratyuumu vichi variñi. 37 Niní taryutyanyuyadara jimyucadi, sutunuyadara ramurichirya nusuchavajyu.

5

Sajuuchurveda Ananíyasibe, savatura Sajírabatya quivuchodata

1-2 Jasiy savichanuyada nu vanubantiyi, ravichanuyada sitya Ananíyasiy, savatura Sajírabatya. Sataryutyadara jimyucadi, savaturabatya jibeñuyadara ramurichirya tera jijyu, vinu ratera sutunuyada nusuchavajyu. 3 Suteda jita Pyítrubay variy siva: “¿Tarajunuma sadajatyaniy yivani vacha niquera Satanásintiyi, taraju? jiryatiy sanujachipiya quivuyada sanijyu Judenu Jnutu daryaju, ramutiy sadabadyerya ramurichirya tera jijyuday.

⁴ ¿Sanutaryutyadajisiy, nutyu sanumucadi nta day ranicha day? ¿Sanutaryutyadivasiy, nutyu sadaju day ranicha ramurichirya day? ¿Nutyuramura sanujachipiya daryantiy, nutyuramu? Ne quivuyada saninique riñiyu nijyanvadye, sanintay yaquivuchuni Judenu.”

⁵ Satuvachodanumatiy Ananiyasiberya Pyitrubay niquejada, sarayada variy, sadiiyadama titaju variy jasiy, puutyitye. Jaryi runteda variy, jiryatiy rityuvachunuyada titajura.

⁶ Riñubeseda jita vaduy vaderovay variy, riryeyada jita sujajuutara sababyi, rutoda variy jmuchujomujura, rumuchoda variy jasirya.

⁷ Mumuri joramusiy jita, sitijada savatura machonu rumuntiy, sadatyatya sadiimya ravyanucu. ⁸ Jasiy suteda Pyitrubay siva: “Yatuchu riva: ¿Sitenuniviy sanutaryutyara jimyucadi jirya criquiy murichirya?” Sumutyajada jita variñi: “Joonu, jirya criquiy murichirya niday.”

⁹ Suteda jita Pyitrubay variy siva: “¿Tarajura sanujachipiyajay sayaroju Judenu Jnutu, sanijantya dyetya saniy, savidye datya jiryatiy vuvyichaniy darya saniyare? Nutyuvachunumara riryupiyada, jiryatiy jivyanubay rumuchosiy. Daryaniday riryajtosintyi ji.”

¹⁰ Sarayada varicharaju satuunu Pyitrubay, sadiimya titaju variy jasintyi, puutyityentiy. Rijeyada jita vaderovay varintyi, ridyiñuvijada diiblyi siva savatura machonuntiy. Rutoda jita variy jadchintyiñi, rumuchoda jita savanubay bapyo tuununtiyu. ¹¹ Jaryi runteda variy titaju jiryatiy riintyeryaniñuyada variy jasiyu. Jiryatiy rityuvachunuyada taji

vichavarya, rijerye jnuteda variy.

Tittasara, mityamusiy jvadichara jarye risajura

¹² Jesús nusuvye jtedamujunuma rivyichadedara jaryi mityamusiy jvadichara, tittasara jarye nijyamijuu cabyimura. Titaju riintyeryaniñuyada jijechipiyajadamu rupijyo rorivyimuyu, ravichanuyada ritya Pórticu de Sadumú. ¹³ Ne ti jaryuñuyada ruusaju, dañuma riryecha samiy jvadichavay nijyanvaju day. ¹⁴ Riryasayada variy jasidye jiryatij rityuvachunuyada simu Judenu day, vaduy, vatuy jarye. ¹⁵ Richipyatanuyada riy jdivajnuvay variy vichada cabyivaju rityiryojoncha, sanumatiy ramiryi Pyítrubay ruuva jdivajnuvay. Ruteda jdivajnuvay variy: “Temusiy suntumusiy dyetya vuryamisate.” ¹⁶ Jaryi rajuu nijyami jutyeryaniñuyada variy jasiyu Jerusari juvo vichavay. Rijerye jtitanuyada riy jdivajnuvay, jamirya vichavay jarye jiryatij bayantuveda jarupadoda daryajuriy. Rimiysada titaju variy.

Riryarupadoda riy Jesús nusuvyevyedabay

¹⁷⁻¹⁸ Jadchij jita caserdótevyeda nutyityu, titaju saniyanvay jiryatij Saadusévuveda daryi, rinnuyadamu jichiryijada ruumu Jesús nusuvyevyeda. Rureda jita variy jasiryi, riityejada tanuvunujovimu variryi. ¹⁹⁻²⁰ Nupora samuttada Judenu jpanura tanuvunujo rorijyu riyadasiy, sasipyatada variy ravimusiryi. Suteda jita variy ruuva: “Jiryanuma raniñuve Judenu nijyu jachipiyajo vimu. Jasiñi jiryaniquenuvera vadi vichada.” ²¹ Rityuvachodamu jiejyada ravimu Judenu nijyu jachipiyajo, rasacharajsaju,

ridyetyadoda varyiy jasiy. Varicharaju sanatumyada caserdótevyeda nutyityu jijnijyanvatya riy japuveda, titaju Irayenuveda rimyityumiy jarye. Ruteda jita varyiy: “Jiryaryitya riy Jesús nusubyimiy tanuvunujovimusiy.” ²²⁻²³ Ruutojada jita podisíyaveda jasiy, tiii, ne ridyiñuvejada jasiy ruuvanuday. Rityeryada jita varyiy jadchiy, rityuchunuvejada jita varyiy ruuvantiy: “Samiy mutanusara nudyiñuve jasiy riva tanuvunujo, jasidye sanicha rorijyu jnutyi, nuñi muttanuvera rorijyu, ne nudyi tavavya ravimunuday, tii, mitya.” ²⁴ Satuvachodanumatiy Judenu nijyu jachipiyajo nutyityu, caserdótevyeda nutyityumiy jarye, mitya runtedamu jiejchipyajada varyiy: “¿Nutyuranate ramachote, nutyura?” ²⁵ Sitijada jita tiqui vanu tuchu, nitiy tuchunuvijada ruuva: “Jiryajnyy jiryatyy jiryeni tanuvunujaryi, nutyu muñuma riñi radesaniy Judenu nijyu jachipiyajo vimu day, jasiñuma ridyetyanu riy nijyanvadye.” ²⁶ Sayada jita Judenu nijyu jachipiyajo nutyityu jipyodisíyavedata riñecho, samiryamu riyada riñecho, riryatidye jiritya variryi, richuvuyadamu nubesiy jiñi jiyada riñecho, rijechipyatityiyada varyiy: “Vuryatyy jiritya niqueyadamu riy, riryajachiy tavay nijyanvay jiniqueyadamu ravichuta varivyuy.”

²⁷⁻²⁸ Riyatada jita japuvedamuju riy, riryanityaniñuvejada riquebyimu riy. Jasiy jita saniquettyada caserdótevyeda nutyityu varintyiryi: “iNutyu rañi jtachimya jaryi jiryivantyy ne datyadodaju Jesús jtyamu nundyel Jiryeni muchanidyerya Jerusari jidyetyadodata day, mityaniday jiryeni ntay yabaya nuñijyura

samunusada jiñu vanu.” ²⁹ Sumutyajada jita Pyítrubay varyi, sisaju nusuchavay jarye: “Nuñi jita tuvachu jaryi simu Judenu, vadumyusiy. ³⁰ Nityi vichanuyada tariy vumyunatyí Judenu, nini jita misanityiñi Jesús, jiryatíy jiryemyunutyi crusityasani. ³¹ Judenu jita jasuminityiñi Jesús yintyityudamyuju. Nini rachasara Nutyityu, nijyamiva Jantyuyasi jarye, riryatidye paruy riva taji jachipiyajada varyi, satidye ramityaniy Judenu varyi ruuvara jiyuuchaveda day. ³² Nutyu nuñiday rañicha ranchiy tuchuvay; Judenu Jnutu jarye tuchu, jiryatíy sasay Judenu Yintu riy, rityi tuvachu simu.” ³³ Rityuvachodanumatirya raniquesada, riñi jteda yajvay jiñiqueyadamu variryi nusuchavay. ³⁴ Saradeda varyi Varyisévuvada tenu, ravichada shitya Camañéñu. Nini vichanuyada niquejada datyanu, ramunityi rityuvachunuyada nijyanvay varyi simu. Suteda jita jasiy ruuva: “Jiryasipyata taraquiju nada jiñujuy vanujuy.” ³⁵ Suteda jita varyi jasiy ruuva: “¡Jiryinutyata jiyada, Vaduy, Irayénuveda! ¡Samiy jiryajachipiya, nutyura jiryechaniñada jiñujuy vanujuy, nutyura! ³⁶ Taripyudenuma sani nubesumiy Tévdas jtyatibay varidye, sutatyí jita varyi: Ray jita vanu samiy datyara. Riintyeryaniy jita nijyanvay varyi simujuyu, daryajuyu pacha tuunude nijyami. Ruvedanumatiñi, rurayada jita nijyanvay varyi sivasiyu, ramachojada jita mitya varyi sivasiy. ³⁷ Jadchíy jita sanubesityi Judásibe, Cadidéya mucadimu vichi, varityi riñutyaniñutyiryi nijyanvay, ridyetyadaju nurivyeñuma riñicha

jasiy. N_i jarye jatachun_utyiryi nijyan_vay, riryatidye siityari_r variñi. N_i jarye batyeda varyi; jiryatiy richiityar_in_utyiñi, ruratyi varintyiyu. ³⁸ Ramutiy r_itay diye jiryiva: Ne jiryaj_itye nadisa jiñujuy vanujuñ_udayu. jiry_anuma paruy nadiva day! Vinu nanujachipiyajadatiy raryicha, raryi ma_{ch}o mitya varyi jasiy, mityamusiy raryi caray varintyi. ³⁹ Judenumusiryatiy nanudatyadoda day, ne jiry_e vuudodasara variñadan_uday. Jatyí jiryechiryi sanijyu Judenu.” “Jo.” ⁴⁰ Mitya rityuvachoda nijyan_vay varyi ran_acho. Riñatuyada j_ita nada nusuchanujyuy, rimyusiyeyada variñada. Rumuryada j_ita rivasiy nadantiy, rubayada nanajisiy varirya: “jNe san_anique Jesús jtyamun_uday!” ⁴¹ Jadchiy j_ita nanutaryada nusuchanujyuy jichanayadamu rityuunusiy japuvedantiy, jiryatiy nanusaryejadara javatyada Jesús_mu tuvachodiva. ⁴² Titaju rundamu nanudatyanunuyadara, nanutuchunuyada risajura: “N_in_i Jesús san_icha vuryeyada ráñu Crí_stu.” Darya n_id_ay nanudatyanunuyada Judenu nijyu jachipiyajo vimuntiy, nijyan_vay rorimyu jarye.

6

Ribeyada danujuñijyate vadube Judenu jmutyisavajyu

¹ Variryundamu j_ita riryasatyityiyada Jesús_mu tuvachuvantyi. Jadchiy j_ita Judíy_uvedantiy, jiryatiy rivyichada taji vichavadye, r_uteda j_ita riñijyu jiryatiy jasiy vichavadyeryi: “Ne richeryujeya

t̄itaju rundamu darya daryi nūbechenodaveda day.”² Jadchiy j̄ita, riñatutyadeda Jesús nus̄vyeryi J̄udenumu tuv̄achuvay t̄itajuntiy. Ruteda variy ruuva: “Ne samirya ntate nūñaparuy riva J̄udenu niquejada datyadoda day, samiryatidye nūñapotyaniy variryi nijyanvay.”³ Jiryantya jaryeta nūñi jiryeyu, ratyeryiveda, danujuñiyate vaduy tuv̄achuvay, jiryatiy t̄itaju sito J̄udenu Jnutu ruuva, jaryi datyavay variryi. Riñi jivye vaduy vuryabay, riryatidye potyaniy vatajuu riy bachenodaveda.”⁴ Nuy j̄ita rajachipityaja dañi J̄udenu day, jadchiy j̄ita nūñadatyano darya J̄udenu niquejada varidye.”⁵ T̄itaju nijyanvay jteda samirya varirya. Jadchiy j̄ita rijeryetadani Estébanubay, nītiy tuv̄achunuyada jaryi simu J̄udenu, jiryatiy J̄udenu Jnutu t̄itaju siva. Rijeryetadantiryi Vedípe, Prócoru, Nicanóru, Timyú, Parménasiy, Nicudásiy jarye, jiryatiy Antiyuquiyamusini, satitumya Judiyujuntiy.⁶ Ripyucheda j̄ita Jesús nus̄vyemyuju riy, rityuchoda j̄ita nus̄chavay variy sisa J̄udenu riyadajuntiy, rureda j̄ita variy jiyomututa runupadamuntiy satidye jmutya J̄udenu Jnutu samiy ruuvaayadamuyu.

⁷ J̄udenu niquejada jasayada variy, riryasayada j̄ita J̄udenumu tuv̄achuvay Jerusarimu vichavay tevay varintyidye. Rajuu caserdótevyeda tevay tuv̄achunuyada simu varintyi.

Ruredani Estébanubay

⁸ J̄udenu bayada samirya jachityijuni Estébanubay, savanuyada jibeyada t̄itaju siva. Ratanuma sivaañuyada nijyanvay

cabyimura tittasara, mityamusiy judejada jarye. ⁹ Ruutijada jita Judiyuveda simu variy, jiryatiy Siréne janvadyeryi, Adejántriya janvay, Sidísiya janvay, Ásiya janvay jarye titaju. Riñi jteda riñicha Muchechimyi Machovadye jutyeryanijomusivye. Ruutijada jita Estébanubamyu, riryatidye niquettanumucha jasiy tariva satayu. ¹⁰ Riñiquettamuyadanumatiyu, sasabodedama Estébanubay variy jidyetyadata riy, jiryatiy saniquejada Judenu Jnutumusidyerya. ¹¹ Jadchiy jita rivyatada dutyadamusiy riñecho vadube, rityidye ranique quivuyadamu: “Nuy jita tuvachodara saniquejada Estébanu sayaroju Muyusésibe, Vuryindenu jiyaroju jarye.” ¹² Ratani riñiquettadeda riy nijyanvadye, rimyityumiy, Judenu niquejada datyanuvay jarye. Richiryijada jita variy simu Estébanubay, rureda jita variy jaryiñi, ripyucheda jita japuvedamuju variñi. ¹³ Jadchiy jita ruutitada riy nijyanvabentyi, Estébanubay jiyadaju quivuyasavay. Rityuchoda jita variy: “Ne saparuryuy riva taji niquejada, jiryá Judenu nijyu jachipiyajova, Muyusésibe datyadodiva jarye. ¹⁴ Nutyuvachumara Estébanu niquejada: Jiñu Nasaryé Jamí Jesús, rajavatyara jiryá Judenu nijyu jachipiyajo. Sadatyadodiva riryánuma paruy nijyanvay riva darya vichada day, jiryatiy sabayada Muyusésibe vuvyichadaju darya.” ¹⁵ Jiryatiy titaju japuveda masada variy jasiy, runuyada samiy sanacho Estébanubay variy jasiy, samiy runuyada variy samova, nutyu Judenu jpanu mo nta ranicha samo daryaju.

7

Estébanubay tuchoda jiyadaju

¹ Jadchiy jita suteda caserdótevyeda nutyityu siva: “¿Sitenuniviy ranicha jiryatiy rutayu?”

² Jadchiy jita sumutyajada Estébanubay: “Jiryantya tuvachu ramu, vaduy, ratyeryiveda, rajyevyeda jarye. Sadityadoda Jüdenü Vándanü vumyunatyi Avurábayu, jasityidye savichanuyada variy Mesupotámiya mucadimu, netimyu ne savichanuyada Arámu variy didye. ³ Suteda jita Jüdenü siva Avurábay:

‘Yanuma sipyatay jimyucadimusidye, jityevay jusasiy jarye, tara mucadimujuntidye, jiryatiy raday datyanu ramuju ji.’

⁴ Sasipyateda jita Cardéya janvay mucadimusiy, savichanuvejada Arámu variy. Jadchiy jita, sadiiyadanumatyijajay, sajateda jita jadchiy jiryamucadimuju, jiryatiy jiryevyicha diye saraju jiyu ramu. ⁵ Ne sasaryuyada Jüdenü mucadi varidyidyeñi, netimyu ne vinu sanumutujiju sasaryuyada variyu. Suteda jita variy sivantiy:

Rasay jiryamucadi jijyü ji, varityi yadiiy ramusiy mucadi, jidyedyeñujunuma ramachosara varidye.

Ne deti savichada Avurá varidyidye. ⁶⁻⁷ Suteda jita Jüdenü sivantiy:

‘Jidyedyeñu rachasara tara mucadimu, jasityi riryamuchechivyechara jasiy vichada janvaryi, riryajavatyajayasara riy, riryajantyunujayasara variy jasiryi, daryajuyu pacha vaata saraju. Raday murichenutaniy rivantidyeryi

jasiy vichada janvantiyide, jiryatiy jimyuchechiy jantyunuvay daryaju riy.'

Suteda jita Judenu:

'Rivasiy jita riryasipyatay jidyedyeñueda jasiy mucadimusintiyi, riryajmutyanyuvay sara variy jiyuntirye.'

⁸ Judenu jteda siva Avurabay variy:

'Yajmutyodosiy titaju riy jidyedyeñu jiryatiy vaduryi, riñuma jachipurya jiryatiy ritatyi darya yivara.'

Ramunitiy jiryatiy sadetuyada Avurabani Isacubay, sarupedanumatiy, mumurundamiñiyatemusiy sumutyododa variñi. Daryaday savichadede Isacubani jidyenu Jacobubay varintiyi; daryaday savichadede Jacobubay varintiyiri jidyedyeñuntide, jiryatiy vuyajuryi, danujuy rinchaju, riñuma jita jude varintiyidyeryi Judiyu juriiñu tavantiyide.

⁹ Rityeryutyada jita Jacobubay dadyeñubani jityeryibay Jusibe. Rityeryutyada yinnuyadamu Ejíptu mucadi janvamyuni. ¹⁰ Jasidye savichada Judenu sisa, nitiy jantyuyada separutyajomusiy yiva. Sadyadoda jita Judenuni Jaravubay, jiryatiy jamu nutyityu Ejíptu mucadimuni: 'Nini jita Jusiy sitenu datyara, samirya jachityi risajuni.' Jadchiy jita sabayada Jaravubani Jusibe jimyucadi nutyityuju, sitenu saroriy nutyityuju jarye. ¹¹ Jadchiy jita ravichada jachinu runda titaju mucadiva, Ejíptu mucadiva, Cana mucadiva jarye. Jaryi riryantuñuyada jmyicharavasiy variy, ne vanay ridiyiyada tariy vumyunatyavay riva jmyichara variy. ¹² Satuvachodanumatiy Jacobubay: Jasinrya jmyichara Ejíptumu,

supajada jita riy jidyedyeñubay vumyunatyavay varyi: ‘Jiryeyiya Ejíptumu jmyicharanacho.’

¹³ Rijetyiñumatiy jiyada rumuntiy, variñi jita ridyetyadani jityeryibay Jusíbe jasiy, Jaravúbay jarye datyada varyi tara nijyamira Jusídye.

¹⁴ Supajada jita Jusíberya jiñiquejada simu jiyeybe: ‘Jiyu jita yecha risa, titaju ratyeryivedata.’ Riyada jita varyi rumuju darajuñijyate vuyaju nijyami, tadajyo rinchaju. ¹⁵ Sayada jita Jacóbubay varyi raruvavaju, Ejíptumuju. Jasiñuma sadiiyada varidye, titaju sadadyeñu diimyuyada yisaju, jiryatiy tariy vumyunatyavabedyeryi. ¹⁶ Rutoda jitaro Jacóbu babyi varyi jimyucadimujuntiy, Siquemyuju. Ribeyada bapyo vudi vimura, Avurábyay taryurya vimu, jiryatiy pupaday criquiy murichirya sataryuyada Amórubay dadyeñumusirya.

¹⁷ Jadchiy jita rani jiruyadadenuma, jiryatiy sani jteda Judenu siva Avurábyay:

‘Jidyedyeñu rajasachara rajuuju varyi Ejíptumu.’

¹⁸ Varicharaju sajayada vadi nutyityubay, jiryatimyu ne sadatyadani Jusíbedye. ¹⁹ Niní jita quivuchunuyada vumyunatyavabe jiyadasiryi, varityi savichaniñuyada vacha ridyedyeñu jiyadasiyu, sajatyataniñuyada varyi ridyedyeñuntiyu, vadi rupachusavay, riñuma jasay. ²⁰ Variryundamu day sarupeda Muyusésibentyi, sami dera savichada derapudera Judenu diya. Munvay jarimyuní saraju rijyevyechoda sajay rorimyuyu.

²¹ Sajatyadanumatiy sajay jiryorimyusiy Jaravúbay jtedamuni, varicharaju saryeda

Jaravúbay detubadyeñi, ninuma javyechoda sítenu jidyenuju varidyeni. ²² Jasiñi ridyetyadoda Ejíptu janvay títaju tara datyadani. Nini jita sanicha jiñu Muyusésiy sítenu datyara, sadatyadamu jiñiquera niquejada, tara jvaayada jarye.

²³ Sitotadedanumatirya daryajuyu vuyajuy vaata, sayada jita jañuñu ruumu jityevay, Irayénu dadyeñu. ²⁴ Jasiñi sadiñuvejada siva tiqui jityenu, suvatyi Ejíptu jami samomuni; Muyusésibe siryijada variy sayadaju, samurichedoda varirya jityenu jvatyichada, jiryatyi suvedani Ejíptu jami daryaju. ²⁵ Mitya sajachipiyajada Muyusésibe: ‘Ridyetya dyetya ratyevay: Rimusiy saray Judenu riyada,’ ridyetyaruyadatya daryaju ridye. ²⁶ Ratarya rundamu, sunuyada nanivatyi rityenujuyu, sani j dutyaruyada samirya nanuniqueyada, suteda variy nadiva: ‘¿Nutyu mityijyi tenujudye sanicha? ¿Tarajura sanupochuvádyeyu, taraju?’ ²⁷ Nitiy pochodara jityenu mo jaryi, sajatyada variñi Muyusésibe: ‘¿Chira rañi bay nuntyityuju dajyi, cadnaduju jarye?’ ²⁸ Suteda jita variy sivantiy: ‘¿Yivaryutyantidyerye, yivaryuy? nutyu yivaje rurundamuni Ejíptu jamintiy.’ ²⁹ Satuvachodanumatiy Muyusésiberya saniquejada, sabayada jita variy jadchiy. Savichanuvejada Madiyámu, nutyu raruva jami varidyeni. Jasiy sadetuñuvejada danujuy vanujuy.

³⁰ Jadchiy jita, daryajuyu vuyajuy vaatamusiy, samutijada Judenu jpanu variy mitya tomu, musimyu jiryatyi Sinayí jtyatarara.

Sadityadoda variy Muyusésibeyu, jiidañube, nutyu nutasaranube rani nuya. ³¹⁻³² Satittada Muyusésibe varirya. Sani tuudiyadanumatirya jiiday, sani ntatyidye yadiy samiy variy riva, satuvachoda jita varirya saniquejada Judenu:

‘Nutyu rañi rañicha Judenu, Avurávedabay tariy munatyavay Judenu, Isácubay, Jacóbubay jarye.’

Samuchutyedanuma variy jichuvuyadamu day, ne sunuryuyada variy sanachonuday. ³³⁻³⁴ Suteda jita Judenu variy siva:

‘Yasipyatara jichaapatu jiñumutuvasiy, ne yinuy Judenuju jiintyasarara jirya mucadi day, jubachara saapatuta radeda rancha. Tarimya radyi riva, ratyuvachumantirya rañijyanvay jantyuyada Ejíptumuntiy. Ratyuvachumara ripyarutyada, varicharaju rimusasiy, ratidye jantyuñuvi jiryiva.’

Sanatuyada jita variñi:

‘Varenuma, ratidye jpa Ejíptumuju ji.’

³⁵ Daryamuniday riñi jatyada satevabe Muyusésibe tarintiyu, jiryatij ruteda variy siva:

‘¿Chi rañi bay nutyityuju dajyi, cadnaduju jarye?’ Niday supajada Judenuntiy, nitidye racha nutyityuntiy, riyada rayasi jarye sacha, Judenu jpanu jtedamu, jiryatij sadityadoda nutasaranujuunubesiyu. ³⁶ Niñi Muyusésibe sipyatada Ejíptumusiryi Avurábay dadyeñu, tittasaramusiy, mityamusiy datyadata jvaayadamusiy jarye, jiryatij sivaayada Ejíptumura, Varadaja jmityomu jarye, mitya tomu

jarye, daryajuyu vuyajuy vaata saraju. ³⁷ Niday Muyusésibe jteda ruuva Irayénuvedabantyi:

‘Jiryiva tuchuju sabay Judenu tiqui jiryetye. Daryaday sachantiy nutyu ray daryantiy.’

³⁸ Niday Muyusésibe vichada riquebyimu nijyanvay mitya tomu, savichada variy sisa Judenu jpanuntiy, jiryatiy saniquettada variy Sinayí musinchani. Savichada variy ruusa tariy vumunatyavantyi, nini jmutyajadara niquejada, junare jnuyadaju, satidye say jiryerya.

³⁹ Dantyamuy ne rityuvachuruñuyada tariy vumyunatyavay simu, ne rivyatada jintyityuju variñunñi. Riñi jachipiyajada taryada variy Ejiptumuju. ⁴⁰ Ruteda jita variy siva sataryibay Arúbay:

‘Yajvaay judenu nujuucu, nitiy rajiyanta nuy. Jityeryi Muyusésiy jiryatiy sasipyatasiy Ejiptumusiy nuy, ne nudyetya nutyuñintiy sadatyásiy, tama siti nudyimunuday, tama.’

⁴¹ Jadchiy jita ruuvaayada variryundamuni nutyu voca denu, ruveda jita variryi yasiveda, riryatidye jnutatya variy óru teramusiy jvaachimuju riy; riichanatyada variñi jiryatiy rundejada sitenu jiyomututani.

⁴²⁻⁴³ Sanumityeda jita Judenu variy riryajisiy:

‘Dañuma riryatuvachu ruumu jdarichiyuu.’

Nutyu daryani ranicha nuchara sacateraniy Judenuju tuchubay:

‘¿Jiryantya tuvachu, Irayénuveda, tama jiryeni jnutatyanutyi yivi ray, tama, jiryatiy jiryeni jvajejanutyi daryajuyu vuyajuy vaata saraju, mitya tomu ricyu? Vinu raniday Modócu satu roriy jiryenchutityintyi,

jdarichiy jantyasi jarye risaju, Rejanu jtyati judenu varidyeñi. Ninu jiryeyasanta daryaju dayu, jiryatijiryindenu yitadyeñi. Ramunijiy rasipyata jiyusiy jiryey, ratidye jpa Babinoniyajiyadaju jiryey.

⁴⁴ Ravichada jita nutyu donajaryorijiy tarij vumyunatyavabemyu, mitya tomu, jadchityidye rijechipityajajada variñi Judenu. Daryani ruuvaayada titajuntirya jiryatijiy sadatyadoda Judenuni Muyusésibe darya:

‘Darya niday vajvaatyanintyirya daryatijiy jidyey rivantijiy.’

⁴⁵ Raday donajaryorijiy rumutyajajada tarij vumyunatyavabentyey, jiryatijiy rijeyada variy vatajuu Josuvébatya jiryey mucadimu, jiryatijiy Judenu jatyaada rij tanijyanvay riryajisijiy jadchijiy. Rumu rutoda varirya nutyu donajay jasijay jiryoriityaju, daryaday ruuvaatyityiyada Davyíbe rundasarajuntijiy.

⁴⁶ Ninu Davyíbe samirya jachityey Judenuju, sani roriiryuyada Judenu vichajoju jasiy, rimyunatyivedabay Judenujijiy.

⁴⁷ Sadenubay Sadumúbajyunuma ramachojada roriijiyada day, ninuma rajvaadyeryey vichajo sajijiy Judenu day. ⁴⁸⁻⁵⁰ Judenu navay vichijiy, ne vicharuy ravimu jiryatijiy nijyamijiy jomututa jvaacharara, nutyu suteda Judenuju tuchubay darya:

‘Jarichu ramyasajo, mucadi jita rañumutujijiy.
¿Nutyura rorijiy riryajvaay raryorijiy,
nutyura rorijiy?’

Suteda Judenu variy:

‘¿Mirya vichajomu riryajitutyanyirye, mirya vichajomu? Nūtyu rañiday rañi jvaayada rajy-
omututa tītajura, mucadi, jarichu tītaju.’ ”

⁵¹ Jadchiy jīta sariryijada Estébanubay junarya niquejada: “¡Ne vanay tuvachuvatye jiryetye! ¡Jaryi surra jachityavañi jiryedye, tuyupuryimyi risaju jirye! Dantyamuy ne jiryetyuudityanyiryuy Judenu Jnutu dayu. Nūtyu tariy vūmyunatyavabetyi vichanuyada daryantiy, daryaday jiryevyichantiy. ⁵² ¿Mira Judenuju tuchuvay tenubay ne riryarupantanuyada tariy jiryemyunatyavabe, mi? Riñi jvañuyada riva daryi, jiryatiy rityuchunuyada daryaju ruuvara: Saday jniy vase jvaarya. Diyete, sani jnimityi jīta, jiryivay variy saniyaresiyu. ⁵³ Nūtyu jiryeni rañi jmutyajadara Judenu datyadoda, Judenu jpanu jmutyadamu jiryeni jmutyajadara, dantyamuy ne jiryetyuvachuruy ramu day, nūtyu jiryeniiday rañi jvatyiñi Jesús.”

Estébanubay diiyada

⁵⁴ Rityuvachodanumatiy japuvedara darya niquejada, jaryi riñiquettada varirya, richumutuyada varirya jiyada jñiqueyadamu sanachojū Estébanubay. ⁵⁵ Estébanubavya samuchadeda Judenu Jnutu, sunuyada jīta jarichuvimu variy, sadiyada jīta variy riva Judenudá. Sadiyada variy siva Jesúsntiy, jiryatiy saradeda Judenu nutyityudamyuju. ⁵⁶ Suteda jīta Estébanubay variy: “¡Jiryajnuy! Rañi dimya riva jarichu muttarya day, radyi siva Nijyamidenu, jiryatiy saraniy santyityudamyuju Judenu.” ⁵⁷ Richeñeyajada japuveda variy,

rimyutadoda varirya jityuyu, richiryijada jita variy simu Estébanubay. ⁵⁸ Riryaracheda jamu vichadamusiy bimujuni, jasityi rijecheda variy ravichutani. Richipyatada sanchiy tuchuvay varirya jichujay, ribeyada variy sanumutu tuunu vaderonura, jiryatiy ravichada sitya Sávuru. ⁵⁹ Rijechedanumatini Estébanubay ravichuta, varicharaju sajoráyada sanijyu Jesús: “Yejiriy yimujuni rintu, Nutyityu.” ⁶⁰ Sadasidyoda jita varintiyu, sasañeyajada varintiy: “Nutyityu, ne yavata ruuvara ramurichirya jiyuuchurveda.” Saniquejadanumatirya jirya niquejada, sadiiyada variy rivasiy. Sajachipiyajada Sávurubay variy: “Jo, samirya day riñi jvañi.”

8

Sarupantada *Sávurubaryi* *Jesúsmu*
tuvachuvajyuubay

¹⁻² Nuñi ti vaduy, samirya jachityavay, jtoda variy jadchirya Estébanu babyi, jaryi runatyada variy jasiñi. Variryundamu rijyotada jarupantada jaryi variryi Jesúsmu tuvachuvajyuu, jiryatiy Jerusarimu vichavaryi. Varicharaju rurayada Judéya mucadivaju, Samáriya mucadivaju jarye, dantyamuy ne rurayada Jesús nusuvyedyeyu. ³ Varicharaju sani munumuryuyada Sávurubaryi Jesúsmu tuvachuvajyuuday. Sayatityiyada variy rorivya, jadchityi satiiyatityiyada riy nijyanvay ravimusiy jiryoriy, satidye jtye nupocu rorivyimu variryi.

Rityuchodara samituchoda Samáriyamu

4 Jiryatij rurayada Jesúsmu tuvachuvajyuuyu, riyada variy titaju vichadivaju, ridyetyanuti-tyiyada varirya samituchoda. 5 Sumusajayada jita Vedípebe Jerusarímusiy, Samáriyamuju, sadatyadoda jasiryi nijyanvay: “Sitima Judenu jaryeti Crístu, vuryeyada ráñu.” 6 Titaju nijyami tuvachoda samiy Vedípebe jtedamu. Titaju rijechipityajajada varirya, rityuvachoda varintyirya, runuyada ranacho mityamusiy judejada varintyi, jiryatij sivaañuyada jasirya. 7 Rimyisanuyada jita rajuuvay jamiryanu bayantutavay, richeñechiyanuyada bayantuveda variy nijyanvavyasiy, rymyisanuyada variy ruuvasiy. Rymyisanuyada jarapuyadavay varintyi. 8 Ramunitiy riichanayada jaryi Samáriya janvay variy.

9 Jasiy savichanuyada tiqui vanubantyi, ravichanuyada sitya Siimyó. Diyetya saquivuchunuyada jiñuvodata riy nijyanvay, diye saraju, rivani rityittanuyada Samáriya janvay variñi. Sutañuyada daryaju variy ruuva: “Ray jita vanu datyará.” 10 Titaju nijyanvay tuvachunuyada variy simu, vaderovay, rymyityumiy jarye. Ruteda jita variy: “Nini jita sitenu Judenu datyadaday, jiryatij rutay datyaravajura.” 11 Rityuvachunuyada simu, diyetya saquivuchunuyada jiñuvodata daryaju riy. 12 Riñi tuvachodanumatij ramu, daryatij sadatyanunuyada Vedípeberya Judenu nusuyadantij, Jesucristu jtyamu, riityuñuyada variy, vaduy, vatuy jarye. 13 Niday Siimyóbay tuvachoda ramuntij, sityuyadivasiy

yinuñumayanuyadani Vedípebe. Satittada jita variy rivani jiryatiy sivaayada mityamusiy datyadata tara sadiya, mityamusiy judejada jarye.

14 Rityuvachodanumatiy Jesús nusuvye Jerusarímusirya: “Rumutyajada jita Samáriya janvay varirya Judenu niquejada,” rupajada jita variñada Pyítrujube, Juánta ruumu. 15 Nanimusajayadivasiy jityuchoda sisa Judenu Samáriya janvay jiyadaju, riryatidye jmutyani Judenu Jnutu variy. 16 Ne sumusada Judenu Jnutu daryaju tivaju jasiy didye, vinu Jesús jtyamuju riñi jtyuyada varidye. 17 Jadchiy jita ribeyada Jesús nusuvyerya jiyomutu rincha, rumutyajada jita variñi Judenu Jnutu. 18-19 Sunuyadanumatiy Siimyóbay jiryatiy ribeyada sansuvye nijyanvay nchara jiyomutu, rumutyajada varidyeñi Judenu Jnutu day, suntatyada variy nadivara criquiy: “Rajerye vatantidyerya datyadantidye, ratidye bay tinchantidyerya rajyomutuntidye, riryatidye jmutya varintyidyeñi Judenu Jnutuntidye.” 20 Suteda jita Pyítrubay variy siva: “iRama caray jicyuriquiy yisaju! ¿Tarajura jityeryuryurya jiryatiy Judenu say mitya nurya, taraju? 21 Ne tara jnay yivaayasara nundye, tama tarade rañicha jiryá jvaayada jiiyunuday, tama, ne vase daryajura jijechipiyajada Judenunijyu. 22 Yanuma paruy riva taji jachipiyajada. Yajachiñuyanumucha siva Judenura, satidye machotaniy mityara vacha jachipiyajada jijechimyusiy. 23 Nuryamutiy rinuy jivyichasara yinnuvayadamu jiryatiy jivvara darya, ne jipyaruryuy riva jamirya vichada,

mitya.” ²⁴ Sumutyajada jita Siimyobay variy: “Jiryajachiñuy rayadaju siva Judenu, rañuma juuy tara nta rayncha, jiryatiy yitesiy rivara.”

²⁵ Nanutuchodanumatiy Pyitrujube, Juántara Judenu niqejadantiy, nanutaryada jita variy Jerusarimujuntiy, nanudatyanutityiyada varirya samituchoda, Samariya vichadiva.

Vedípebe saryejadani Etyopyíya mucadi jamibay

²⁶ Suteda jita Judenu jpanu siva Vedípebe: “Yanubesiy, yanuma jiya day, jiñi taşavumu núva, jiryatiy rumusajay Jerusarimusiý Cásamuju, raní ranicha mityato nú.” ²⁷⁻²⁸ Sanubeseda jita Vedípebe variy, sayada jita jadchiy. Sasaryeda jita nútasaní myistyasi, Etyopyíyamu vichi. Niní sanichada nutyityu, matyoda criquiy jnutyi, jiryatiy Candáse nanitya, Etyopyíya mucadimu vichanuy jamu curacatoda. Niní taryada variy Jerusarimusiý, jasityi sajachipiyajada variy saniyyu Judenu, sataryadanuma variy jimyucadimuju, samasatityiyada jicyarruvimu. Saniquetityiyada variy cateramu, jiryatiy Judenuju tuchubay nuyadara, Isayíyasiy jtyatibay.

²⁹ Suteda jita Judenu Jnutu variy siva Vedípebe: “Yatuudirya carru, yatidye jiya rajamijsa ravimu.” ³⁰ Sasiicheda jita Vedípebe variy. Satuvachodanumatirya saniquetityiyada tiqui vanu ramu Judenuju tuchubay niqejada, sitajadoda jita variñi vanu: “¿Jidyetyantyarajiryatiy jiñiquetityi ramu?” ³¹ Sumutyajada jita variñi: “¿Nutyichiy radatya mityara, nutyichiy? Ti nita datyanu ray.” Suteda jita variy siva Vedípebe: “Yajasumiy, yamasa ratyuunu.” ³²⁻³³ Jiryatiy

saniquetityiyada ramu catera nucharate rani jteda:

“Nutyu carniru rutoda varyiy yivedajuni; nutyu carniru denu varityi riperya sasiy, samachosara niquejasa varyiy, daryamunimuy ne samuttajara jiyu jiniquejadaju nuday. Riryantadedada daryaju ratani, ramutimyu ne vanay sudutya ti nunrya rityuchutada sanijyunuday. ¿Chira raryityuchu rinchiy sadadyeñu, chi? tapi richovarya sarunda mucadivasiy.”

³⁴ Sitajadoda jita myistyasi variñi Vedípebe: “Yani tuchu sitenu riva, ¿Chinijyu sanuyada Judenuju tuchubarya, chinijyu? ¿Jinijyu dyetya, varimyata tinijyu?” ³⁵ Ramusiñi sajotada tuchoda Vedípeberya samituchoda Jesúsnihiy.

³⁶ Nanurupiyada núva, naditojada varyiy jaamu, sutañuvejada myistyasi siva Vedípebe: “¡Yajnyu, jiryatirya ja! ¿Vanantya raryi jtyuy jaamu?”

³⁷ Suteda jita Vedípebe siva: “Yatuy tuvachu titaju jijeचित्या जीदयेयु.” Sumutyajada jita variñi: “Ratuyavachuma diye simu. Nini sitenu sanicha Jesucristu, Judenu denu.” ³⁸ Saparuyada jita tiyyada cavañura carru varyiy, saraniñuvejada varyiy jasiy, nanimusada jita Vedípebejyuy, myistyasita ravimusiy jaamuju, sityadoda Vedípebe varyiy jasiñi myistyasi.

³⁹ Nanasubedanumatuy jaamusintiyi, sasoveda jita Judenu Jnutuni Vedípebe sajisiy, ne sadiyada myistyasi junay varyiy jadchiy sivanuday. Ninuma jiryupiyada jadchiy yasiquta day, sichanacheda varyiy. ⁴⁰ Muñuma ridiyiyada nijyanvay siva Vedípebe varyiy,

Asótumu day. Sarupiyadamu jityuchutityiyadara samituchoda vichadiva títaju, Sesaréyamu jtojada saraju.

9

Satituyada Sávrubay Jesúsmu tuvachuju

¹⁻² Jaryi japichiy sanaryeyajada Sávrubay variy yivaryuyadamu Jesúsjsa datyavañiyu. Sayada jita simu caserdótevyeda nutyityu, cateranacho, satidye jiyata jutyeryanijomura, jiryatiy Damáscumura, satidye diñuve ruuva vatuy, vaduy jarye, jiryatiy richiityarira Jesús nú, varityi saryi jurichiy Jerusarímuju riy. ³ Sarupiyadamu Sávrubay, satuudiyadanu-matirya Damáscu, mityamusíñiday radanuyada nutyu nono jarichuvimusiy siva. ⁴ Sarayada varicharaju mucadincha, satuvachoda varirya niquejada jiñiyu: “¡Sávruru, Sávruru! ¿Tarajura yarupantanumucha ray?” ⁵ Saniquejada jita Sávrubay variy: “¿Chira jiñicha, Nutyityu, chí?” Sumutyajada jitani: “Nutyu rañi rañicha Jesús, jiryatiy yarupantanurye. ⁶ Yanubesumiy yatidye jay variy vichada cabyimuju, jasiñi rajtatyaniy yivara ratiy yajvaay.”

⁷ Rityi rupiñuyada sisa Sávrubay, rindasada variy niquejada yintedamu, jiryatiy rityuvachoda daryajura saniquejada, ne ridiyada daryaju siva niquejada jami. ⁸ Sanubesubeda jita Sávrubay variy mucadinchasiy, sani jnyajada variy yiro, ne sadiy tiva. Rimiyutacheda variy jadchiñi, Damáscumuju. ⁹ Jasiy savichada mumurundamicharaju, ne sunuyada tara, ne

sibyeda tara variy, dantyamuy ne satoda tara, mitya.

¹⁰ Jasiy jita savichada Jesúsjsa datyi, Ananíasiy jtyatibay. Sunuyadamu suteda Nutyityu yiva: “iAnaníasiy!” Sumutyajada jita Ananíasibe variñi: “jiyu day rañicha, Nutyityu!” ¹¹⁻¹² Suteda jita Nutyityu variy siva: “Yanubesiy, yatidye jiya vichada cabyiva jiryatiy rutay Vasenúra, yajtajadosiy Judásiy rorimyu siva jiryatiy Sávuru sitya, jiryatiy Társu jamini. Ne yinuy, sani tuchu sisa Judenu, sadimya siva tiqui vanu jiryatiy Ananíasiy jtyatini, jiryatiy sajay jita simu, sabarya jiyomutu variy sancha, satidye jaty jnyasubeda varintyi.” ¹³ Sumutyajada jita Ananíasibe variñi Judenu: “Ratyuva chusarara riñiquejada rajuura, Nutyityu. Rutay: Jaryi rajuura savichaniy Sávuru riy Judenu siityariyay, Jerusarimu vichavay. ¹⁴ Caserdótevyeda nutyityumiy jita jpa simura niquejadantiy, satidye jurityaniy titaju riy jiryatiy rivyatara jantyutyada Yiva, jiryatiy riñatuy Yityata Ji.” ¹⁵ Suteda jita Judenu variy sivantiy: “Yejiya. Tapi rajeryetani jiñu vanu, nityi rajtitara ritya niyamijuumuju, nutyityumimiyuju jarye, Irayenu dadyeñumuju risaju. ¹⁶ Radye radityanu rimusidyeñi, nutyura sacha riva, jiryatiy sasiityari daryaju ray.”

¹⁷ Sayada jita Ananíasibe variy, sajayada jita rorivyimu, siriñuvejada variy sanumutoncha, suteda jita variy siva: “Pi, Sávuru. Supama Nutyityu ray, nutyu niday Jesús jiñi dichiy nutasantiy, jiryatiy yitasiy rumusiy. Ramuni

supa yimu ray, yatidye jnyasumiy varintyi, satidye muchaniy Judenu Jnutu variy yiva.”
 18 Varicharaju rajuuyada tara sanisimyusiy, nutyu quivaji, sunuyasubeda variy rubiva. Sanubeseda jita variy, sityuyada jita varintyi.
 19 Sibyedanutimiy tara, savanutyaada jita rivasiyu.

Sadatyadoda Savurubay Damascumu Jesusnchiy

Jasiy savichada tarundamu ruusa Jesusmu tuvachuvay, Damascu janvay. 20 Varicharaju sadatyadoda Savurubay jutyeryaniyjo vimura Judenu niquejada Jesusnijyu: “Nini sanicha Judenu denu.” 21 Mityanuma runuchadeda sanacho: “¿Neviy nidaay jiryatyi sayasantanuchiy Jerusarimu riy, jiryatyi rivyatara jantyutyada Jesus jtyamu siva Judenu? ¿Ne viy nidaay jiryatyi savatanumaya riñecho, satidye jtu puchusavay caserdotevyeda nutyityumimiyuju riy?” 22 Savurubay jita jasachodara jidyetyadoda, ratani sadatyisadeda riy Judíyurveda, jiryatyi Damascumu vichavaryi, sani datyadoda daryaju Jesusnchiy riy: “Nini sanicha Judenu jaryeti.”

Saramityada Savurubarya Judíyurveda juveda

23-24 Rajuu rundanutimiy riryamichada, varityi rijechipityada Judíyurveda juvedani Savurubantyi, sadatyadama varenu. Nuporaca, judacaju runutyadara vichada rorijyu sabayadajisiy, riryatidye jvay variñi. 25 Ripyucheda jita Jesusmu tuvachuvay variñi, rumusadeda variy puryesara rudivasiy jtyuvimuni.

Sataryada Savurubay Jerusarimuju

²⁶ Jadchiy jita sayada Sávrubay Jerusarímuju, jasiy sanicharuyada ruusaju Jesúsmu tuvachuvay. Ne jaryi nta rivyataruyada yisajuni, ne rutaryuyada nta sitenu Jesúsmu tuvachu dañi. ²⁷ Sireda jita Bernabébay jadchiñi, saracheda jita nusuchavamyuju variy jadchiñi. Jasiy jita satuchoda Bernabébay variy ruuva: “Nútasá sadiy siva Jesús, jasityi sanique variy siva. Damáscumu jita sadatyadodara Judenu niquejada jichuvuyasadamu, Jesús jtyamu.” ²⁸ Jadchiy jita savichada titaju variy ruusa, Jerusarímu. Jasiy sadatyanunuyadara Judenu niquejada jichuvuyasadamu, Jesús jtyamu. ²⁹ Satuchunuyada Sávrubay variy, saniquetanuyada riy Judíyueda jiryatíy Cryécu niquejada niquevari. Riñi vatada variy sanacho day, ruvedaju. ³⁰ Ridyetyadanumatíy sataryiveda, riryaracheda jita variy jadchiñi, Sesaréyamuju; jadchiy jita rupajada Társumujuntiñi.

³¹ Jesúsmu tuvachuvay machojada variy samirya titaju mucadiva, Judéya mucadiva, Cadidéya mucadiva, Samáriya mucadivaju jarye titaju. Rivyanutyada variyu, rivyichanuyada variy jasiy, richuvuñuyada variñi Jesús. Judenu Jnutu jchanatyaniryuyada riy, ramutiy riryasayada variy.

Samisada Enéyasibe

³² Sayanumayajada Pyítrubay titaju vichadiva, sumusada jita variy jadchintyi, jiryatíy Judenu siitaryivay vichanuyada Dída jtyatara vichadamu. ³³ Jasiñi sasaryeñuvejadani tiqui vanu, Enéyasíy jtyatibay. Mumuriniyyate

vaata saraju satiryojayajada rancha jityiryojo, jiryatiy jurichini daryajuni. ³⁴ Suteda jita Pyitrubay variy jasiy siva: “¡Enéyasiy! ¡Samisaniy Jesucristu ji! ¡Yanubesumiy, yanuma jdutyara jimeya!” Varicharaju sanubeseda. ³⁵ Ridiyadanumatiy Dída janvay riva, Saró janvay jarye, riryānumityeda jita variy simuju Jesús.

Samisashubeda Dórcasibe diibyimusiy

³⁶ Jópemyu nanuvichada tanuqui Jesúsnu tuvachunuy, ravichada nanitya Tabíta, tara niqejadamu jita ruteda nada Dórcasiy, Janariy jtyatanuy variñada. Nanuvichaniñuyada riy nijyanvay samiy, nanimutyānuyada riy jantyuyadavantiy. ³⁷ Variryundamu rivaayada jdivajada nada, nanudiityada varirya. Richuutadanumatirya nanubabyi, ribeyada jita navay rorichivyimu varirya. ³⁸ Riñumatiy datyada Jesúsnu tuvachuvay, ne jaryi ripya savichada Pyitrubay ratarya vichadamu, Dídamu, rupajada jita danujuy vanujuy sanacho, nanujiyasantanumuchada variy jasiñi: “Varenude niday yajniy nudyimuju.” ³⁹ Sanubeseda jita Pyitrubay variy, sayada variy nadisa. Sitojadanumatiy ruumu, rijecheda jita ravimu navaryorichiñi, riryadeda jita bachenodamiy variy suro, jasiy runachadedada variy, ridyityadoda variy jichujayuuni, rarije jarye, jiryatiy nadivaañuyada Dórcasijyube rijyura, jasityidye nanichanuyada variy ruusa. ⁴⁰ Samadchoda jita Pyitrubay titaju bimuju jadchiryi, sadasidyoda jita variy

jasiyu, satuchoda sisa Judenu variy jasiy. Sanumityeda jita nanubabyi nachoju, saniquetada jita variy jasirya nanubabyi: “¡Tabita, sananubesumiy!” Nanumuttasubedara jiñisiy variy, nanudiyadanumatiy siva Pyítrubay, nanumasasubeda variy. ⁴¹ Sadyadoda jita Pyítrubay jiyomutu variñada, sanubesityadeda jita variñada. Sanatutyadeda jita variryi Judenumu tuvachuvay, bachenodamiy jarye, sadyadoda diibyimusiy misanuy variryi. ⁴² Ridyetyada jita Jópe janvay varirya, rityuvachoda rajuu nijyanvay simu Jesús variy. ⁴³ Taripyuju samachojada Pyítrubay variy sarorimyu Siimyó jtyatibay, jiryatiy savichanuyada vocajay tuyi.

10

Judenu tuchoda siva Pyítrubantiy, Cornéryubay jarye

¹ Sesaréyamu savichanuyada tiqui vanu, ravichada sitya Cornéryu. Niní vichanuyada sutarumiy nutyityu, ravichada ritya: Itádiya sutarujuu. ² Niní vichanuyada samirya jachityintiy jiryatiy satuvachunuyada simu Judenu yintedamu, titaju sarorimyu vichavatyá jityuvachunuyada yintedamu simu. Sumutyanyada riy jantyuyadavay, satuchunuyada japichiy Judenujsantiy. ³ Niní diyada mityamusiy samiy siva Judenu jpanu, jiryatiy sani jniy simuju. Ninu tasavumu vichita sadiy siva. Suteda jita Judenu jpanu siva: “¡Cornéryu!” ⁴ Sunuyajada yintedamu variy

sanacho, suteda jita variy siva: “¿Tara, Nutyityu, tara?” “Jiryatijityuchunuyada sisa Judenu, jiryatijityuchunuyada riy jantyuyadavay varintyi, ramutiy sajachipiya Judenu variy jijnjyu. ⁵ Diye jita yajpa riy vaduy, Jópemyu, yanatutyaniñi Siimyó, jiryatijityuchunuyada riy jantyuyadavay varintyi, ramutiy sajachipiya Judenu variy jijnjyu. ⁶ Ninijityuchunuyada riy jantyuyadavay varintyi, ramutiy sajachipiya Judenu variy jijnjyu. ⁷ Saniquemuyadanumatijityuchunuyada riy jantyuyadavay varintyi, ramutiy sajachipiya Judenu variy jijnjyu. ⁸ Satuchodanumatijityuchunuyada riy jantyuyadavay varintyi, ramutiy sajachipiya Judenu variy jijnjyu. ⁹ Riñi jtoruyadanumatijityuchunuyada riy jantyuyadavay varintyi, ramutiy sajachipiya Judenu variy jijnjyu. ¹⁰⁻¹¹ Sajachijadanuma varidye, simyiryuyadanuma varintyi. Riñi mutiiyedye varidyerya jmyichara day, satituyadamu jidiyiyada riva jarichu muttaryá. Rumusajayada jita variy nutyu sujaqui, daryajuy murnaasaratara mucadinchaju. ¹² Jasiy savichada tijityuchunuyada riy jantyuyadavay varintyi, ramutiy sajachipiya Judenu variy jijnjyu. ¹³ Satuvachoda jita Pyitrubay varirya niquejada: “Yanubesumiy, yajvañi, yatidye jmyi variñi.” ¹⁴ Suteda jita Pyitrubay variy: “Tama rimyiryuy ntate dañi, tama, ne rimyichara tarundamu dañi jubachi day, javidchico.” ¹⁵ Sajatyiyada jita tuvachodara

⁹ Riñi jtoruyadanumatijityuchunuyada riy jantyuyadavay varintyi, ramutiy sajachipiya Judenu variy jijnjyu. ¹⁰⁻¹¹ Sajachijadanuma varidye, simyiryuyadanuma varintyi. Riñi mutiiyedye varidyerya jmyichara day, satituyadamu jidiyiyada riva jarichu muttaryá. Rumusajayada jita variy nutyu sujaqui, daryajuy murnaasaratara mucadinchaju. ¹² Jasiy savichada tijityuchunuyada riy jantyuyadavay varintyi, ramutiy sajachipiya Judenu variy jijnjyu. ¹³ Satuvachoda jita Pyitrubay varirya niquejada: “Yanubesumiy, yajvañi, yatidye jmyi variñi.” ¹⁴ Suteda jita Pyitrubay variy: “Tama rimyiryuy ntate dañi, tama, ne rimyichara tarundamu dañi jubachi day, javidchico.” ¹⁵ Sajatyiyada jita tuvachodara

niquejadantiy: “Jiryatiy satitudoda Judenu samiju dañi, ne yajtay jubachi jiiyyu dañi.”
 16 Mumurinumatiy suteda siva, saryesubeda variy navajyuntirya sujaquii murnašarantiy.

17 Sajachipiyajada jita Pyitrubay jijechimyu variy: “¿Tarajura ranicha jiryatiy radyi riva, taraju?” Varicharaju rimyutinuvijada vaduy jasiy simu, jiryatiy ruutijada Corneryubamyusiy. Ruutajadoda jita riva Siimyobay roriy.
 18 Ruutojada jita roriyyumu, riñatuyeyada jita variy jadchiy: “¿Jiyunivirya savichajo Siimyó, jiryatiy rutay Pyitru jtyatini?”
 19 Raday sajachipityajajada Pyitrubay varidye jiryatiy sadiyada riva, suteda jita Judenu Jnutu variy siva: “Yajnuy, munvay vanumiy vata jiñecho.
 20 Yanubesumiy, yajmusa ruumu, yejiya ruusa. Ne yajachipiya taji variy, radye jpa yinudyeryi.”
 21 Sumusada jita variy ruumu, sutañuvejada jita variy jasiy ruuva: “Rañi rañicha jiryatiy jiryevyata rañecho. ¿Taraju jiryiniy, taraju?”
 22 Ruteda jita variy siva Pyitrubay: “Nuy jita jniy Corneryumusiy, jiryatiy sutarumiy nutyityuni. Ninì sanìcha vase vichara vanu, samirya jachityi risajuni. Satuvachusara simu Judenu, samirya jvadichi variy Judiyuvedajuni. Ninì jmutyajarya Judenu jpanu niquejada, satidye natutyaniy jiryorimyuju ji, riryatidye tuvachu nijyanvay jasirya jiñiquejada.”
 23 Sanatuyada Pyitrubay variy jasiryi: “Jiyu jiryamaryi tanuporaqui.”

Ratarimysifiñuma sanubeseda, sayada variy ruusa, riyada jita Jópemyu vichavay taryiveda tevay ruusa.
 24 Ratarimysiy jita ruutojada

variy Sesaréyamu. Santuyadanuma Cornéryubay varidyeryi, santýeryadedama varidyeryi jityevadye, sajaamicyueda jarye jiryatíy samiy nijyanvadyeryi. ²⁵ Sajañuvejada jíta Pyítrubay, sarupityityiyada Cornéryubay variy sídchoju, supatyevijada variy sanumutu tuunu, sadasidyoda variy sanachojuyu. ²⁶ Sanubesityadeda jíta Pyítrubay variñi: “Yanubesiy, day vanu dantyidyerye.”

²⁷ Satuchutityiyada variy sisa, sajayada jíta variy rorivyimu, jasiy sasaryevijada riy nijyanvajyuu rajuu. ²⁸ Suteda jíta Pyítrubay variy jasiy ruuva: “Jiryeñi datýisatanuday, jubachara sajisiy Judíyura taji chísa vichada, dantyamyu ne jañuyadasara simu. Sadatyanujamya Judenu darye: Ne yajtay darya jubachi nunñi, dantyamyu ne yajtay ti jamirya vicharanuday.” ²⁹ Suteda jíta Pyítrubay varintyí: “Ramuni rinije vanirade, jiryatíy jiryeñatuje daryaju ray. Rajtajanu diye jirye: ‘¿Taraju jiryeñatujerye, taraju?’ ” ³⁰ Suteda jíta Cornéryubay variy siva: “Daryundajuyuju diye, dajiñuma ratyuchunuje Judenujsa raryorimyu. Mityamusiy saranije tiqui vanu variy ratyuunu, vandajay sasujay. ³¹ Sutaje jíta variy jasiy riva: Cornéryu, satuvachuma Judenura jityuchoda, jiryatíy jityuchusara sisa. Sadatyamantíy, jiryatíy yicanuchara jmutyada riy jantyuyadavay, sajachipityajama jíta riva variy ji. ³² Yajpa ti sanachó Siimyó Jópemyu, jiryatíy Pyítru jyatini. Jasiñi Siimyó rorimyu savicha, jiryatíy vocajay tuyini, jiryatíy jamu nava jiinirya saroríy. ³³ Jasidye ripajay jiiyjuntiy, samirya day yinije variy. Diye

jīta vuryecha sadiya Jūdenu day, vuryatidye tuvachura ratiy sūtaje Jesús yiva: Yajtay ruuvara.”

Satuchoda Pyítrubay, Cornéryubay rorimyu

³⁴ Suteda jīta Pyítrubay variy: “Diye jīta sítenu radyetyara: Ne sajaryeta sítenu Jūdenu tī, nuñi darya day vuñicha tītaju. ³⁵ Jūdenu jmuṭyasarani nītiy tuvachusara simu, nītiy samirya jachityi saju, dañuma sachā tara nijyamī. ³⁶ Supajada jīta Jūdenu, Irayénu dadyeñujuumura samirya tuchoda; satuchura samirya vichasada, Jesucrīstu tuvachusadamu, tapi nītya tītaju nijyamī Nutyityu. ³⁷ Jiryedyetyantyarā rāticheyada, jiryatīy ravichanuyada jasiy Judíyūveda mucadimu, jiryatīy rajotada Cadidéyamu, Juan Jītyanu datyadoda bivaju, sityadoda bivaju jarye. ³⁸ Jiryedyetyantyanī Jesús, jiryatīy Nasaryé jamīni. Jūdenu sayada Yintunī jidyenu, mityamusiy judejada jarye, ranchityi riryadatyani: Nīnī Jūdenu denu sítenu. Jiryedyetyantya jīrye, Jesús vichaniñumayanuyada samirya riy nijyanvay, samīsaniñumaya tītaju riy, jiryatīy bayantuveda jdivatadedā riy, tapi Jūdenu vichanuyada daryaju sisā day. ³⁹ Nujerye jnuñuyada sivaay Jesúsra, ne vinu Jerusarīmu, tītaju Judíyūveda vichadiva jarye. Nī jarye richotadedā jīpu tasasiy. ⁴⁰ Judenunuma misadedā jadchīy ratarya tarimysidyeñi, sasayada jīta variy jidyetyada tera jasiñi, satidye dityanu ratayu. ⁴¹ Ne sadyadoda tītaju nijyamīyu, vinu sanchiy tuchuvajyuu jidyityadoda dayu, tapi sajaryetadama Jūdenu jītyaju daryaju daryi,

mira rādiy siva Jesús. Nuñi rañicha sanchiy tuchuvay, jiryatiy nuñimyityi vatajuu sisantiy, nuñatutyi variy sisantiy, samisatimya variy jidyiyadamusidye. ⁴² Sutatyi Jesús variy nuñijyu, nuñatidye datyanu riy nijyanvay saniquejadata, nuñatidye tuchusara samiy variy sanchintyi. Ninī Judenu bayada Cadnadujunī Jesús, ninī ramurichenutanichara riy nijyanvay jnuvye, diibymiy jarye samurichenutanichara ruuvaayada murichirya. ⁴³ Tītajū Judenujū tuchuvabe tuchusara sanijyu Jiñu:

Jiryatiy rityuvachu simu day, riñi rajmutyasarara, mitya saramityaniy varirya rijyuuchaveda sityamu.”

Jiryatimyu ne Judíyurveda daryi, rumutyajadani Judenu Jnutu

⁴⁴ Saniquejadanumatiy Pyítrubarya jirya niquejada, varicharaju sajuujeyada Judenu Jnutu ruuvaju, tītajū jiryatiy rityuvachoda daryajura saniquejada. ⁴⁵ Judíyurveda, Jesúsnu tuvachuvay, jiryatiy Pyítrubayjsa vichavaryi, riñi tītāda varirya jiryatiy sarumiy Judenu ruuvani Yintu, dañumamuy ne Judíyurveda riñicha day. ⁴⁶ Rityuvachoda daryajura jiryatiy rijyotada niquejada nuñi timusiy tara niquejadamu. Rityuvachoda jītara rutedantiy: “Jaryi rajuura datyara Judenu!” ⁴⁷ Sumutyajada jīta Pyítrubay varintyi: “¿Ne vanay jubachara nta jaā nundyē, riryatidye jtyuyasīy jasiy? Nutyu rumutyamani Judenu Jnutu day, nutyu nutyi daryantiy.” ⁴⁸ Sītyanutadeda jīta Pyítrubay Jesucristu jtyamu

variryi. Jasiy jita riyasantada variñi Pyítrubay: “Yamacho tarundamiy nudyisa.” “Jo.”

11

Satuchoda Pyítrubay ruuva Jesúsmu tuvachuvajuubay jiryatiy Jerusarímu vichavaryi

¹ Rityuvachoda jita nusuchavay, Judéya janvay, Crístumu taryivachavay jarye: “Jiryatimyu ne riñicha Judíyueda day, rijerye niday jmutyasintyirya Judenu niquejadantiy.”

² Sasubedanumatiy Pyítrubay Jerusarímu, riñiquetta da varyi jasiy Judíyuedani. ³ Ruteda varyi siva Pyítrubay: “Jiñi jañuchiy ruumu nijyanvay jiryatimyu ne Judíyueda daryi, jimyichiy varyi ruusantiy.” ⁴⁻⁵ Jadchiy

jita satuchoda Pyítrubay ruuva ranchiy, daryatiy savichada sisa Cornéryubay: “Jópemyu ratyuchunutyi sisa Judenu, ratyítuyadanube radyi jasiy riva rajuutyityi sujaqui murnašara rimuju, daryajuju nurorá. ⁶ Mitya jnutacha

rinuy ranacho, radyi jita rajuuva ti rapurya jasiy, jiryatiy daryajuju numututini, tojami jarye niquerya sisaju, muquiva rupiñumayara, nipyati jarye, jiryatiy navay sajinumayasara.

⁷ Ratyuvachuti jitara niquejada: Yanubesumiy Pyítru, yajvañi, yatidye jmyiñi. ⁸ Ritatyi jita varyi: Tama vanay ntate rimyidyeñi jubachi

day, Nutyityu, tama, jiryatiy javidchini, ne raramijeryuy sasaviy rajyu day. ⁹ Ratyuvachuti jatyyadantirya niquejada jarichumusintyi: Jiryatiy satitudoda Judenu samiju dañi, ne yajtay

jubachi jiiju varyiñundyeni. ¹⁰ Mumurinumatiy

sutatyí rivantiy, saryesumityí jíta variy jadchíy títaju jarichumujuntírya. ¹¹ Varicharaju rimyutíti munvay vaduy, jiryatíy Cornéryu jpadadamu rañecho riy, ruutí ramu roriy, jiryatíy nuvyicha ravimu. ¹² Sutatyí jíta Judenu Jnutu riva: Yejiya ruusa, ne yajachipiya tara variy ruusasiy. Jadchíy jíta riyatí tiquinijyate vutyeryiveda risa, nujeñuve jíta Cornéryu rorivyimu. ¹³ Niní tuchuti nudyiva: Radyimya siva Judenu jpanu raryorimyu. Saraniy jasiy, jasiñi sutay riva: Yajpa ti Jópemyu, yanatutyaniñi Siimyó, jiryatíy Pyítru jtyatí rutañi. ¹⁴ Niní ranique yivara, mirya niquejada rajantyuy yiva, títaju jiryorimyu vichavay jarye yisaju. ¹⁵ Rajyotada niquejadamu sajuuje Judenu Jnutu ruuvaju, darya niday títaju jiryatíy munatya sajuujejada darya vuryivajuntiy. ¹⁶ Rañi jachipityasidyerya saniquejada Jesús: Niní jíta Juánbay sitenu jtyadoda jaata daryi nijyanvadye, jiryé jíta rajtyuy Judenu Jnutumu day. ¹⁷ Judenu satyí mitya Yintu daryi, nutyu vutyi sasatyí daryantiy, tapi vutyuvachusara daryaju simu day.” Suteda jíta Pyítrubay varintyí: “¿Chí rañicha ray, chí? ramutiy rajbarya sivaayada Judenu.” ¹⁸ Rityuvachodanumatírya jiryá niquejada, rindasada variy ranchiy, riichanatyada variñi Judenu. Ruteda variy siva: “Jiryatimyu ne Judíyurveda daryi, rijerye sasayada Judenura riryatidye paruy riva vacha jachipiyajada, riryatidye jay junareju jnyadamuju varintyidye.”

Jesús siityarivajyuubay Antiyuquíyamu

¹⁹ Jiryatiy rijyotada jiyasantadani Estébanubay, rivasiñuma jita riyasantadantiryi Jesúsnu tuvachuvantiyi. Varicharaju rurayada varidyeyu, ruutojada variy ramu Venísiya mucadi, Chípyirye ratyuumu jarye, Antiyuquíya vichada saraju titaju. Riñiquetityiyada varirya Judenu niquejada, vinu Judíyurveda ridyetyanutityiyada rata. ²⁰ Jasiy rivyichada Chípyirye ratyuu janvay ruusa, Siréne janvay jarye. Ruutojadanumatiy Antiyuquíyamu, riñiquenuvejada varirya Judenu niquejada variy jasiy ruuvantiy, jiryatimyu ne Judíyurveda daryi, rityuchoda variy jasirya samituchoda Nutyityu Jesúsni. ²¹ Judenu jarye jmutyada varidyeryi, rajuu tuvachoda daryaju simu, riryantumiyemya variy vacha vichadajisiy Judenunachoju day. ²² Ridyetyadanumatiy Jesúsnu tuvachuvay Jerusari janvarya raticheyada, rupajada jita variñi Bernabébay ruumu, Antiyuquíyamu. ²³ Sitojadamu yinuñuvejada jiryatiy Judenu jmutyada daryajuriy, sichanayada jita variy, sadatyadoda jita variy jasiryi: “Ne jiryaparuy jijechitya riva Judenu siityarisada.” ²⁴ Samiy vanu savichada Bernabébay, Judenu Jnutu muchadeda variy siva; jaryi samiy satuvachoda jijechitya simu Judenu daryaju. Riryasatyityiyada variy Judenumu tuvachuvajyuu day. ²⁵ Sayada jita Bernabébay variy Társumu, Sávrubañecho. Sadiyadanumatiy siva Sávrubay, sapucheda jita variy Antiyuquíyamujuni. ²⁶ Taraqui vaata saraju riintyeryadeda Jesúsnu tuvachuvay nadisajuyu, jasiñi jita nanudatyadoda riy rajuvay nijjanvay. Antiyuquíyamu jita rijyotada

jteda Crístu siityarivaryi.

²⁷ Variryundamu day rumusajayada Judenuju tuchuvay Jerusarímusintyi, Antiyuquíyamuju.

²⁸ Sanubeseda jita tiqui riquebyimusintyi, ravichada sitya Acábu. Satuchoda variy ranchiy, Judenu Jnutu tuchoda: “Jachinu runda racha titaju mucadiva.” Daryani sitenu rarabeda jachinu runda variy, Cadávuryubay vichanuyada jamu nutyityu variy. ²⁹ Judenumu tuvachuvay jachipiyajada jmutyada variryi jityeryiveda, jiryatiryivyichanuyada Judéya mucadimu. Nuñi tiqui sayada riy jityevay daryatiryumu day.

³⁰ Variñi jita rupajada Bernabébamyura criquiy, Judéya mucadi rimityumimiyuju. Sayada variy Sávrubay sisa.

12

Santiyácubay munusada, Pyítrubay tanuvunusada jarye

¹ Variryundamu sirityadeda jamu nutyityu Jeródesberyi Jesúsnu tuvachuvay tevay, satidye jvatyaniy variryi. ² Suvatyadeda variñi Santiyácubay, Juánbay taryi, jichityityata.

³ Sunuyadanumatiy Jeródesbe rucanuyada Judíyurvedara, sirityaniryuñuma varintyini Pyítrubantyi. ⁴ Pa suru vichtya rundamu siirityadedani Pyítrubay, riityejada variy nupocu rorivyimuni. Sabayada Jeródesbe variryi vuyajuy sutarumiy, tiquinijyate rinchaju, Pyítrubay jnutyadaju, riryamityada jita jnutyada variyu, nuñi dañujuyumusiy, riryatidye jnutya variy jasiñi. Sani jachipiyajada Jeródesbe

sipyatadedani Pyítrubay niyamijuu diya, Páscó vichtyavasiy. ⁵ Jiryatíy savichada Pyítrubay samíy jnútyasi ravímu nupocu roríy, Jesúsmu tuvachuvay jíta tuchoda japichíy varíy sisa Judenu sayadaju.

Judenu jpanu sipyatadani Pyítrubay nupocu rorivyimusiý

⁶ Varíy tarímyusiý sani jteda yasipyata Jeródesbe niyamijuu diyani, samayada Pyítrubay varíy sutarujuy cabyímu, puchusi savichada dajuujuy cadyidyajuuta. Tavay sutarumiñi jnútyada varíy roríjyumu day. ⁷ Mityamusíy samutíjada Judenu jpanu varíy jasiy, nútyu nonodaquí sadanútyadeda vandaquíiju varíy jasiy. Súvatíyíyada sajiimunumu Pyítrubay varíy, sídyojadaju. Suteda jíta varíy jasiy síva: “¡Vaníravaju yanubesiý!” Rajuuýada jíta cadyidyajuú varíy sajomutu mururyamusíy. ⁸ Saniquejada jíta Judenu jpanu sívantiy: “Yapuchura jicyannujay, yajachura jichaapatuntíy.” Daryani savichadeda varírya. Sajatyíyíyada jteda sívantiy: “Yajachura jichujay yiva, yasiityari jíta varírye.” ⁹ Sasipyateda jíta varíy jadchíy, sasiityarijada jíta varídyeñi. Ne sadatyada Pyítrubay varírya savichadeda: “Sítenuñi sanichaníy Judenu jpanu ray, varímyata rameryísadamu dyetya savichanírye.” ¹⁰⁻¹¹ Nanuramíryíjada jíta nada sutarujuy, jiryatíy nanínútyara roríjyú, nadítojada ramu roríjyú, yívyamu tera, jadchítíy richípyateda víchada cabyívaju. Mityamusíy ramutteda roríjyú nadaju day. Nanusipyateda jíta varíy

jadchiy, nanurupicheda vanira japupu riva nú. Mityamusini sacarayada Judenu jpanu sisasiy, varicharaju sadatyasubeda variy subivayu: “Diye jita sitenu radyetya, sitenu supa Judenuni yipanu rimu, nini jantyuy Jeródesmysiy riva, Judiyuvedamusiy jarye, riñi jachipiyamattye: Titaju tara vuryechaniñi.”

¹² Sadatyasubedanumaty Pyítrubayu, sayada jita variy Maríajube rorimuyju, jiryatyy nanuvichada Juan jnoda, rutañuyada Mácura sitya táryara. Riintyeryadeda rajuu nijyamijuu variy jasiyu, Judenujsa rityuchoda variy jasiy. ¹³ Suvatyinuvejada Pyítrubay variy nanurorijyudavya, Maríajube. Sunuñuyada jita muhechityu sanacho, jiryatyy ravichada sitya Rúdi. ¹⁴ Sadatyadanumatirya saniquejada Pyítru, mitya savaruñumayajada jichanayadamu variy. Jimyuttasira sasiicheda rajisiy rorijyu, satuchoda variy ruuva nijyanvay: “Pyítru jita rorijyumu day.” ¹⁵ Ruteda jita variy rumu siva: “¿Tajuna yavaruñumaya, tajú?” “¡Ne, sitenu niday!” Ruteda jita variy sivantyy: “¡Suntu jnutyi dyetya!” ¹⁶ Junay suvatyyada Pyítrubay variy rorijyuva day. Rimyuttada jítara rorijyu variy, ridyyada jita siva, rityittada jita variñi. ¹⁷ Sumuyajada jita variy riñecho: “¡Jiryandasa!” Satuchoda jita variy jasiy ruuva: “Judenu sipyatasiy ravimusiy nupocu roriryé.” Suteda jita jasiy ruuva: “Jiryama tuchu siva Santiyácu, titaju vutyeryivedava jarye.” Sayada jita jadchiy tajijyu.

¹⁸ Rasachada jita, satuvachoda jita riñiquesadeda nuñi sutarujuu: “¿Nutyinmantiñi

Pyítru jiyusintyi?” ¹⁹ Supajada jita Jeródesbeñi váti sanacho. Ne ridiyada siva; sitajadoda jita Jeródesbe samiy variryi sutarumiy. Suvatyadeda jita Jeródesbe variryi sutarumiy yinutyisadiva. Sumusajayada jita Jeródesbe variy jadchiy, Jerusarímusiy, Sesaréyamuju, samachojada jita variy jasiy.

Jeródesbe diiyada

²⁰ Jaryi saniqueyada Jeródesbe ruusa Tíru janvay, Sitú janvayjsa jarye. Rijechipiyajadamu yiti simu Jeródesbe. Savichanuyada Jeródesbe muchechebe jasiy, samaje jdutyi, ravichanuyada sitya Bunástu. Ricyanayadama jiyadaju varidyeni, varicharaju riñi jdutyaruyada sisa Nutyityu Jeródesberya niquejada: “Yanuma paruy riva nudyisa niqueyada day.” Samucadimusini rumutyasara daryajura jmyichara jaryi.

²¹ Tarundamu santyeranyityadeda Jeródesberiyi nijyanvay, riryatidye tuchu variy jasiy sisa. Sajachoda Jeródesbe variy yivara samichujay, samasada jita variy jimyasajoncha, saniquejada jita jadchiy ruuva.

²² Richeñeyajada jita nijyanvay variy: “iNutyu rani ranicha Judenu niquejada day, tama mitya nijyami niquejada ranicha day, tama!” ²³ Varicharaju sarupadoda Judenu jpanuni Jeródesbe, jiryatimyu ne saniquejada daryaju sayadaju Judenu. Variy jita simyityadedani chapinu savimu, sadiitya jita variñi.

²⁴ Judenu niquejada rayasumityityiyada, ruratyityiyada varintyi. ²⁵ Bernabébay, Sávrubatya nanutaryada Jerusarímusiy,

nanusamyutimya^tiy criquiy variy jasiryi. Nanaracheda yisaju variñi Juánbay jadchiy, jiryatⁱy rutañuyada Márcuntiñi.

13

Bernabéjube Sávruta nanujotada tuchunumayjadara samituchoda

¹ Rivyichanuyada Jesús^mu tuvachuvay, Antiyuquíya janvay, rityevay jita vichanuyada Judenuju tuchuvay, datyanuvay jarye, nutyu Bernabébay, Simeyúbay jarye, jiryatⁱy rutedani Vadacu, Dúsiyu jarye, jiryatⁱy Sirénemu vichini; Manayébay jarye jiryatⁱy savichanuyada jamu nutyityu Jeródesbe taryivichí, Sávrubay jarye ruusajuntiy. ² Judenu nijyu rijechipiyajada variy jasiy, ne tara jmyivye rijechipiyajada sanijyu variy. Suteda jita Judenu Jnutu jasiy ruuva: “Jiryabay rajyu jvaayasanujuyyu nada Bernabé, Sávruta, jiryatⁱy rajeryetama jvaayadaju nada day.” ³ Jadchiy jita rityuchoda Sisa Judenu yinradivasiy, ribeyadara jiyomutu nanuncha, rupajada jita variy jadchiñada.

Nanutatyadoda Chípyirye ratyuumu

⁴ Judenu Jnutu jpajadamuju nada, nanimusajayada jita jadchiy, Sedévusiyamuju, nadayada jita variy jadchiy cartyequiivimu, jiryatⁱy sujamyusiy rupiryara, Chípyirye ratyuumuju. ⁵ Naditojada jita Sadamyínamuntiy, nanutatyadoda variy jasirya Judenu niqejada, Judíyueda jutyeryanijyo vimuntiy. Jasiy savichanuyada Juánbay nanimutyisiju. ⁶ Nanutiryorijada ratasa raratyuu, naditojada

vari y Pájosimyu. Jasiy nanusaryeñuvejada variñi rimyurabay, jiryatiy suteda mitya Judenuju tuchuyu. Judíyu sanichada, jiryatiy Barjesús sitya. ⁷ Savichada jita sisa japu, jiryatiy Sérjyu Pávuru jtyati dañi, niní vichanuyada sitenu vanu, jaryi varenu datyara. Sanatutyadeda jita japunada Bernabéjube Sávruta, Judenu niqejada satuvachuruyada daryaju. ⁸ Jamirya savichada Edímasiy jtyati rimyurabay variy nanumomusiy. Edímasiy rani sitya rimyura day. Saquivuchodanuma varidyeni japu day, sañuma tuvachu ramu Judenu niqejada. ⁹⁻¹⁰ Sávrubay jita, jiryatiy sityantiy Pávuru, tapi Judenu Jnutu vitya muchadeda siva, sunuyada variy samiy sanacho rimyura, saniquejada variy siva: “¡Quivuyada jay rapurya! ¡Vacha jachipiyara rapurya! ¡Bayantu nutyityu denu rapurya! ¡Samirya vichada mityasiy rapurya jarye risaju ji! ¿Nutyeryivyeñuma yaparuy ruyinujajadara Judenu nú, nutyeryivye? ¹¹ Tama taji ranicha Judenu jomutu yinchanuday, tama. Nisipyuryi yamacho variy, ne yadiy variy riva nono taraquijunuday.”

Varidyeday sunuyada nupocudisuma, jadchiy jita ne sunuyada taranuday. Jasiy sani vatanumayajada variy tinacho, satidye mutachiy sajomotunchiyu. ¹² Sadiyadanumatiy japu riva, satuvachoda jita variy simu Judenu, satittada varirya Judenu datyadoda.

*Nanuvichada Pávurujube Bernabébatya
jañuñujuy Antiyuquíyamu jiryatiy Pyisídiya
mucadimura*

13 Sayada jita Pávurubay, sisa vichavatya Pájosimyusiy, ruutojada jita Pérquemyuntiy, jiryatiy Pajídiya mucadimura. Sajiintyeda Juánbay variy ruusasiy, sataryada Jerusarímuju.

14 Nadayada jita variy jadchiy, naditojada jita Antiyuquíyamuntiy, jiryatiy Pyisídiya mucadimu darya. Jadchiy jita nanujayada ravimu jutyeryanijyo, nanumasanuvejada variy jasiy.

15 Saniquemuyadanumatirya Judenu niquejada catera padyevya, jiryatiy Judenu datyadoda darya, Judenuju tuchuvay niquejada jarye, rupajada jita jutyeryanijyo nutyityumirya jiñiquejada nadimu: “Vanujuy, ratyeryijuy, sanidatyavidye tara datyadoda niquesada nijyamijuday, sanani nique diyedemusirya.”

16 Sanubesubeda jita Pávurubay variy, sasanujajada jiyomututa rijyu ridyetyadaju, suteda jita ruuva:

“Jirye vaduy, Irayénuveda, jiryeñi tuvachutiy Simu Judenu, jiryatuvachu samiy rañechontidyecyu. 17 Sajaryetada

jita jiñu Irayénuveda Judenu riy tariy vumyunatyavay. Sasachoda variryi nijyamijuu, rivyichanuyadatidye variy Ejíptumu. Sasipyatada jita jadchiy yindejadata riy. 18 Daryajuy vuyajuy vaata tuunu saraju sunutyada mityatomu riy. 19 Sacasiyada riryajisiryi dajuujuñiyate nijyamijuu, satidye say rubivaju mucadi riy.

20 Daryajuy pacha vaatamusiy, tadajyo vuyajuy vaata tuunu ranchaju, sasayada pariche mucadi riy. Sasayada jita Judenu variy rijyapujuyu, rintyityuju, nitidye rajpanuy taranacho riy,

sarundamutidye jivyichada saju tuchubay, Samíru jtyatibay variy. ²¹ Jadchiy jita rivyatada nijyamijuu jintyityuju siva Judenu, sasayada jita variy Sávuru jtyatibaryi, daryajuyu vuyajuy vaata saraju, jiryatiy savichada Sísubay denubay, Myijamyí jurirya. ²² Sasipyatada jita variy Judenu jadchintyiñi Sávurubantyi, sabayada jita variy subivajuni Davyíbentyi. Jadchiy jita suteda Judenu:

Radyimya siva Isayí denu Davyíy, jiryatiy samiy vanu rajyu dañi. Niní jita rajvaacharara ravyataraday jiryatiy ricanuchara darya.

²³ Tiqui sabayada Judenu Davyíbe dadyeñu tenu, Irayénueda jantyutyisiju, daryani suteda. Nutyu niniday Jesús sanicha jantyutyará. ²⁴ Jesús judedajisiy, sadatyadoda Juán Jityanubadyeryi Irayénueda nijyanvajyuu day: Jiryánuma paruy riva vacha jachipiyajada, jadchiy jita jiryajityuy. ²⁵ Rabaryiruyadanumatiy sivaayada Juánbay, suteda jita variy jasiy ruuva: ¿Nutyura jiryitarye, nutyura? Tama darya rañicha jiryatiy darya jiryitadyerye. Jadchiy jita sutedantiy: Jativyenumani nu risintyi. Niní jita jaryiñu rimusidye, ne rasara radyetyada day rachajay samuchechijyu, ranadamusiy ramyasany satuunu day, ramutimyu ne ririryuy ranachō sasaapatu vitada. Daryani suteda Juán Jityanubay.

²⁶ Vaduy, ratyeryiveda, jiryatiy Avurábay dadyeñu jirye, jiryatiy jiryetyuvachu simu Judenu, vuryimu jita supa Judenura jirya jantyuyada niquejada day. ²⁷ Jiryatiy

Jerusarí janvaryi, rintyityu jarye, ne ridyetyaruy jantyutyarani Jesús. Ramutimyu ne rityuvachunuyada ramu, saju tuchubay niquejada, jiryatij riñiquettanuyada varirya catera, jiiuyada rundamu day. Jasiñuma ruutotadedada varirya jirya saju tuchuvabe niquejada day, riñiquejada daryaju sanijyu Jesús: Dañuma riryamunu rivani. ²⁸ Richabuyama daryaju riva suvachada, rijechiñuyada jita siva Pyidatu variy: Yajvatyaniñi Jesús. ²⁹ Rivyichanimyuyadanumatij tarani Jesús, titaju jiryatij Judenu niquejada daryara: Nurya niday riryechaniñi. Rumusadedada jita ratasasiy crusiñi, rumuchoda jita variñi. ³⁰ Jasidye samisadedada variy Judenu diibyimusidyeñi. ³¹ Rajuu runda saraju sadyanunuyada Jesús yisa vichavayu, jiryatij riryasumiñuyada sisa Cadidéyamusiy, Jerusarimuju. Riñi riñicha diye saju tuchuvay nijyanvavya. ³² Nuy jita ratuchu jiryivara samituchoda day, sitotanimyu jita Judenura jiryatij suteda tariy vumyunatyavavyara. ³³ Sitotanimyuma jita pariche vujyura, jiryatij ridyedyeñu davyuy, jiryatij samisanij daryajuni Jesús. Daryani ranicha murrayada nuchara cateranij, darajujyu murrayadamu nuchara jasiy:

Jiñi rañicha radyenu, jiryatij diye rundamu radyetuy ji.

³⁴ Jiryatij samisanityi Judenu diibyimusiñi Jesús, ne sapuuchara taramunoday, daryani Suteda Judenu:

Ray rasay jiryerya jiryatij riteda tariy siva

Davyíberya: Daryanĭ racha jĭjyū.

³⁵ Ramunĭtiy rúṭay ratarya murrayadamu:

Ne yaṇonusara jĭtanĭ jivyatābi jiryatĭy jĭjyū jĭ-intyāsĭ dañĭ.

³⁶ Ninĭ Davyíbentyi, sacasĭyadanumatirya jiryatĭy suteda Judenu sivara, sunuyada runda saraju, sadiiyada runda saraju jarye. Sumuchusada jĭta variy jĭjyebe bapyo tuunuyu, sapuyada tĭtaju jasiy. ³⁷ Tapi samĭsadedama Judenu daryaju dañĭ Jesús day, ramutimyu ne sapuyada day.

³⁸ Jiryadatya jiryedye, ratyeryiveda, nuñĭ tuchuma ranchiy: Jasidye simura juuchueda ramityadeda vujyū. ³⁹ Tĭtaju rityĭ tuvachu simu, saramityaniy ruuva tĭtaju dárya jiryatimyu ne raramityaniñuyada Muyusésibe datyadoda tĭva dárya. ⁴⁰⁻⁴¹ Jiryĭnutyata jiryevyicha jĭta darya, nutyu rityuchoda Judenuju tuchuvabe daryantĭy:

Jiryajnuy jiryē, rrachuvay, jiryatĭttara, jiryaparutay variy, nutyu ranĭ jĭta rañichaniy samirya jiryē, jiryedyiyada-jache nuñĭtay, ne jiryatuvachu tĭ tuchodamuntĭy.”

⁴² Richipyatedanumatĭy jutyeryaniĭyo vimusiy, riyasantada jĭta nada Pávurujubentyi: “Yajatyĭ niquejada ratarya jĭituyada rundamuntirya jĭrya niquejadantĭy.” ⁴³ Rityeryadanumatĭy jutyeryaniĭjomusiy, rajuu Judíyueda siityariĭjada variñada Pávurujube, Bernabéta, jiryatĭy ruteda Judíyuedayu, rijerye siityariĭjadanĭ. Nanudatyanutĭyiyada variryĭ: “Jiryantya jĭriryĭ rupiyada Judenu jantyutyadamu.”

⁴⁴ Ratarya j̄ituyada rundamuntiy, variñiday ri-intyeryadeda niȳam̄juuyu, riryatidye tuvachura Judenu niquejada varyi. ⁴⁵ Ridiyadanumatiy Judíyueda rajuu niȳam̄iva, ramuchada varyi rijechiy yinnuyadamu. Ramutiy riñiquejada riva sanijyu Pávurubay, riryavityiyeyada varyi rivantiñi. ⁴⁶ Ramun̄itiy nanuniquejada Pávurujube jichuvuyasadamu: “Munatya nañanique jiryivara Judenu niquejada, jiryatiy Judíyueda jiryedye, nutyuramura jiryaviryutya daryajura, ne jiryevyatarurya junareju jnuyada daryaju, tavañuma nañadatyanuntidye, jiryatimyu ne Judíyueda daryi. ⁴⁷ Tapi daryatya suteda Jesús nadyiva: Rabetyi sada ntyu nono rijyu, jiryatimyu ne Judíyueda daryi, riryatidye diy varyi sadimusiyy riva jantyutyada, dañuma riryecha mucadi sutyeryava.”

⁴⁸ Jiryatimyu ne Judíyueda daryi, rityuvachodanumatirya Judenu niquejada, riichanayada varyi, riichanatyadantirya saniquejada Judenuntiy. Titaju jiryatiy sabayada Judenu junareju jnuyadajuriy, riñi jita tuvachoda ramu day. ⁴⁹ Jadchiy jita rurayada Judenu niquejada titaju Pyisídiya mucadiva. ⁵⁰ Judíyueda jatachoda variryi vatuy, samirya vichavay, jiryatiy rityuvachunuyada simu Judenu daryaju. Vichada jnutyavay jarye riryatachoda, riryatidye jarupanta variñada Pávurujube, rijetyada saraju jimyucadimusiñada. ⁵¹ Nanumuchutyachedara jiñumutu juru rijyu: “¡Jiryeyasayadamundyerya!” nadayada jita varyi Icóniyumuju. ⁵² Rimechojada jita Judenu siityarivay jichanayadamu, Judenu

Jnutu muḥchadedā daryajuriy.

14

Nanuvichāda Pāvurujube Bernabéta Icóniyumu

¹ Daryaday nanujayada Judíyurveda jutyeryanijyo vimuntiy, Icóniyumu, jaryi datyasara nīday nanuniquejada jasidye, nuṭyichiy riñi tuvachoda Judíyurveda ramuntiy, nuṭyichiy, jivye jarye tuvachu jiryatimyu ne Judíyurveda daryi. ² Tavay Judíyurveda jīta, jiryatimyu ne rityuvachuruñuyada ramu, riryatachoda riy jiryatimyu ne Judíyurveda daryi, Crístumu taryivachavay jiyaroju, taji rijechipiyatadeda riyarojuntiryi. ³ Dañuma nanumachojada tarundamiy variy jasintyi, nanuniquejada jichuvuyasadamu, naniteda variy sanijyu Judenu. Niñi dityadodara mityamusiy judejada, tittasara jarye, nadani jīta niqnejada sītenura santyutyada niqnejada. ⁴ Riñantajajadama vichāda janvay variyu, tiñi niqnejada riyadaju Judíyurveda day, tiñi niqnejada nadayadaju nusuchijjuntiyidye. ⁵ Riñi jiyarododanuma rajuumusiñada Pāvurujube, Judíyurveda, japurveda ruusaju. Jasiy rivyichāda tavay, riñi javityiyeryuñuma variñada, riñi jvaryuñuma ravichuta risaju nada. ⁶ Nanudatyadanumatiy, nanubayada jīta variy jadchiy, Dísturamuju, Déribemyuju, ruroju jarye jiryatiy Dicavúniya mucadira. ⁷ Jasiy nanudatyanunuyadara samituchoda.

Rurveda ravichutani Pāvurubay Dísturamu

8 Dísturamu savichanuyada tiqui vanu, jarapuyani, rupiyasa risajuni, jiryatiy sapirutyayuma daryaju darya. 9 Satuvachoda jítara Pávurubay niquejada. Sunuyada jíta Pávurubay variy samiy sanacho: “Nini sitenu tuvachu jijechitya simu Judenu, satidye misaniy variñi.” 10 Saniquejada jaryimyusiy jasiy variy siva: “iYaraniy vase jifnumututa!” Sarayada variy jadchiy, sarupicheda jíta variy. 11 Ridiyadanumatiy Dicavúniya janvay riva, richeñeyajada jiniñiquejadamu variy: “iNanimusama jíta judenujuy vuryimu, nutyu vanujuy nanuvicha!” 12 Ruteda variñi Bernabé: Rísu, Pávuru jíta ruteda: Érmesiy ntidye jiryatiy Rísuju niqununi, tapi nivitya niqunuyada jaryi. 13 Jasiy ravichada Rísu nijyu jachipiyajo, vichada rorijyu tuunudera. Sapucheda jíta Rísu caserdóte jadchiñi voca vanumiy, sisabi jvaachara sisaju. Sapucheda rorijyu tuunujuni, jiryatiy nanuvicha jasiy. Sani jvaryuyada caserdóte, titaju nijyamitani voca, satidye jnutatya variy nadivani. 14-15 Nanutuvachodanumatiy Bernabéjube Pávurutara, riryayuma jvañi voca, varicharaju nanusetada yintedamura jichujay, nanurañuvejada variy nijyamijuu parudamu, nanusañeyajada variy jasiy: “Vaduy, çtaraju jiryevyicha darya, taraju? Nutyu darya vanujudye nañichantidye, nutyu jirye daryantiy. Samirya tuchodanacho nañinichiy jiyu day, jiryatidye paruy riva darya vichada, jiryatimyu ne samiryara, jiryatidye siityarini Judenu jnuñu variy, nitiy judejadara jarichu,

mucadi jarye, jamu nava jarye, jiryatiy t̄itaju sunderavara. ¹⁶ T̄ariy vumyunatȳi rundamu, ne subañuyada riryajisiy didyerya daryatiy rivyicharudye, jiryatimyu ne Judíyurveda daryi. ¹⁷ Sani datyadoda Judenu riy, daryatiy supasara jarichu vimusirya rumura rijyu, t̄itaju tarasiy jarye sasay variryi, rityuredaju, riryatidye poy variy riva, riichanatyada varirya.” ¹⁸ Ratiy suteda Pávurubay darya t̄itaju ruuva, pasidyera sani jachiputyaniryuyada rajisiy voca juveda riy, riñuma jnutatya nadivani.

¹⁹ Ruutijada j̄ita Judíyurveda, Antiyuquíyamusiy, Icóniyumusiy jarye, riryatachoda variryi nijyanvay. Jadchiy j̄ita ruvedani Pávurubay ravichuta, rityiicheda j̄ita variy vichadamusiñ, rityojada variy rumuni, rutamyata diñnumani. ²⁰ Riryadeda sisa datyavay variy yiro, samisasubeda variy, sajayada j̄ita variy vichadamujuntiy. Ratarimysiy j̄ita nadayada Bernabébatya Déribemyujuntiy. ²¹ Nanudatyanunuvejada jasirya samituchoda, rajuu tuvachoda variy jasiy ramu.

Nanutaryada j̄ita jadchiy, Dísturamujuntiy, Icóniyumuju jarye, Antiyuquíyamuju jaryentiy. ²² Nanujutyanutityiyada riy yimusiy datyavay, samiy nanutuchoda variy ruuva, riryatidye tuvachu variy simu Judenu. Nanutuchoda ruuvantiy: “Parucharimysiy vuryajachara ravimuju Judenu nusujyo.” ²³ Nanubatyityiyada nuñi tavichadiva variryi rimyityumiy, tuvachuvay jnutyisavajyu. Jmyichara jnuradivasiy rityuchoda sisa Judenu variy,

rivyatada variy sivara: “Yantya jnuy riñecho jivye, yimu tuvachuvay.”

Nanutaryada Pávurujube Bernabéta Antiyuquíyamuju, jiryatij Síriya mucadimura

²⁴ Nanutiryorijada jadchiy, Pyisídiya mucadimusi, Pajídiya mucadimuju. ²⁵ Jasiñuma jita nanuniquejadara Judenu niquejada Pérquemyuntiy, jadchiy jita nanimusajayada Atádiyamujuntiy. ²⁶ Jadchiy jita nadayada jaava Antiyuquíyamujuntiy, jadchityi nanumutijada munatyantiy. Nanucašiyadama daryaju darya yivaayada day, ramutiy rupajada Jesúsnu tuvachuvay nada, Judenu jmutyadata. ²⁷ Naditojadanumatiy, nanintyeryaniñuvejada variryi nijyamijuu jasiy, nanutuchodaju: “Nurya savichadede Judenu riy nijyanvay nadyimusiy.” Nanutuchoda jita variy jadchintiy: “Judenu mutta rijyura tuvachoda, jiryatimyu ne Judíyurveda daryi, riryatidye tuvachu variy simuntidye.” ²⁸ Jasiy nanumachojada taripyu saraju ruusa Jesúsnu tuvachuvay.

15

Riintyeryadeda Jesús nusuvyevyedabay Jerusarímuy

¹ Jadchiy jita rumusajayada tavay Judéyamusi, ridyetyadoda variryi jityeryiveda Crístumu: “Netimyu ne jiryajmutyonutaniyu, nutyu sadatyanunuyada Muyusésibe, ne vanay ti rajantuy variy jiryiva.” ² Ramunítij nanujotada niquettada Pávurujube Bernabéta variryi, ne rijechipiyaruyada tara varidye. Paricheñuma

ribeyadani Pávurubay, Bernabébatya, tavay jarye nadisaju, riryatidye jasumiy variy nusuchavamyuju, rimyityumimiyuju jarye, Jerusarimu: “Jiryajnuj, nutyura riryajtay variy ranchiy, nutyura.”

³ Rupajada jita Jesúsmu tuvachuvay jadchiryi, rityiryorijada jitará Venísiya mucadi, Samáriya mucadi jarye, rityuchutityiyada jiryupiyadamu ruuva nijyanvaryá vadi tuchoda: “Muvyeñintimyu ne Judíyúveda, ripyarumya riva jiyuuchúveda, riryatidye siityari variñi Judenu.” Riichanayada Crístumu taryivachavay variy vadi tuchodanchiy. ⁴ Ruutojadanumatij Jerusarimu, ridyirvejada samirya jasiryi Jesúsmu tuvachuvay, sansuvye jarye, rimyityumiy jaryentiy. Jasiy rityuchunuvejada variy ruuvara, titaju jiryatij savichadeda Judenu ruumusiy nijyanvay cabyimura. ⁵ Jasidye riñubesubeda Varyisévúveda tevay Jesúsmu tuvachuvay; rúteda variy: “Vuryajmutyonutaniryi, vuryadatyanu variryi, riryatidye jtotanirya Muyusésibe datyadoda.”

⁶ Jadchij jita riñatutyadeda nusuchavaryi nijyanvay, rimyityumiy jarye, tuchujomuju, riryatidye tuchu samiy variy jasiy ridyetyadaju. ⁷ Riñiquettamuyadanumatiyu, sanubesubeda jita Pyítrubay variy: “Vaduy, ratyeryiveda, jiryedyetyisatya sajaryetada Judenu jiryequibyimusirye, jiryatimyu ne Judíyúveda daryi, riñi tuvachura samituchoda ritosiy, riryatidye tuvachu variy simu. ⁸ Judenu nitij datyara vujechiy, sadityadoda samiy vudyetyadaju vuy, sumutyantiryi, jiryatij sasayada Yintu

variryi, nūtyu vūtyi sasayada daryantiy. ⁹ Ne savatāda Jūdenu jaryi ruumusidyevyuy, tapi sapūmya rijechivyasirya jijyuuchuedantidye, jiryatiy rityuvachuma daryaju simuday. ¹⁰ ¿Nūtyuramumuy ne jiryetyuvachuruy simu day, nūtyuramu? nūtyu sani jantyuryūdye Jūdenu ruuvantiy. ¿Tarajura jiryeberyuy datyadoda rijyu day, taraju? Ne jiryinuy tariy vūmyunatyavay rañi bayada daryaju datyadoda, nujyuntiy, jiryatimyu ne nujchideda rajuyu. ¹¹ Nūtyu santyuy Jesús vuryivantidye, jiryatiy vūtyuvachu daryaju simu, daryaday ranicha rijyuntidye.”

¹² Rindasada jita nijyanvay variy, rityuvachoda jita variy nadimu Bernabéjube, Pávuruta, jiryatiy nanutuchoda daryaju ruuva. Nanutuchoda ruuvara mityamusiy judejada, tittasara jarye, jiryatiy sivaayada Jūdenu nadimusiy rijyura, jiryatimyu ne Judíyueda daryi. ¹³⁻¹⁴ Nanundasadanumatiy, sanubesubeda jita Santiyácubay variy: “Vaduy, ratyeryiveda, jiryatuvachu rimu. Sani tuchuma Siimyó Pyítru vuryiva, rattaday samuti Jūdenu ruumu, jiryatimyu ne Judíyueda daryi, santyutyadamuju; sajaryetada variy riquebyivasiy jichiityarjiasiju. ¹⁵ Daryani rani nique jirya niquejadantiy, Jūdenuju tuchuvabe niquejada, jiryatiy nuchara daryajura:

¹⁶⁻¹⁸ Rivasiy jita rajatyi ratyadodantirya Davyíbe vichadantiy, (jiryatiy vuryitay Jūdenumu tuvachuvaryi Judíyueda) jiryatiy juuyara daryajura. Vadira-

musiñuma raratyadosumintyirya jiryatiy rajuyajada, rajdutyara, riryatidye vata tavay nijyanvay rañecho variy, titaju nijyanvay rityi tuvachu rityamu. Darya niday suteda Judenu, nitiy jvaarya; sani dityanujajada jvadicharantirya.

¹⁹ Ramunitiy rajechipiya ne vuryajasachu rijyura paruchariy, jiryatimyu ne Judiyuveda daryi, riñuma janumitye variy susiyu Judenu.

²⁰ Vuryanurya catera vuryatidye jpa ruumura. Vuryajtay ramu catera: Ne jiryajvaarya sasaviy jiryatiy runtatya tavay jiipu tera jvaachimura, ne jiryajvaañada jiryatimyu ne jiryevyaturuñada day; ne jiryejmyirya sasaviy jiryatiy mudchichara sapitasa, dantyamuy ne jiryejmyirya sasaviy nudatara. ²¹ Ne yinuy tariy vichada ne suteryuy titaju vichadiva nitiy datyadodara Muyusésibe datyadoda. Dantyamuy ne jutyeryanijyomu rasutye titaju jütuyada rundamu riñiquettadara Muyusésibe datyadoda caterava.”

²² Jadchiy jita Jesús nusuvye, rimyityumiy jarye simu tuvachuvay, rijechipiyajada variy: “Vuryajaryeta vuquebyimusiy danujuy vanujuy, vuryatidye jpa Pávurujuyjsa nada, Antiyuquíyamuju.” Rijeryetada jitani Judasiy jiryatiy sityantiy Barsábasiy, Sídasíy jarye sisaju. Nada niday vichada rajotya vatasanujyuy, Jesúsmu tuvachuvay cabyimu. ²³ Nadimu niday rupajadara catera nuchara. Jasiy ruteda catera nucharamu: “Nuy Jesús nusuvye, rimyityumiy jarye, numyuchuvay jiryevyaturuñada, jiryatimyu ne Judiyuveda jiryedye, jiryatiy Antiyuquíyamu vichavay jiryedye, Síriya

mucadimu vichavay jarye, Sidísiya mucadimu vichavay jaryentiy. ²⁴ Nudyetyati riyama vaduy jiyusiy riryatidye jarupantanuve jiryentyi, riryatidye jatachu rajisiy jiryejehchipiyajadayu. Tama nuñi jpasidyeryi, tama. ²⁵ Ramunítiiy nujehchipiyasiy jaryetada jiyusiy nutye, nuñatidye jpa jiryimu nada Judásijyuy Sídasitya, vuvyatabi Bernabéjyjsa, Pávuruta. ²⁶ Nada day jiyatara jidyiyada Vuntyityu Jesucristu jtya vatasadamu day. ²⁷ Ramunítiiy nuñi jpani Judásiy, Sídasitya, nadatidye ratuchura daryaday rani nique cateramuntiy. ²⁸ Tapi nutyu Judenu Jnutumusiy nujehchipiyajasiy nudye: Ne dyetya nuñabay tara jvaatyadeda niquejada jiryejyunuday, nutyu vinu rani ranicha jaryi vatasara. ²⁹ Ne jiryejmyirya jiryatiy runtatya tavay jiipu tera jvaachimura; dantyamuy ne sasaviy nudatara; dantyamuy ne jiryatiy mudchichara sapitasantiy, dantyamuy ne jiryajvaañada jiryatimyu ne jiryevyaturuñada day. Jiryetyi bay samiy jiryivara, ne jiryecha tara nta variñuday. Samiy racha jiryeyadaju.”

³⁰ Rupajadanumatiiy jadchiryi, rumusajayada Antiyuquiyamuju, riintyeryaniñuvejada variryi nijyamijuu variy jasiy, richeñuvejada varirya catera nuchara. ³¹ Runuyadanumatiiy ramu catera nuchara, riichanayada variy, mityavaju rijehchipiyajada variy. ³² Jadchiiy jita Judásibe, Sídasibe jarye, nada niday vichada Judenuju tuchujuy, rajuura niquejadamusiy nanuniradoda riy jityeryiveda, nanuvanutyadeda risaju riy. ³³ Taripyunumatiiy nanuvichada jasiy, ruutajadoda jita variy siityarivajyuu nada:

“¿Sanutaryaruñumaviy?” riñi taryatadedada jita variy jadchiy nanibivajuntiyu, jadchityi rupajada nada. ³⁴ Sídasibe jita maçhojada jasiy, vinu Judásibeñuma taryada. ³⁵ Pávurubay jarye maçhojada variy jasiy. Bernabébatya nanudatyadodara samituchoda, nanutuchodara Judenu niqejada variy jasiy, rajuumusiy rityuchunuyada jasirya.

Pávurubay jotada tuchunumayajada darajuyju

³⁶ Tarundamu suteda Pávurubay siva Bernabébay: “Vañú, vuryajañuy vutyeryivedamuntiy, titaju vichađiva jasityi vutyuchodara Judenu niqejada, vuryajnuy nutyuranuma riñichasara, nutyura.” ³⁷ Jadchiy jita sani jararyuyada Bernabébañi Juánbay, ravichada sitya taryara Márcu. ³⁸ Sumutyajada jita Pávurubañi: “Tama rararyuy ntate nundyeni, tama, chi jtedamutiy sajiintyetyi vuryisasy Pajidiya mucadimusiy. Tama sayada jadchiy vuryisa jvaayadanacho nuday, tama.” ³⁹ Ne nanujachipiyaruyada nta varidye. Pariche sajiintye Bernabébay sisasy, saracheda jita variñi Márcubay, Chipyirye ratyuumuju. ⁴⁰ Sajaryetada jita Pávurubay variñi Sídasibe, nadayada jita varintyidye. Nanutaryiveda jachiñuyada variy siva Judenu nadayadaju: “Yinutyata samiy nanunacho.” ⁴¹ Jadchiy jita nanutiryorjadara Síriya mucadi, Sidisiya mucadi jarye, nanuvanutyanyityiyada riy Jesúsnu tuvachuvajyuu.

16

Timutévubay jiyada nadisa Pávurujube, Sídasitya

¹ Naditojada jita Déribemyu variy, Dísturamu jarye. Jasiy savichada tiq̄ui Jesús̄mu tuvachubay, ravichada s̄itya Timutévu. Sunoda vichada Judíyutoda, Jesús̄mu tuvachunuy, sajay jitamuy ne vichada Judíyu day. Rutañuyada jita variñi: “Nini jita sitenu samirya jvadichi.”
² Darya ruteda Crístumu taryivachavay rityi vichanuyada Dísturamu, Icóniyumu jarye.
³ Savaṭada jita Pávurubañi Timutévubay: “Yejiya risa.” Saracheda jita variñi, sumutyonutadeda variñi, riryatidye jmutya jasiy vichavay Judíyurveda variñi, ridyetyisatya ne Judíyu savichanuyada sajadye. ⁴ Riryamiryijadamu, jityuchutityiyada vichadivara nusuchavay jteda, jiryatiy rijechipityada rimyityumitya Jerusarímura, riryatidye tuvachu nijyanvay variy ramu. ⁵ Ramun̄it̄iy rivyanutyada Jesús̄mu tuvachuvajyuu variyu, riryasajeyajada sanijyanvajyuu variy.

Pávurubay diyada mityamusiy siva Masedóniya mucadimu vichi

⁶ Rityiryorijadanumatirya Vuryíjiya mucadi, Cadásiya mucadi jarye, Judenu Jnutu jubayadara Judenu niquejada tuchoda Ásiya mucadimu.
⁷ Jadchiy jita ruutojada Myísiya mucadi tuvarya, riñi jachipiyajada jiyada Bitíniya mucadimujuntiy. Ne sajatyaniryuyada Jesús̄ Jnutu rumu riy.
⁸ Riryamiryit̄ityiyada Myísiya mucadimuju variy, rumusajayada jita variy jadchiy, Trúvasimyuju.
⁹ Nuporatasa jita mityamusiy sadiyada Pávurubay siva tiq̄ui vanu Masedóniya jami, saradeda satuunu, sayasantada variñi Pávuru: “Jiyuju

yaramityeryi Masedóniya mucadimuju, yatidye jmuṭya jiyu nuṽ.” ¹⁰ Sadiyadanumatyí Pávuru siva, varicharaju nuṽyatada ranacho cartye nuryamityejoyu, nuñatidye ramitye Masedóniya mucadimuju ravimu. “Temusiy Judenu dyetya natuvyuy, vuryatidye datyanu variy samituchodata jasiryi.”

Nanujañuyada Pávurujube, Sídasitya, Vidíposimyu

¹¹ Jadchiy jita nuryamityeryi Trúvasimyusiy, vaseni nuryamityetyityiyada Samotrásiya ratyuumuju, ratarya rundamu nuryamityedantiy nuñatidye jto Neyápodisimyuntiy. ¹² Jadchiy jita nuḍyeyantiy Vidíposimyuju, jaryi jamu vichadamujunuma jita, jiryatiy Masedóniya mucadimu darya. Róma janvay judejadara vichada jasiy. Jiryá vichadamu nuṽvichada rajuu rundamiy. ¹³ Jiituyada rundamu nuḍyeyada vichadamusiy, jamumu jiinijyu, jiryatiy riñi jteda: “Jasiñi dyetya sajityeryaniy nijyami rajuu, jasityi riñi jtay yatuchu sisa Judenu.” Numyasanuvejada jita jasiy, nuñatidye tuchu vatuyjsa, jiryatiy riintyeryadeda jasiyu. ¹⁴ Tanuqui vaturuy tuvachoda ruumu, ravichada nanitya Dídiya. Nada niḍay vichanuyada sujay vucudijay taryutyanyuy. Nadani vichada Tiyatíra jamunuy. Nadani tuvachunuyada simu Judenu, samuttada daryajura nanujachiy, nanatidye tuvachu ramu saniquejada Pávuru. ¹⁵ Jiryatiy rivyichanuyada nanurorimyu vichavay, riñiday jtyuyada vatajuu nadisa. Jasiñi jita nadayasantada variy nuṽ: “Jiryatiy jiryinuyada rachiitaryi samiñi Judenu, jiyuni jiryajti

raryorimyu munatya.” Nanumachotadedada variy jasiy nuy.

¹⁶ Tarundamu nudyeeyada rumu jasityirya Judenujsa tuchujo; jasiy sasaryeda tiqui muchechityu nuy, savichanuyada bayantu siva, mityamusiy datyadaju. Ramunıtiy sacanayadara rajuura criquiy jipyatruvedaju, mityamusiy datyada murichirya. ¹⁷ Sasiityarijada variñi Pávuru, nujerye, saniquetityiyada variy jaryi: “Jivyetyiryi vaduy, Judenu navay vichi muchechimyidye! Riñuma riñicha tuchuvay, jiryatıy rityuchura Judenu nú, jantyutyada nú.”

¹⁸ Nuñi darya nıday savichadedada rajuu runda saraju nuy. Paricheñuma saniquettada Pávurura. Sanumityeda jıta variy Pávuru, suteda jıta siva bayantu: “Rıtay Jesucristu jtyamu yiva: ¡Yanuma jiya sivasıy!” Varicharaju sayada bayantu variy muchechityuvasiy.

¹⁹ Ridiyadanumatıy sapatruveda riva daryá, ruteda variy: “¿Nutyichiñuma vuryacanarya criquintıy, nutyichiy?” Rureda jıta variñi Pávuru, Sıdasıy jarye, rityiicheda jıta pudásamuju variñada, japuvedamuju. ²⁰ Jadchıy jıta richeñuvejada japuveda variñada, jasiy ruteda variy ruuva: “Jiñujuy Judıyujuy, nadanı jatachunumaya rıy nijyanvay. ²¹ Nanudatyanunumayara paruchariy nacho tuvachusara; tapi vuy daryaju Róma janvadye, ramutımyu ne vuryımutyarudyerya.”

²² Riñiqueyada jıta nijyamıjuu variy nadısa, richıpyatada japuvedara nanusujay yivasıy, rımyusıyetyadeda jııııvusetavay variñada.

²³ Rajuuranumatıy rımyuseda nada, rıjehoda

jīta variy nupocu rorivyimu nadantiy. Ruteda jīta siva nupocu roriy jnutyi: “Yinutyata samiy nanunachō jiyu.”²⁴ Jiryatiy ruteda daryaju sivara, ramunītiy sītyejada jaryi ravimuju nada, satanuvūdoda varirya nanunumutu, tanuvūnutata.

²⁵ Nuporatanuma nanutuchoda Pávurujuy sisa Judenu, nanumurrayada variy jichanayadamu Judenu nijyu. Jiryatiy tanuvūnusavantidyeryi, riñi jnyuada variy nanunachō. ²⁶ Mityamusiy ramichutyesubeda mucadi, ramichutyajajada varirya ravichu teramusiy jvaachara nupocu roriy. Ramuttamyuyada variy rorijyu, rarotyetyimyya variy cadyidyajuu tītaju riñumutuvasiy tanuvūnusavay. ²⁷ Sīdyojada jīta nupocu roriy jnutyi, sunuyada jīta muttaryanuma tītajura rorijyuvicha, varicharaju saryedara jichityitya, sani jteda yejichityi ratayu, suteda daryaju: “Ribemyyya tanuvūnusavay tītaju.” ²⁸ Saniquejasubeda jīta Pávuru jaryi variy: “¡Ne yechaniy tara ji! ¡Tama taji nuñicha tītaju jiyu!” ²⁹ Savatada jīta jnutyira nonosiiy variy, sajayada jīta siiyadamu variy ravimu. Sarañuvejada variy nanutuunu jimyichutyedanube. ³⁰ Sasipyatada variy bimuju nada, suteda jīta variy jasiy nadiva: “Nutyityu, ¿Nutyura račanirye, nutyura? ratidye ramityaniy variy rivara.” ³¹ Naniteda jīta variy jasiy siva: “Yatuvachu simu Nutyityu Jesús varityi raramiy yiva, tītaju jiryorimyu vichavavya jarye yisaju.”

³² Nanuniquejada jītara Judenu niquejada variy jasiy siva, sarorimyu vichavavya jarye. ³³ Variy

nupora day saracheda nadantiy, sasuuṭada varirya nanuvatajō. Varicharaju sityuyada, titaju sarorimyu vichavay jarye yisaju. ³⁴ Jadchiy jita sasumideda jiryorivyimuju nada, sapotyadede jmyicharata variy jasiñada. Sichanayada jita variy jiryorimyu vichavatya, jiryatiy rityuvachu daryaju simu Judenu.

³⁵ Jnaryanumaty ravichada, rupajada jita japuveda variryi jiivusetavay nupocu roriy jnutyimu, ruteda jita variy jasiy siva: “Yanuma jmurya nada day.” ³⁶ Satuchoda jita nupocu roriy jnutyi siva Pávuru: “Rupama japuveda sadimura jiñiquejada: Sananuma sipyatay, sanajiya samiry variy.” ³⁷ Suteda jita Pávuru variy ruuva jiivusetavay: “Nijyanvay diyada jache rinyusiyeje nadyiva, tama riñi jtajanu munatya riva tuchoda didye, tama, dañuma nañicha Róma jamijuy. Riityejay nupocu rorivyimu nantyi. Ramutiy rijetyary nay, tama riñi datya nijyanvay nadyidye. ¡Tama darya ranicha, tama! ¡Riñuma rajmurya nadye!” ³⁸ Rityuchoda jita jiivusetavay ruuva japuvedara nanuniquejada. Rityuvachodanumaty: “Nada niday Róma jamijuy,” richuvuyada variy. ³⁹ Riyada jita japuveda variy nupocu rorivyimu nadimu, rutañuejada variy nadiva: “Ne sanajtay tara, ne nudyetyadamu jibeje nupocu rorivyimu sada.” Richipyatada jita variy jadchiñada, riyasantada variñadantiy: “Sanajiya nuvyichadamusiy.” ⁴⁰ Nanusipyateda jita variy jadchiy rivasiy, nadayada jita variy Dídiyajuy rorimuju. Nanudiyadanumaty ruuva

jityeryiveda, nanujachipiyatadeda siityarijada
Judenu variryi, nadayada jita varyi.

17

*Riñiqueyada nijyanvajyuubay tavay
jatachodamusiy, Tesadónicamu*

¹ Nanuramiryijada riva Anjípodisiy, Apodóniya jarye, naditojada Tesadónicamuntiy, ravichanuyada Judíyurveda jutyeryanijyo jasiy.

² Savichechínuma Pávuru daryaju dayu, sajañuvejada jasiy ravimu jutyeryanijyo. Mumuri jütuyada runda saraju saniquettada Judíyurvedata riva catera nucharayu. ³ Sani datyadoda jita Pávururiy, sani dityadoda risajuriy: “Jiryatiy Judenu jaryetini, separutyadamusiy jiryi misa pariche jidyiyadamusiy. Nini Jesús jiryatiy rañi tuchu sanchiy jiryiva, nini Judenu jaryeti sanicha.”

⁴ Tavañi tuvachoda ramu day, riintyeryadeda jita varyi nadimu Pávurujuyu. Daryaday jiryatimyu ne Judíyurveda rivyichada day, jiryatiy rityuvachoda daryaju simu Judenu, jadchintyi rivyichada matyodaveda ruusa.

⁵ Judíyurveda jita jnunytya varyi siva Pávurura, rijeryetada jita riy vacha vichavay, jiryatiy vacha rivyichanumucha jasiy. Riintyeryadeda riy nijyanvay ruusaju, riryatidye sañeya varyi rajuumusiy. Rata niday riryatachoda variryi vichada janvay. Richiijeñuvejada jita nijyamijuu Jasó rorimyu, riñi jteda yasipyata nada Pávurujuy jadchiy, riñi jteda yasay nijyamijuumu variñada.

⁶ Ne ridyiñuvejada jasiy nadiva, ninuma Jasó jtyati rityiicheda varyi nanumiryadamu, sataryiveda

jarye. Rutoda jita japumujuriy. Richeñeyajada variy rimyomusiy: “Nada niday vanujuy jaryenunumayara niquejada titaju vichadiva, naditima jiyu jiry vichadamuntiy, Jasó rorimyu nanumachonuvintiy. ⁷ Riñi jivye vaduy jarupanura Róma jamu nutyityu datyadoda, ¿nutyu riñi jtay, nutyu? Jasiñi jamu nutyityuntiy, jiryatiy Jesús jtyatini.” ⁸ Rityuvachodanumatiy nijyamijuura, japuveda jarye, riryatachoda variyu. ⁹ Rimechotadeda jitara Jasóveda barya, riryatidye tarya variy ranachontiy. Rumuryada jita variryi.

Nanujañuyada Pávurujube Sídasitya Beréyamu

¹⁰ Variy nupora day rupajada nanutaryiveda Pávurujuy, Beréyamujuy. Naditojadanumatiy nadayada variy Judíyueda jutyeryanijyomuju. ¹¹ Jasiñi jita riñicha Judíyueda samirya vichavay rumusiy, Tesadónica janvay Judíyuedamusiy; samirya rumutyajada daryajura niquejada day. Titaju rundamu riñi vatada ranacho sadatyadoda nuchara: “Vuryajnuj sitenuniviy jiryatiy sutay darya.” ¹² Rajuu rañi tuvachoda ramu, jivye jarye, jiryatimyu ne Judíyueda daryi, jadchiy jita rivyichada matyodavedantiy, rajuu vanujuu jarye. ¹³ Rityuvachoda jita Tesadónicamu vichavay Judíyueda: “Muy sadatyanu Pávurura Judenu niquejada Beréyamuntiy,” riyada variy rumuntidye riryatidye jatachu riy nijyanvay variy jasiy, riryatidye niquettaniy varintyiryi. ¹⁴ Jadchiy jita rupajada sataryiveda Pávuruyu, jamu nava jiinijyu. Vinu Sídasiy, Timutévuta nanumachojada jasiy, Beréyamu.

15 Rityi jnutyanyuyadani Pávuru, riyatada jita jadchiy Aténasimyujuni. Supajada jita Pávurura jiñiquejada variy nadimuntiy, Sídasijyummyuntiy: “Varenunuma sanajniy rimuju.”

Savichada Pávurubay Aténasimyu

16 Jasiy sani nutuyada variñada Aténasimyu, paruchariy savichada suntu variy simusiy jasiy vichadamu, jiryatiy sadiyada daryaju siva rajuu ravichu tera jvaachi, satuvicha. 17 Ramunítiiy saniquettada Pávururiy Judíyurveda ravimu jutyeryanijyo, jivyetya jarye jiryatiy riñi tuvachu simu Judenu. Titaju rundamu saniquettanuyada riy jasiy vichavay, jmyichara taryutyajomu. 18 Jadchiy jita riñiquétada jaryi datyavañi, tini datyanunuyada darya Epicurévurveda datyadoda day, ti niday datyanunuyadantidyerya Estóvicurveda datyadodantidye. Tini jteda darya sanijyu day: “¿Tara sani jtay jiñique jiñu tuchodacanuy, tara?” Tini jtedantidye: “Nutyu ninuma tavichada jamí judenu, sani jatichetyanidyeyu.” Darya niday ruteda variy, jiryatiy Pávuru datyadoda daryajura samituchoda Jesúsniy, samisasubedanchiy jarye. 19 Riryaracheda jita jadchiy jutyeryanijyomujuni, jasityi sadatyanu riy. Ruteda jita variy jasiy siva: “¿Vanay datyasaravidye ranicha jiryatiy jidyetyanu vadirara? 20 Jiryatiy yitay taji nta, ne nutyuvachu tariy daryaday. Nudyetyarurya nutyura ranique jirya day, nutyura.” 21 Jiryatiy jasiy vichavadyeryi, Aténasiy janvay, taji vichada janvay jarye, jiryatiy rimechojada taripyuju jasiy ruusantiy, ne ruuvaañuyada tara ranchiy. Vadi

tuchodanachō rityuvachunuyada daryaju day, rityuchutityiyada varirya, rityuvachoda variy risaju darya.

²² Saradeda jita Pávuru jutyeryaniyyojache variy, suteda variy ruuva: “Vaduy, jiryatiy Aténasiy janvay jirye, nutyu rinuy, jaryiñumate jiryeñi jachipiya sanijyu satu day. ²³ Rajeñuji radiñumaya siva satuvicha, jiñunijyu vitya jiryejehipiyasara day, jiñunijyu. Jadchiy jita radyi riva saroriy satuntiy, jasiy radyi riva niqejada nuchara variy raniy: Ne nudyetyadani judenu day. Ray jita radatyanu Judenu sitenu jirye, dajitya jiryetyuvachunumaya jidyetyisadamu simu satu. ²⁴ Judenu, nitiy judejadara mucadi, titaju jiryatiy mucadivara, ne savichasara Judenu jirya rorimyu day, jiryatiy sivaay nijyamī sajura, tapi nitya Nutyityu jarichumu day, mucadimu jarye. ²⁵ Dantyamuy ne savata sasay nijyamī tarayu; ninī jita sadyerya vuryinuyada day, vuñeryeyajada jarye, titaju jiryatiy vuryimura. ²⁶⁻²⁷ Tiqui nijyamimusiy sundejada Judenu riy titaju jaryedo nijyamī, rityidye rachasara titaju mucadiva. Ninī bayada titaju nijyamijura jiryunda, rivyichajo jarye, riryatidye vata sanachō Judenu mityajisiy, riñiyaresiy jivyatanumaya variy sanachō. Ripyaniviy sitenu sanicha Judenu vuryajisiy. ²⁸ Sutedamuju vuryinujeyasara, vuchiquityajantiy, vuvyichasarantiy. Daryani suteda jasidyeñi murrayada datyi jiryetyenu: Vuy jita Judenu dadyeñu day. ²⁹ Jiryatiy Judenu dadyeñu vuy ¿nutyichitya vuryajachipiya Judenunchiy óruterā jvaachi nijyu day, nutyichiy?

dantyamuy ne pupadatyera jvaachi nijyu, dantyamuy ne ravichutera jvaachi nijyu, jiryatij sivaay vanu jidyetyadatara, sajachipiyajadata jarye. ³⁰ Tama sani baya Judenu riñijyu nijyanvarya jiryatimyu ne ridyetyanuyada varyi didyerya, tama. Diye jita sutay Judenu ruuva nijyanvay: Jiryaparuy riva vacha jachipiyajada, jiryatidye siityari varirye. Daryani sutay Judenu titaju nijyamiju, titaju mucadiva vichavajyu. ³¹ Sabamya Judenu daryajura tarundaqui jityaju day, satidye dityanu riy nijyanvay chira rachajayasara tanuvunusi, chi; chira rachajayasara risajuntiy, chi. Sajaryetimu yadityanu vasera. Samisadede diibyimusini jiyetye, riryatidye datya titaju nijyanvay varyi sitenuni sacha.”

³² Rityuvachodanumatij nijyanvay jiryatij samisadede diibyimusini Jesus, tini todiyeyada mitya raniyare day, tini jteda tajintyidye: “Tarundamu nuñajatyi tuvachodantirya darya niquejadantiy.” ³³ Ramunitij sasipyateda Pávuru varyi riquebyimusi. ³⁴ Tavay nijyanvay jutyeryadede simu Pávuruyu, rityuvachoda jita varyi simu Judenu. Jiryatij rityuvachoda simu, ravichada sitya rityenu Diyunisiyu, Areyopacu jami, tanuqui vaturuy jarye, jiryatij nanitya Damarisa, tijuunuma varyi ruusaju day.

18

Savichada Pávurubay Coríntyumu

¹ Jadchij jita rivasiy sayada Pávuru Aténasimusi, Coríntyumuju. ² Jasiñi

sasaryeñuvejadani tiqui Judíyu, ravichada sítya Aquídyá, Póntu mucadi jamí. Ne tariy jtínu Itádiya mucadimusi variy didyeñi, savatura Prísídyá jtyatíta. Títaju mucadi jamu nutyityu, jiryatiy Cadávuryu sítya, sutedamu niday: “Títaju Judíyuveda rasipyatay ramusi Róma vichada.” Ramunítíy nanusipyateda jadchíy savaturata. Satuudiyada jíta Pávuru variñada. ³ Ní jarye, daryaday sanichadantiy nutyu Pávuru daryantiy, donajay roriy juvaañu. Samachojada jíta Pávuru rivaachadani variy jasiy nanurorimyu. ⁴ Títaju jítuyada rundamu saniquettada juteryaniyomú riy Judíyuveda, jivyentyi jiryatimyu ne Judíyuveda daryi, satidye jachipiyataniy vadi tuchodaniyju varidyeri.

⁵ Naditijadanumatiy Sídasijyuy Masedóniya mucadimusi, sajotada datyadoda Pávuru varirya Judenu niquejada vaníramusi, ne saparuryuyada variy rivanuday. Satuchoda jíta Judíyuvedava sanchiy Jesús: “Níñi sanicha Judenu jaryeti.” ⁶ Saniquettadeda variy jiyaroju riy Judíyuveda, riryavityiyeyada variñi Pávuru. Samuchutyajajadara jichujay variy riñechoju, suteda jíta variy ruuva: “Jiryedye jiyasanu dayu, nutyichitya ti rajantyuy jiryiva, nutyichiy. Ne jiyasachi jiryepyarutadamusi nundyerye. Diye rundamusiy rajiya tavamyuju, jiryatimyu ne Judíyuveda daryi.” ⁷ Sayada jíta jadchíy, sajañuvejada tiqui vanu rorimyu, ravichada sítya Tísiyu Jústu, jiryatiy satuvachunuyada simu Judenu day. Saroriy jíta jatyada juteryaniyoni. ⁸ Jadchíy jíta savichanuyada Crispí, juteryaniyjo

janvay nutyityu. Ninī tuvachunuyada simu Judenu, titaju sisa vichavatya. Rityuvachunuyada jita rajuu Corintyu janvay variy ranacho Judenu niquejada, riityuyada jita variy jasiy. ⁹ Saniquejada jita Judenu variy siva Pávuru nupora, sunuyada cabyiva. Suteda jita variy sivantiy: “Ne yasuvuy, yani nique jichuvuyasadamu. ¹⁰ Tapi yinuy yisa ray, nutyichitya ti rapanaryi jiñiy, riryiñuma jarupanu variy ji. Tiquitya yinuy ratuvachu jiyu vichavay rimu.” ¹¹ Samachojada jita variy jasiy, taraqui vaata saraju, tiquinijyate jarimyuni ranchaju, jiryatiy sadatyanunuyadara Judenu niquejada vichada cabyimu.

¹²⁻¹³ Savichadanumatiy Caryubay purijityu Acaya mucadimu, riryatachoda jita Judiyuveda variy sayaroju Pávuruyu, rutoda jita variy purijityumujuni, rityuchutadaju: “Ninī jatachusara riy nijyanvay, satidye jachipiyataniy sanijyu Judenu riy, tama darya ranicha vudyetyadoda day, tama.” ¹⁴ Sani niqueruyadanumatiy Pávuru variy, sumutyajada purijityu varenu variryi Judiyuveda: “Tarajutiy jiryetyuchutaruyu, varimyata jiryetyi jvayu, raryi tuvachura jiry niquejada, Judiyuveda. ¹⁵ Nutyu jiryeniquestadanchidye ranicha day, jiryatiy jiry niquera sitya, nutyu jiryedyetyadoda taranchidye ranicha day, jiryama jdutya nuñi jiryedyerya. Ne rimutyaryuy ridutyadajura jiryetyuchutada day, mitya.” ¹⁶ Supajada jita variy jadchiryi. ¹⁷ Rureda jita nijyanvay variy jasiñi Sóstenes jtyati, jutyeryanijyo nutyityu, ruvatyiyada variy

Caryú diyani. Ne sadatyaruyada Caryú variy tara ranchidye, mitya.

Sataryada Pávurubay Antiyuquíyamuju, sajotada tuchunumayajada mumuriju

¹⁸ Jadchiy jita samachojada Pávuru tarundamicharaju jasiy. Jadchiy jita sayada, satuchucheda variy ruuva jityeryiveda Crístumu, sayada variy jaava Síriya mucadimuju, saracheda variy yisaju nada Prísida, Aquidyata. Sencréyamu sapatyaniñuejadara yinojasiy, sitotadeda daryajura yiteda saju Judenu.

¹⁹ Ruutojadanumatiy Evésumu, sajiintyeñuejada Pávuru variy nadisasiy, sajayada jita variy jutyeryanijyovimu, riñiquettada Judíyuedata variy jasiyu. ²⁰ Riyasantada variy jasiñi: “Yamacho jiyu taripyu saraju nudisa.” “Ne vanay nta ramecho.”

²¹⁻²² Jadchiy jita satuchucheda variy ruuvantiy: “savatatiy Judenu raday tarya jiryimujuntiy.” Sayada jita jaava jadchintiyi, Evésumusiy, sumusanuejada Sesaréyamu. Sasubeda jita jadchiy Jerusarimuju, jasiy samuchuvañuejada riy Judenumu tuvachuvajyuu, sumusada jita jadchintiyi Antiyuquíyamuju. ²³ Savichadanumatiy taripyu jasiy, sayada jita jadchiy vichadivaju, Cadásiya mucadimu, Vuryíjiya mucadimu jarye, satidye vanutyanyiryi Jesúsnu tuvachuvay titaju.

Sadatyadoda Apódosibe Evésumu

²⁴ Sitijada tiqui Judíyu, Apódosiy jtyati Evésumu, jiryatiy Adejántriyamu rupini. Nini jita vichada vanu samiy datyara, samiy saniquenuyada risaju. Savichada jaryi vanurya Judenu

niqejada datyadodaju. ²⁵ Nini jita samiy datyanusi risaju satidye siityari samiy varirya Judenu nú. Jaryi vaniri daryajuni suntu, sadatyanuyada variy vase saniyyu Jesús. Vinu raniday Juán Bautístabay jtyadoda sadatyada day. ²⁶ Nini jita jotada niqejada jichuvuyasadamu, jutyeryaniyyovimu. Nanutuvachodanumatiy Prísidyajuy, Aquídyatara saniquejada, nanaracheda jitaní, nanudatyadoda jita variñi, samidye sadatyadajura Judenu siityarisada. ²⁷ Sani jiyaruyadanumatiy Apódosiy jadchiy Acáya mucadimuju, sataryiveda nuyada variy jiyura catera, riryatidye jmutya Judenu siityarivay samiy variy rumuni, rumutyada variy ratani. Sitojadanumatiy Acáyamu, sumutyanyuejada variy jasiryi Judenu siityarivavyeda jiryatiy rityuvachodama simu Jesús, jiryatiy santyutyada daryajuriy. ²⁸ Nijyamijuu diya sandasadede Apódosiryi Judíyurveda jiñiquejadata, sani datyadoda Judenu niqejadata riy: “Nini Jesús sanicha Judenu jaryeti.”

19

Pávurubay vichada Evésumu

¹ Jasityidye savichada Apódosiy Coríntyumu varidye, saramicharijadama Pávuru varidyerya jamu musidye. Sitojada jita variy Evésumu day. Jasiy sadiñuejada ruuva tavay Jesúsnu tuvachuvay. ² Suteda jita Pávuru variy jasiy ruuva: “Jiryeni tuvachodanumatiy simu Jesús, jiryimutyajadavidye jasiy variñi Judenu Jnutuntiy?” Rumutyajada jita variñi: “Tama

nuñi tuvachoda tarade sanchiy Suntu, tama.”
³ Suteda jita Pávuru variy ruuva: “¿Nutyura jtyuyadamu jiryeni jtyuyada varidye?” Ruteda jita day: “Juánbay jtyadodamu nuñityuyada day.”
⁴ Suteda jita Pávuru variy: “Juánbay jtyanunuyada riy nijyanvay rityi paruryuyada riva taji jachipiyajada, suteda jita jasiy ruuvara: Jiryetyuvachutata simu, nityi rajtisara ribivaju. Darya niquejadamusiy sadytanunuyada Juánbañi Jesús.”
⁵ Rityuvachodanumatirya raniquesada, riityuyada jita Nutyityu Jesús jtyamu variy.
⁶ Sabayada jita Pávuru variy rinchara jiyomutu, sajuujeyada jita Judenu Jnutu variy ruuvaju, riñiquejada jitarata taji vichada niquejada variy, ridyetyadodara Judenu niquejada variy.
⁷ Rivyichada vuyajuy vaduy, danujuy dyetya rinchaju.

⁸ Sayada jita Pávuru variy jutyeryanijomuju, munvay jarimyuni saraju saniquejada jichuvuyasadamu jasiy ruuva, saniquetada variy jasiryi, satidye vuunu rata riy nijyanvay, Judenu nusuyadamu.
⁹ Tavañi vichanuyada jaryi surra jachityavadye, ne rityuvachuruyada ramu, tajiñi riñiquejada variy rajisiy Judenu nú siityarijada day, nijyamijuu tuunu. Ramunityi sajiintyeda Pávuru variy ruusasiy, saracheda variryi yimusiy datyavay, Tiránu catera nujomuju, jasiy sariryinuyada titaju rundamu niquejadara.
¹⁰ Darya niday sadatyanunuyada darajuy vaata saraju. Jiryatij rivyichanuyada nijyanvay Ásiya mucadimu, riñi tuvachunuyadara Judenu niquejada; jiryatij Judíyueda rivyichanuyada,

jiryatimyu ne Judíyurveda daryi, rijerye tuvachunuyada varintyidyerya.

¹¹ Judenu judenuyada Pávurujura mityamusiy judejada, jiryatiy tittasara darya. ¹² Rani jita samirya day, nuñi simusiy riiriyanyadara paañi, ricyadnumu puchujajyu jarye, ramusiñi rasipyateda jdivajada variy sivasiy jdivajni, bayantuveda jarye bañuyada ramusiy.

¹³⁻¹⁴ Jadchiy jita sarupiñuyada Judíyurveda tenubay vichajova, sutañumayanuyada variy ruuva nijyanvay: “Nuy jita sipyatariy bayantuveda nijyamivasiy.” Jiryatiy rijetyanumayanuyada nijyamivasiryi bayantuveda, rivyichanuyada danujunijyate nuñi taryivedabay. Rijye vichanuyada Judíyubay, ravichanuyada sitya Eséba, caserdótevyeda nutyityu savichanuyada. Riñi jachipiyajada varintyidye: “Vuryajantya niquejada Nutyityu Jesús jtyamujuntidyerya, savidye sipyatay bayantu nijyamivasiy ramusintyidye.” Riñiquejada jita: “Rayasanta ji, yasipyatay sivasiy Jesús musiy, jiryatiy sadatyanu Pávuru sanchiy.” ¹⁵ Sumutyajada jita bayantu variryi: “Daryaday radyetyani Jesúsntidye, Pávuru jarye radyetya, ¿Va jiryeque, chavarya jiryedye, chavay?” ¹⁶ Sarayada jita rincha, jiryatiy bayantutini, sapuryijada mucomuju variryi, savuudoda jita variy jasiryi. Ribeyada jita variy jadchiy rorimysiy; sidyavumiy ribedye, vatajotavañuma varidyeryi. ¹⁷ Rityuvachoda jita Judíyurveda titaju varirya, jivye jarye jiryatimyu ne Judíyurveda daryi, rijerye tuvachunuyada varintyirya, jiryatiy rivyichanuyada Evésumu.

Nutyu riñi suvuyada, ruṭañuyada jita variy: “Jaryi vaḥa datyaranite Nutyityu Jesús.”¹⁸ Tiquitya tuvachunuyada simu, rityi tuchunuyada vijyomujache ruuva: “Nurya nuvyichaniñuyada tariy.”¹⁹ Tavaquitya rivyichanuyada rimyuravedantiy, ruutitanuyadara jicyatera padye, rimyuyada catera, riryupeda jita variy rivara. Jiryatiy riryupedara catera padye, ramuricheveda jamura. Ramuricheveda, darajuy vuyajuy vaata jvaayada murichirya.²⁰ Judenu niqejadamunuma rityuvachoda jaryi variy rivasidye, ravuudodanuma daryaju daryi.

²¹ Jadchiy jita rivasiy, sajachipiyajada Pávuru: “Ranuma jiya Jerusarímuju, raramiryitityi riva Masedóniya mucadi, Acáya mucadi jarye. Jadchiy jita radatyantirya Róma vichadantiy.”²² Supajada jita Pávuru jadchiñada yimutyijuy Masedóniya mucadimuju, samachojada jita taripyu saraju nanibiva jasidye, Ásiya mucadimu. Ravichada sitya Timutévu, sataryi jtya jita vichada Erástu.

Richeñeyajada nijyanvajuubay jiñiqueyadamu, Evésumu

²³ Variryundamu jita sasañeyatadeda Demétru jtyatibay Judenu nú jiyaröju riy nijyanvay.²⁴ Jasiy savichanuyada jiñu Demétru, jiryatiy sivaañuyada pupadatyeramusirya satu roridye, Diyána jtyati satu rorivyicha. Rivaachada murichirya ricyañañuyada samiy Demétrusa jvaavyeyuura criquiy.²⁵ Jadchiy jita santyeryanityadeda riy, titaju jivye jarye jiryatiy darya ruvaañuyadantidye. Jadchiy jita suteda ruuva: “Jiryatuvachu vaduy, jiryedyetyisatya

rivaachada murichirya vucyanay samiy.
²⁶ Tajitya jiryinuy, jiryetyuvachu titaju, ne vinu jiyu Evésumu, Ásiya mucadiva jarye titaju, jadchiñiday satachoda Pávururiy nijyanvay quivuyadata. Niní jtay: Jiryatíy ruuvaay jiyomututani jantyasi, tama Judenumiy nta riñicha day. Darya niquejadata savuunusara Pávuru riy nijyanvay.
²⁷ Riryaniquegara variy taji rajisiy vuryivaayada, ne vinurá, temusiy ramachosara mitya satu rorintidyey, jiryatíy rutañuyada sitenu judenuni, Diyána jtyati. Ní jarye ramacho mityantíy, jiryatíy rityuvachunuyada Ásiya mucadi janvay simuntíy, titaju nijyanvay mucadivasíy.”
²⁸ Rityuvachodanumatíy nijyanvarya Demétru niquejada, riñiquettada varirya, riyarovayajada variy sanijyu Diyána: “Niní jita Diyána sitenu sami Evésumu vichavajyu.”
²⁹ Rityuvachodanumatíy vichada janvarya, runteda variy, riñiquejada varintíy: “¿Nutyura ridyetyá nijyamíjuu vichadamu, nutyura?” Titaju nijyanvay siichiyeyada ramuju vatapadaquii, rityiicheda variñada Pávurujsa rupiñujuy, Cáyu, sataryintíy, Aristyáruçu, Masedóniya mucadi jamíjuy.
³⁰ Pávuru jarye rañi jaryuyada vatapadaquiimu nijyanvamyuju, ne rijetyaniryuyada Jesúsnu tuvachuvay variñi.
³¹ Jasiy vichavay tevay, jiryatíy Pávuru jaamyicyumiy tevadyeryi, riñi jpajada variy simura jiñiquejada: “Ne samirya yajay rumu.”
³² Varicharaju riyarovayajadamu jiñiquejada variy; tini jteda tajidyey, tini jteda tajiñechoju day. Ridyetisama nijyanvay

varidye, ridyetyaruyadatya nūday, nūtyuramura riintyeryadedayu, tīnī datyāda ruusāsīdye. ³³ Judīyūveda siityenītyitīyada nijyanvañechojū variñī Adejāntru jtyatī, satīdye jdasaniy variryī nijyanvajyuu. Rityenu rañī nīquetaniryūyada variñī. Sumuyajada jīyomututa variy riñecho, sani nīqueruyada daryaju. ³⁴ Ridiyīadanuma variy siva day jiryatīy Judīyū sanīcha, rijyotāda jīta jiyarōvayajada tītajūmusiy variy: “Nīnī jīta Diyāna sītenu samī Evésūmu vichavajyū.” Jadchīñī rīriryījada variryā jiyarōvayajada darajuy jōra saraju.

³⁵ Sandasadedā jīta catera jnūtyānu variryī nijyanvay. Sūteda jīta variy ruuva: “Jīryātuvāchu munatya, Evésū janvay. Tamā riñī datyīsa nijyanvay, nūtyu vuñī rañīcha sunūtyī Diyāna jtyatī, jarichuvimūsiy jmussī, jiryatīy satu vuryītañī. Vujerye jnūtyasarara sarorintyī. ³⁶ Ne tīdera rajtay: Ne daryaday.” Sūteda jīta variy ruuvantiy: “Jatye jīryecha, ne jīryajvaay jīta vācha jachīpiyajadamu tara. ³⁷ Nūtyu jīryeñī rañī tiichīñāda danujuy vanujuy, tamā nani paranu tara ravimūsiy satu rorīy, dantyamuy ne nanunīque vācha sanījyū satu. ³⁸ Rityī tūchutaruy Demétrūveda nada vanujuy, satu rorīy jvaavye jarye, dañuma riryātūchuta nada, tamā taji sanīcha cadnadu sivatīy riryātūchuta nada. ³⁹ Jīryevyatī jūnārya tara nīquejada, vanñuma jīryādatya jīryeñātūchadamura, sanumatīy natuy japu variy jīryentyī. ⁴⁰ Diye jiryatīy jīryarupadonumucha jīyū, suvūcharamusīñuma vuñīcha, riryānuma

tuchuta riva vuy. Riryajtacharate vuñi jvatya jiyu, nutyichityi vuryajtay nutyuramura vunttyeryaniy jiyu vuy.” ⁴¹ Suteda jita variy: “Jiryānuma jiya jiryorimyuju.”

Pávurubay jiyada Masedóniya mucadimu, Crésiya mucadimu jarye

20

¹ Ripyaruyadanumaty riva yavatyada day, sanatuyada Pávuru variryi Jesúsnu tuvachuvay. Sadatyanumuyadanumatiryi, satuchucheda jita variy ruuva, sayada jita variy Masedóniya mucadimuju. ²⁻³ Jasiñi sayanumayanuyada titaju vichadiva, saniquenuyada ruuva nijyanvarya rajuura datyadoda niqejada. Jadchiy jita sitojada Crésiya mucadimu, munvay jarimyuni saraju savichada jasiy. Jadchiy jita sani jteda yajmusa Pávuru ravimu cartye, sani jteda yejiya ravimu Síriya mucadimuju. Judíyurveda rañi jteda yajvay saniyaresiy Pávuruyu. Saparuyada variy riva cartyevimu jiyada. Sataryadanuma variy siidiva day, Masedóniya mucadiva saramiryijada variy. ⁴ Riyada jita tavichada janvay sisa Pávuru. Savichada Sopáteru jtyati, jiryatyy Pyírrubay denuni, Beréya jamí; Aristyárucu, Sicyúntu jarye, jiryatyy Tesadónica jamíjuñada, Cáyu jarye, jiryatyy Déribe jamíni, Timutévu jarye. Jadchintyy Tíquicu, Trójimu jarye, jiryatyy Ásiya mucadi jamíjuñada. ⁵ Sunuvye jita jiyantadayu, rumunuma rintuyada Trúvasimyu varidyeñi. ⁶ Ratyuchura, jiryatyy nadyeyada cartyevimu Pávuruta, Vidíposimysiy. Nadyeyada jita pa suru vichtyavasiy, tadajyo

rundamusiy n̄acheryeda riy n̄adyisa jiyavay, jasiñi rintuyada Trúvasimyu n̄ay. Jasiñiday n̄uryicheyada taraqui simyanu saraju.

Pávurubay jañuyada Trúvasimyu

⁷ Tummycyu rundamu n̄untyeryadedayu, nuñatidye patatirya pa (nuñatidye jachipitya variñi Jesús). Pávuru niquejada jamuca variy ruuvara, jiryatiy sayaruyadanuma variy ratařimysiy. Sariryijada niquejada variy ruuvara, nupora taša saraju. ⁸ Jasiy ravichada riñonosiy nuchasara rorichivyimu, jiryatiy n̄untyeryadeda jasiyu, n̄avay rorivyimu. ⁹ Tiqui vaderonu jiryatiy ravichada siya Évuticu, samašada bentanumu. Rani vuunuruyada maryuyada variy jasiñi, jiryatiy jamuca saniquejada daryaju Pávuru. Ravuudodama jita maryuyada variy jasiñi, sajuuyada variy tamitya bentanumusi, riryesubeda jita variy diibyini. ¹⁰ Sumusada jita Pávuru sanacho variy, sarañuvejada variy sancha, samariyajada variy jasiñi, suteda variy ruuva: “Ne jiryajnutay, jnyasi day.” ¹¹ Sašubeda jita Pávuru n̄avajyu varintyi, sapatada jitarapa, riibyeda jita varirya. Jadchiy jita satuchoda ruusa, rasachara saraju, sayada jita variy rivasiy. ¹² Riryaracheda jnuñu variñi vaderonu jiryatiy sajuuyajada jasiy. Ramutiy riichanayada variy.

Pávurubay jiyada Trúvasimysiy, Myidétumuju

¹³ Ray jiyanta risa vichavavyedata cartyevimu Ásomuju. Jadchiñiday nuñimusadedani Pávuru, jasicharajutiy sayaruyada siidiva

daryaju. ¹⁴ Sasaryedanumatij Ásomu nuḡ, nuñimusededa variy jadchij cartyevimuni, nudyeyada jita variy jadchij, Myitidénemyuju. ¹⁵ Jadchij jita tarundamu nudyitojada Quiyu ratyuusara. Tamitya rundamu nudyeyada Sámosu ratyuunchaju. Tarundamuntij nudyitojada Myidétumu. ¹⁶ Ne sajaryuyada Pávuru Evésumuju daryaju, sañuma richechujá jasiy Ásiya mucadimuyu, sitoruyada daryaju Jerusarímu, nutasarasiy jatojada vichyamuju, jiryatij ravichada ritya Pentecostésij.

Pávurubay tuchoda jamuca ruuva Evésumu vichavay rinyityumibe

¹⁷ Ramunijiy sanatutyadeda Pávururij rinyityumiy, jiryatij Jesúsnu tuvachuvaryi, riryánuma jvi Evésumusij Myidétumu. ¹⁸ Ruutojadanumatij simu Pávuru, suteda variy ruuva: “Jiryedyetyisatya nūday nūtyura ravyichaniñuyada samirya jirye, rajottya rundamusij diye saraju, jiryatij ravyichanuyada jiryemyucadimu variy. ¹⁹ Ray jvaayada samirya jachityi sayadaju Nutyityu Jesús, dantyamuy ne richanātya ray, rajetyadara rañisijya variy rinayadamu, parucharimysij ravyichada variy, jiryatij vacha rivyichaniryuyada Judíyueda daryaju ray. ²⁰ Ne ribañuyadara niquejada jiryajisij jiryatij samirya ravichanuyada jiryejyu day. Radyetyanunuyada jiryentyeryadedamuyu, sitenu jiryeryorimiyuntij. ²¹ Nutyu rañi datyadodama samij vijyomujache jirye, jiryatij Judíyueda jirye, jivyentyi jiryatimyu ne Judíyuedantidyeryi. Radyetyanunuyada

varyi jirye: Jiryanuma paruy riva vacha jachipiyajada Judenujsaju, jiryanuma tuvachu simu Vuntyityu Jesucristu day. ²² Diye, Judenu Jnutu dyetya jiyarutyaniy Jerusarimuju ray, ne radyetya nutyura racha jasiy. ²³ Sani tuchutityidye Judenu Jnutu titaju vichadiva riva: Riryantyanite bay nupocu rorivyimu day ji, jasiñuma yaparutyajayasara ravimu ji. ²⁴ Dañuma dyetya radiiy rajisiy, ratanuma rajtotanirya rachiiyada, rivaayada jarye, jiryatiy Nutyityu Jesús rañi jteda rivara. Niñi rañi jteda rivara samituchoda: Judenu jpajada jivyatadamuju ray, nijyanvay jiyada rañuju. ²⁵ Diye jiryajnyy, ne jiryadichara nta junay riva ramyonuday, jiryatiy radyetyanunutyi Judenu nusuyada jirye. ²⁶ Ramunitiy ritay diye rundamu jiryiva: Ritatye dacyu jiryedyiryanuma dayu, raryetyanuma jiryeñuda murichiryajisidyeyu, rañi tuchutimya daryaju jiryiva daryatiy savata Judenu jiryedyetyadaju. ²⁷ Tama rañi jubay jiryajisirya Judenu niquejadatera, rachuvuyasadamu rañiqueti titaju jiryivara. ²⁸ Jiryinutyata jiyada, jiryinutyata titaju riyadantiy jiryatiy Jesúsmu tuvachuvajyuu riy, tapi sabayada Judenu Jnutu runutyisavajyu jirye, tapi sunuyada nudata jicyanayada Jesús yimu tuvachuvajyu riy nijyanvay. ²⁹ Radyetyisatya ranumatiy tochiy jirye, riryajay vaduy jamirya vichavay jiryequebyimu, riryajarupanunuvi variriyi Jesúsmu tuvachuvajyuu, nutyu jmyirya siryisara jasinacho darya. ³⁰ Tavay jiryetyevay rajarupanu sitenuyu, riryatidye jatachu jiquivuyadata yisaju

riy Jesúsmu tuvachuvay variy. ³¹ Ramunítıy rıtay jiryıva: Jıryajnuıy samıy jıyada, jıryajachıpyara jıryatıy rañı jıryıjıyada datıyadoda mumurı vaata saraju jırye, rıñayada saraju, nuporacaju, judacaju jarye: Jıryantıya jnuıy samıy, jıryantıya jnuıy samıy. ³² Diye rıtay sanıjıyü Judenu, nınuma rajnıtıya jıryedıye, ratıyüchu jıryıvara Judenu nıquejada, rañı tüchu jıryıva jaryı savata vuy. Ranı jırya nıquejada ravanıtıya jırye, jırya nıquejadamusıy racha jıryeyarurya ruusa nijyanıvay tıtaju jıryatıy jııntyasavay Judenuju rıy. ³³ Ne taramuy rañıruy rıva tı crıquıy pupaday, dantıyamuy ne ruunadye, dantıyamuy ne sasujay. ³⁴ Jıryedyetyısatıya jıryatıy rıvaañıyada sıtenu rajyomututa tara, ratıdıye dıy rıva taradera rıñıtıyaju, rısa jıyanumayavay jarye. ³⁵ Rıvaayada daryá ratıdıye dıtyanu jırye nutıyuramusıy vuryı jvaay parucharımyusıy ratanıtıy vuryımutıya rıy jantyuyanımıy. Ne taramuy vuryajachıpyıya Nutıyıtıyü Jesús nıquejada: Vuryanumatıy jmutıya tara, ranı jıta samırya; jaryı samıryavaju jmutıyjadamusıy, vuryasay taranı tı.”

³⁶ Sanıquemıyadanumatıy Pávuru, rıryadasıdyoda jıta varıy tıtaju sısa vıchavatyayu, satüchoda jıta sısa Judenu varıy. ³⁷ Jadchıy jıta runayada tıtaju, rımyarıyadanı Pávuru, rıchıñıvayada varıy samayava. ³⁸ Ranıday nuvatıyadedada jaryıryı, jıryatıy süteda daryaju: “Ne jıryadıy ramıyovanıday.” Jadchıy jıta runıyada cartıyemujıni.

Pávurubay jiyada Jerusarímujū

1-2 Rumuryadanumatiy variy nuy, nutyuchueda variy ruuva, nudyeyada jita variy, vase nudyeyada ramuju, Cósu ratyuu variy. Ratarimyusiy nudyitojada ramu Ródasiy ratyuuntiy. Jadchiy jita nudyeyadantiy, nudyitojada variy Pátaramuntiy, nudyiñuvejada riva jamujnu cartye jasiy, rayaryudanuma variy Venísiya mucadimuju. Jasiñi nuñimusada variy ravimu, nudyeyada jita variy jadchiy. ³ Jvadicharanumatiy ravichada Chípyirye ratyuu, vase nuryamiryijada varidye, ramacho jita vumyidamyiju Chípyirye ratyuu varidye, nudyeyada variy jadchiy, Síriya mucadimuju. Jasiy nudyitanuvejada Tírumu, jasityi riryasuminiñuejadara jvaadyi ravimusiy cartye. ⁴ Jasiñi nucheryeñuejada riy Jesúsnu tuvachuvay, numechonuvejada jasiy ruusa taraqui simyanu saraju. Jasiñi jita rityuchoda siva Pávuru, Judenu Jnutu jtedamuju: “Ne yajasumiy Jerusarímujū.”

⁵ Jasiñuma nudyitotadeda darya taraqui simyanu vichadamu day. Nuchipyateda variy vichadamusiy. Runuyada jita titaju nijyamijuu musajomuju nuy. Jasiy nuñadasidyoda tichanchayu, nutyuchoda Judenujsa variy jasiy. ⁶ Nutyuchueda variy jadchiy ruuva, nuñimusada jita cartyevimu varintyi, rityeryada ruváy jiryorimyuju varidye.

⁷ Rabaryjjadanumatiy nuryupiyada runda Tírumusiy, nudyitojada jita variy Todemáyidamu. Jasiy numyuchuvañuejada variryi nutyeryiveda,

nūmēchojada tarundaqui variy ruusa.
⁸ Ratarimyusiy nūdyeyada jadchintyi,
 nūdyitoyada variy Sesaréyamu. Jasiy nujeñuvejada
 ravimu Vedípe roriy, nūmēchojada variy sisa.
 Vedípe vichada datyanu, samituchoda datyanu.
 Sata niday ritojada danujuñijyateju, rityidye
 rajnuy riñeço bachenodaveda jantyuyadavay.
⁹ Nini vichanuyada dañujuy detuti, riñi vichada
 Judenuju tuchuvay, jiryatiy sadatyanunuyada
 Judenu daryaju riy. ¹⁰ Jasiñi nuryicheyada
 Vedípe rorimyu rajuu rundamicharaju. Jiryatiy
 nūvyichada jasiy, sitijada Judenuju tuchū variy
 jasiy, ravichada sitya Acábu. Judéya mucadimusi
 sitijada. ¹¹ Sitijadanumatiy nūdyimu, jadchiy
 saryedara Pávuru tása puchujay, sapuchoda
 ratara jiyomutu, sanumutu jarye jipyuchoda
 variy ratantiy, suteda variy: “Daryani sutay
 Judenu Jnutu: Daryani riryapuchu Judíyueda
 Jerusarímuni rajami, riryatidye say Judíyueda
 variñi Pávuru nijyanvamyu, jiryatimyu ne
 Judíyueda daryi.” ¹² Rityuvachodanumatiy
 Pávurujsa vichavarya Pávuru nijyu niquesada,
 nūdyeyasadoda siva Pávuru, jasiy vichavay jarye:
 “Ne yajasumiy Jerusarímujū.” ¹³ Sumutyajada
 jita Pávuru variryi: “¿Tajura jiryinatya varidyeyu?
 ¿Jiryechaboniryuy dyetyara rajechiy? Ritay radye:
 Dañuma riryapuchu ray, dañuma riryajvay
 Jerusarímuntirye, Jesús siityarijadiva.” ¹⁴ Ne
 nūtyuvachutaniryuyada nta ramusiñi: “Dañuma
 nuñaparuy Judenu jtedamujū siva.”

¹⁵ Jadchiy jita, jiryundamu nuñajdutyara
 jiyada, nuñatidye jasumiy variy Jerusarímujū.

16 Sesaréya janvay jarye jiyada nudyisa, jiryatiy Judenumu tuvachuvaryi. Riñi jtotada Nasúrorimyu nuy, jiryatiy savichada Chípyirye ratyuu jami, tariy Jesúsnu tuvachu.

Pávurubay jañuyada simu Santiyácubay

17 Jadchiy jita nudytojadanumatiy Jerusarímu, ridyirvejada jichanayadamu nutyeryiveda varyu. 18 Ratarimyusiy sayada Pávuru nudyisa jijeñuyadanacho simu Santiyácu. Jasiy rivyichada varyi rimyityumiy. 19 Samuchuvedivasiy, jityuchoda Pávuru nuñi taramusirya, jiryatiy sivaayada Judenu Pávuru jvaayadamusiy riyadaju nijyanvay jiryatimyu ne Judíyueda daryi. 20 Rityuvachodanumatirya satuchoda Pávuru, riichanatyada variñi Judenu. Ruteda jita siva Pávuru: “Yajnuy, Pi, rajuura varancanuma tuvachu Judíyueda simu Jesús. Darya niday riñi jtay vuryi jtotanirya Muyusésibe datyadoda day. 21 Darya niday riñi tuvachodara raticheyada, daryani sadatyanusara Pávuru: Ne jiryatuvachu ramu Muyusésibe datyadodanuday. Daryani rijechipiya jidyetyanusara riy Judíyueda, riryatidye vichasara taji nijyanvayjsa. Nutyu tini jtay jidyetyanu day: Tama jiryajmutyonu riy jidyedyeñu, ramutiy rijechipuryurya tariy jivyichada. 22 ¿Nutyura vuryecha, nutyura? Riry anumate tuvachura yitijada. 23 Yivaatyatentirya jiryatiy nuñajtay yivara. Jasidye jiyu nudyisa riy dañujuyu vaduy, jiryatiy riñiquera jtotadeda sanijyu Judenu. 24 Yajarachiy rumu riy jivye vaduy, jiryatidye ñurata rumu vatajuuyu. Jiñi ramurichenura

ridyivyi, ritojada saraju riñiquejada Judenu nijyu, varityi riryapatyanirya yinojasiy. Jasiñi jita riryadatya titajuura: Tama sitenu ranicha Pávuru nijyu niquesada day. Riryánuma datya jita nijyanvay varidye, jiryatiy yitotanirya Muyusésibe datyadoda. ²⁵ Jiryatiy rityuvachoda simu Jesús, jiryatimyu ne Judíyueda daryi, nutyu nuñi nuchimya rijyura catera. Nutyu jasiñi nuñi tuchusiy, nujechipiyasiy varintiy: Ne jiryejmyirya sasaviy jiryatiy ruvañi, riryatidye jnutatya ramuju jiputera jvaachi satura. Dantyamuy ne jiryejmyirya sasaviy nudatara, dantyamuy ne jiñu saviy, jiryatiy mudchichara sapitasa, dantyamuy ne jiryajvaañada jiryatimyu ne jiryevyaturuñada day.”

Rureda nijyanvajyuubañi Pávurubay Judenu nijyu jachipiyajomu

²⁶ Ramunítii saracheda riy dañujuyu vaduy, sinrada variy ruusa, ratarimyusiy riyada variy ramuju Judenu nijyu jachipiyajontiy. Variñi jita riryatuchu, tara rundamu nuñanuramuy, variryundamu day riryajvañi yasintiy, riryatidye jnutatya variy simu Judenuni. ²⁷⁻²⁸ Ruutotaniryuyadanumatirya yinrada runda, darundajuñijyatemusiy, ridiyiyada jita Judíyueda jasiy siva Pávuru, Judenu nijyu jachipiyajomu. Jivye Judíyueda jiryatiy rudedada Ásiya mucadimusiy, riñi rañi siijetyaruyada riy nijyanvay, Pávuru jiyaroju. Rureda jita variñi Pávuru jicheñeyajadanube: “¡Vaduy, Irayénuveda! Jiryajmutya nuy! Niní jiñu vanu jiyantumaya datyadoda riy nijyamijjuu nudyeyaroju, jiryatiy

Judíyueda nudye, nudyetyadoda jiyaroju jarye, jiryá Judenu nijyu jachipiyajo jiyaroju jarye. Jadchiy ranchajuntiy, saryitya jiyuju riy, jiryatimyu ne Judíyueda daryi, Judenu nijyu jachipiyajo vimuju, riñitiy jarupanunuvísirya jiryá Judenuju jiantyasajo.”²⁹ Jiryatiy ridyijemya siva Trójimu jtyatí sarupiñeya sisá Pávuru, ramutiy ruteda variy: “Nini jtita jiyu ravimu Judenu nijyu jachipiyajoni Evésumu vichi jiñu Trójimu, jiryatiy sarupiñumaya sisá Pávuru Jerusaríva.”³⁰ Riryichatayajada jita titaju vichada janvay variy, richiicheda variy simuju Pávuru, ruuriñuvejada variñi, rityiityityiyada Judenu nijyu jachipiyajo vimusiñi, bimuju, rityanuvudoda varicharajura rorijyu yibivaju.³¹ Riñi jvaryuyadanumatiñi Pávuru, varicharaju ritojada niquejada simu sutarumiy nutyityu: “¡Titaju vichada janvay rañi panaryiruy tinacho!”³² Varicharaju supajada riy sutarumiy, rinsuveye jarye yisaju, richiichiyeyada variy simuju. Ridiyadanumatiy nijyanvay ruuva sutarujuu nutyityujsa, ripyaruyada jita jvatyiyada variy siva Pávuru.³³ Satuudityityiyada nutyityu variñi Pávuru, sireda variy tanuvudodajuni, sapuchutadeda variy dajuujuy cadyidyajuutani. Sitajadoda jita variryi nijyanvay: “¿Chira sanicha jiñu vanu day, chi? ¿Nutyura savichaniy jirye, nutyura?”³⁴ Tini jmutyajada tajidyeñi, tintiy tajiñechoju. Nutyichitya sadatya sitenuni dacyu, ne dacha niquejadajuumu saryidyetya nuday. Supatadeda jita nutyityu variy sutarumiy rorivyimujuni Pávuru.³⁵ Sitojadanumatiy

jasumijyo ruvamu, rityityacheda sutarumiy jadchiy navajyuni, jiryatij niyamijuu rañi jteda yasiryi daryaju simu. ³⁶ Richiityatityiyada variñi, richeñeyatityiyada variy: “jiryajvañi!”

Pávurubay tuchoda jiyada rayadaju niyanvajuubavya

³⁷ Sutarumiy rorijyumu sitajadoda Pávuruni rintyityu: “¿Vanavyidye rajtay tara yiva?” Sumutyajada jita sutarumiy nutyityu variñi: “¿Jidyetya tara Cryécu niquejada, jidyetya? ³⁸ ¿Ne ji rañicha Ejíptu jamí day? ¿Tama tariy jiñi jatachumuntyiryi daryajuyu varanca jvavye sayaroju vuntiyityuntiy, jadchiy jita yajarachiy tajityomuju variryi?” ³⁹ Sumutyajada jita Pávuru variñi: “Ne. Nutyu rañi rañicha Judíyu, Sidísiya mucadi jamí. Nutyu rañi rañicha Társu jamí, jadchityi rurachara titaju tara vichadivaju. Rajechiñuy yivara jivyatavidye ranique ruusa niyanvay.” ⁴⁰ Sumutyajadanumatij nutyityuni Pávuru: “Joonu,” variñi jita saraniñujejada jasumijyojcha, sumuyajada variy riñecho niyanvay, riryatidye jdasajay variy. Rindasada jita niyanvay variy, saniquejada jita Pávuru sitenu jiñiquejadamu variy ruuva, jiryatij Ebrévu niquejada darya.

22

¹ Suteda jita: “Ratyeryiveda, rajyevyeda jarye, jiryatuvachura jiryatij ranique diye vijyomujachera.” ²⁻³ Rityuvachodanumatirya saniquejada Ebrévu niquejadamu, rindasada sitenu samidye variy. Suteda jita variy: “Rañi

rañicha Judíyu, jiryatíy raryupeda Társumu, Sidísiya mucadimu. Jiyunuma radyetya darya catera nuyada day. Catera datyanu, jiryatíy Camañéñu jtyatíni, níní datyadoda ramu tuvachodaju ray, jiryatíy tarivye datyadara. Rañi vichasara jaryi jnytyadacanuy saju Judenu, nijyanvay cabyiva. Daryaday rañichadantidye, nutyu jiryé darya diyentidye. ⁴ Rayasantada riy nijyanvay, Jesúsmu tuvachuvay, vadi núnuma richiityarijada daryaju day. Rañi parutaruyada variryi. Cadyidyajuutavay rabeyada riy, ripajada variy nupocu rorivyimuju riy vaduy, vatuy jarye. ⁵ Niday caserdótevyeda nutyityu ratuchu vase ranchidye, rimyityumiy jarye ratuchu vase ranchintyi, tapi ruumusiy rimutyajadara catera rijyu ratyeryiveda Judíyueda, Damáscumu vichavay. Ratani jiryá catera rayada ranacho ratidye juriryi Jesúsmu tuvachuvantyi, jiyu nday rañi jteda ratanuvunu Jerusarímu riy.

Pávurubay tuchodara jityituyada Jesús siityarinuju

⁶ Rayadamu, rañi tuudiyadanumatirya Damáscu, jasidye raryi vichada tara nta variy. Vase jiñita, mityamusiñi ranuyada vandaquii nutyu nono variy riro. ⁷ Ripatyeda mucadincha, ratyuvachoda varirya niquejada: Sávuru, Sávuru, ¿tarajura yarupanta ray, taraju? ⁸ Ray jmutyajada variy: ¿Chira ji, Nutyityu, chí? Sumutyajada jita varirye: ¡Nutyu rañi rañicha Jesús, Nasaryé jamí, jiryatíy yarupanta ray! ⁹ Jiryatíy rivyichada vaduy risa, rijerye diyada riva nono, dantyamuy ne rityuvachodara

ni¹⁰quejada day jiryatiy saniquejada risa. ¹⁰ Riteda jita variy: ¿Nutyura racha, Nutyityu, nutyura? Suteda jita Nutyityu variy riva: Yanubesiy, yejiya jita variy Damáscumuju. Jasiñi jita ratuchutaniy yivara darya bacharatiy yivaayadaju darya. ¹¹ Rapuryeyada rañisiy variy nonomusiy, mityanuma rimyuteda jadchiy risa vichavay Damáscumuju ray.

¹² Jasiy savichada Damáscumu tiqui vanu, Ananíyasiy jtyati. Nini tuvachunuyada ramu ni¹²quejada, titaju vuñiquejadamu. Titaju Judíyueda jtañuyada variy: Nini samiy vanu. ¹³ Nini jtijada ratyuunujū, saradeda variy ratyuunu, suteda variy riva: Pi Sávuuru, yajnuyasumiy. Varicharaju rinuyasubeda, radyimya variy siva. ¹⁴ Suteda jita variy riva: Sajaryetada tariy vumyunatyi Judenu ji, yatidye datya varirya savatará, yatidye jnyu jiryatiy vase jvaarya niyjamini, yatidye tuvachuntirya saniquejadantiy. ¹⁵ Jiiñi jita racha sitenu tuchu saju, titaju mucadiva vichavajyu, yatidye tuchu jiryatiy jityuvachumuy diyedemusirya, jiryatiy jidyí risaju riva. ¹⁶ Diye ¿taraju jiryiche, taraju? Yanubesiy. Yajtyanutaniy ji, ratidye purya jiyuuchueda variy yivasiy, jiryatiy jijechiñuy Crístu jtyamura.

*Pávurubay tuchodara jiryatiy Judenu jpajada ni-
jyanvamyujuni, jiryatimyu ne Judíyueda daryi*

¹⁷⁻¹⁸ Ratyeryadanumatiy Jerusarímuju, varityi ratyuchoda sisa Judenu ravimu sanijyu jachipiyajo, nutyu ratyituyadamu radiyada siva Jesús, suteda variy riva: Varenuvajuntya yejiya Jerusarímusiy, riryaviy tuvachu ramusirya

jiñiquejada rañijyu. ¹⁹ Rimutyajada jitanı: Nutyityu, nutyu riñi datyama jidyirya day, rañiday jtyejada nupocu rorivyimu riy, jiryatıy rityuvachunuyada yimu day, titaju jutyeryanijyo vimusiy ravyatatıtyiyada riñecho, ramyusiyetyadeda jarye risaju riy. ²⁰ Jadchintyi, ruvedanumatıy ravichutani Estébanubay, jiryatıy satuvachoda daryaju yimu, tajitya rinuyada variy sanacho, rindatada ravichutani, daryatıy radyiyada siva, rajechıpiyajada variy: samıryantye rıvyıchaniy daryani. Rañi ribeyada jichujay jnutyiju. ²¹ Suteda jita Jesús variy riva: Yejiya, jiryatıy riparuy daryaju ji, yatıdye jiya nijyanvamyuju, jiryatıy ripya vıchavaryi.”

Pávurubay vıchada jurıchi sutarumiy nutyityubamyu

²² Rityuvachutada variy sanıquejadıvayu. Rıyarovayajada variy: “jıryajvañi jiñu nijyamı vumyucadıncasıy! jıNe samırya sacha jıyu!” ²³ Junay rıriyijada jıyarovayajada varıdye, rıryotyatıyada varırya jıchujay, rijetyatıyada variy navajyura tıchajuru jiñıqueyadamu. ²⁴ Jadchıy jita sutarumiy nutyityu jtyetadeda jıchutarumiy rorıvyımu varıñi, jasıtyi rityuchutadeda vıjyomujachenı. Musıyeyadamusiy riñi jteda yatuchutaniñi: “¿Nutyuramura rıyarovatyaja ji, nutyuramu?” ²⁵ Rıryetyadanumatıñi puchusı jimyusıyeyadaju, suteda jita Pávuru variy siva sutarumiy nusuñu, jıryatıy saradeda jasıy: “¿Tarajuna yamusıyeñi sıtenu Róma mucadı jamı, taraju? Tama jiñi tuvachu didyerya vıjyomujache nıquejada

rimusiy didye, tama.” ²⁶ Satuvachodanumatiy sutarumiy nusuñura saniquejada, sayada jita variy simu jintyityu, satuchoda variy siva: “¿Taraju jiñi jachipiya musiyetyadedajuni jiñu day, taraju? Nutyu ninì sanìcha Róma mucadi jamì.” ²⁷ Jadchiy jita satuudiyada variy sutarumiy nutyityuni Pávuru, suteda jita variy siva: “Yatuchu riva, ¿Jiñiviy sitenu Róma mucadi jamì?” “Jo. Rañiday.” ²⁸ Jadchiy jita suteda sutarumiy nutyityu siva: “Ray murichedodara rajuura criquiy, ratidye vicha Róma mucadi jamì variy.” Suteda jita Pávuru variy: “Ray jitamuy ne. Tapi daryanuma raryupeda day.” ²⁹ Varicharaju rijiintyeda variy Pávurumusiy, rityi rañi jteda yatuchutaniy vijyomujachení. Nutyityu jarye suvuyada variy ranchiy, jiryatiy sapuchutaniy daryajuni Róma jamì.

Pávurubay tuchoda vijyomujache Judíyueda nutyityumibe tuunu

³⁰ Ratarya rundamu jita sanatutyadeda sutarumiy nutyityu riy caserdótevyeda nutyityumiy, rimyityumintyi, riryatidye tuvachura ratuchusada vijyomujache. Savitatadeda jita variñi Pávuru, riryaracheda jita variy niquejomujuni, sadatyaryu yada daryaju nutyityu, tariva rityuchutaruy Judíyuedani Pávuru, tariva.

23

¹ Sunuyada jita Pávuru variy samiy riñecho rimyityumiy, suteda jita variy ruuva: “Vaduy, ratyeryiveda, ray vichasara samirya Judenu

tuunu diye saraju, ne rúntaryuy rajechiy varidye.”² Jadchiy jíta supajada caserdótevyeda nutyityu riy jiryatij riryadeda satuunu Pávuru, suteda jasiy ruuva: “¡Jiryajvay sajúmú!”³ Suteda jíta Pávuru variy: “¡Nini jíta Judenu rajvay ji, jiryatij yituyadamu jivyicha daryaju! ¿Tarajura yivatyanij mitya rajyumu, daryanivij yinuy raniquera niquejada day? Jiryatij jivyicha jiyu, jivyatavij ratuchu yivara ravychada, yatidye murichenutaniy vuñiquejadatara rivaayada. ¿Nutyuramusij yivatyanij rajyumu, nutyuramusij? ne yinuy jubachara darya.”⁴ Ruteda jíta variy siva Pávuru jiryatij riryadeda satuunu: “¿Yavityiyeryutyani jiryatij Judenu bayada caserdótevyeda nutyityujuni?”⁵ Sumutyajada jíta Pávuru variy: “Radyetyavitye day ratyeryiveda, nini sanicha caserdótevyeda nutyityucu. Tamá raryi nique darya, tamá, jiryatij vuñijyu nuçhara daryaju darya: Ne yanique vacha sanijyu jivyichada nutyityu.”

⁶ Mityamusij sadatyada Pávuru variy: “Rimyityumij tevay Saadusévuvedada day, rityevadye Varyisévuvedantidye.” Jadchiy jíta saniquejada Pávuru jaryi: “¡Vaduy, ratyeryiveda, nutyu rañi rañicha Varyisévu, rajye jarye vichada Varyisévuntij. Tamá taji rañicha jiyu, tamá, jiryatij jtay riva samiryavidye ranicha, ratij tuvachu ramu diibyimusij mişasubeda!”⁷ Saniquejadanumatirya darya niquejada ruuva, rijyotada jíta niquettada Varyisévuvedada variyu, Saadusévuvedata, ne jidchavu rijechipiyajada daryaju, tajiñechojuni ti jachipiyajada day.

⁸ Ruṭañuyada daryaju Saadusévuveda: “Tamaṁ tī rañi mīsa diibyimusīñundyē, tamaṁ. Tamaṁ tijnay rañicha Judenu jpanu, tamaṁ, netimyu vinu suntu.” Ruṭañuyada jīta Varyisévuveda: “Nutyu jasidye sanīcha.” ⁹ Jadchīy rijyotadara niqejadajuu, riñubeseda jīta cetera nuvye Varyisévuveda tevey, richeñeyajada jīta variy: “Tamaṁ nuñi jnuy tara ntani jīñu vanu, tamaṁ. Temusiy sītenuni dyetyate satuchoda tī jnutujsa, Judenu jpanujsa dyetya.” ¹⁰ Jaryiñuma riñiquettada daryaju variyu, sutedanuma sutarumiy nutyityu variñiyare day, riryanuma rotyatityeni Pávuru dacyu. Supajada jīta variryi jichutarumiy: “Jiryatiya riqebyimusīñi, jiryeryorivyimuju.”

¹¹ Ratarya rundamu jīta saradeda Judenu satuunu Pávuruntiy, suteda jīta variy siva: “Yavanutyaniya jījechiy; nutyu jityuchosiy vijyomujache rayadaju jiyu Jerusarīmu, daryaday yatuchu vijyomujache Rómamuntiy.”

*Rijechipiyajada Pávurubay jiyaroju:
“Vuryajvañi”*

¹² Rasachadanumatiy, rijechipiyajada jīta Judīyuveda variy sayaroju Pávuru: “Vuryajvañi. Ne vuryejmyi diye, dantyamuy ne vuryajatu sūvachada saraju. Sachaniy Judenu tara riva vuy, netimyu ne vuryajvañi.” ¹³ Rivyichada daryajuyū vuyajuy yadaju vaduy, jiryatīy ruvaryuyadani Pávuru. ¹⁴ Riyada jīta variy ruumu caserdótevyeda nutyityumiy, rimyityumimiyu jarye, ruteda jīta variy ruuva: “Nudyeyaronunuma jaryidyeñi Pávuru day, Judenujisiy, ne nuñejmyi variy sūvachada saraju. ¹⁵ Diye jīta jiryatuchu jiryedyē

rimyityumitya, jiryatuchu siva sutarumiy nutyityu, satidye jututaniy jiryimujuni, jiryatidye jtajanu munatyanı, samityatate jiryıtajanunı. Jiyunuma nuñaninuy sajiju nuñatidye jvay variñı, saryiñuma jto jiryimu.”

¹⁶ Sadatyadama Pávuru jtyamutuy denu varidye: “Ruvaryuñumanı rañuriy Pávuru.” Sayada jıta varyı, sajañuvejada sutarumiy rorivyimu, satuchunuvejada varyı siva jiñuriy Pávuru. ¹⁷ Sanatuyada jıta Pávuru variñı sutarumiy nusuñu: “Yajaray rumunı jiñu vaderonu yintyityumuju, satidye tuchu tara siva.” ¹⁸ Saracheda jıta varyı nutyityumujunı, sutañuvejada jıta varyı siva: “Tanuvunusi Pávuru natuyasirye, sayasantasirye ratidye jarañı jiñu vaderonu yimuju, satidye tuchu tara yiva.” ¹⁹ Samutacheda jıta nutyityu varyı sajomotunchiy tajiñeçojuyu, sitajadoda varyı rumunı: “¿Tara yatuchu riva, tara?” ²⁰ Jadchıy jıta suteda vaderonu siva: “Rijechipiya Judıyurveda jiñıjıy, riryatidye jtay yiva, yatidye jutunı Pávuru tarımyusiy rimyityumımyuju, riryatidye jtajanu munatyanı, samityatate ruutajanunı. ²¹ Ne yatuvachosiy ruumu, tapi daryajuyu vuyajuy yadaju vaduy rañı ninuy sajıju. Ne tapi riñı jıyaronu sitenu Judenujisiñı: Ne nuñejmyı, ne nuñajatu, suvachada saraju. Diyedemusiy rinturya yimutyajada, riryatidye jvay variñı.” ²² Satuchucheda jıta nutyityu siva vaderonu, sutacheda varyı siva: “Ne yatuchosiy tidevara jıryatıy jityuchu rivara.”

Supajada sutarumiy nutyityubañı Pávurubay

simu japubay, Védisiy jtyatibay

²³ Sanatuyada jita nutyityu variñada sutarumiy nusuñujuy: “Yanuma jdutyataniryi sutarujuu, jiryatiy darajuy pacha sutarujuuriy, riryatidye jiya variy Sesaréyamuju, yajdutyatanintyiryi darajuñijyate vuyajuy sutarumintyi, cavañuncha rupivye, darajuy pacha sutarumintyi, jiryatiy ruvetavaryi. Nupora taşa tuunu jiryეjiya.

²⁴ Jiryajdutyā danujuy cavañujuy, nanatidye rupityani Pávuru, sañuma vichari tara nta nūtaşa, satidye jto samiryā simu japu Védisiy jtyati.”

²⁵⁻²⁶ Sanuyada jita nutyityubay variy Védisibejyura catera, saniquejada ramu nurya: “Samiryamu rīpa yimura Jaamyi, Japu Védisiy. Ray Cudávuryu Dísiyasiy, ramyuchuvay ji. ²⁷ Jiñu vanu rīpa,

jiryatiy Judíyurveda jurini. Riñi jvaryuchimyani netimyu ne raryi jtosi varenu sutarujuu, ramunītiy nuchovañuvesiy riryajisiñi, jiryatiy radyetya daryajuni, niniday Róma mucadi jamicu.

²⁸ Radyetyaruje daryaju nutyura riryatuchu Judíyurveda sanijyu, ramutiy ritujay Judíyurveda rimyityumimujuni. ²⁹ Jasiñi radyetyajay rityuchu Judíyurveda sanchiy Pávuru, riñiquejadamu jityuchutani.

Tama sanicha tara, nutyuravara riryamununi, dantyamuy ne tarivara riryajitye nupocu rorivyimuntiñi. ³⁰ Radyetyajañumatiy rijechipiya Judíyurveda juveda sanijyu, varicharaju rīpajay variy yimuni.

Ratyuchuma ruuva Judíyuedantiy, riryatidye jiya variy yimu, riryatidye tuchutanuve yiva variñi Pávuru.” Daryani sanuyada riva catera saju.

³¹ Jasiñi vase riñi jtoda sutedamuni Pávuru,

riyatada jita nupora Antípatrisimuyuni.
³² Ratarya rundamunuma rityeryada
 sutarujuu jiryorimuyuntiy, jiryatiy jiñumututa
 rupivyedyeryi. Jiryatiy cavañuncha
 rupivyentyidyeryi, ririryijada jiyada Pávuruta
 varidye. ³³ Ruutojadanumatiy cavañuncha
 rupivye Sesaréyamu, richeñuvejada variy catera
 nucharani japu, ruutotada varicharaju simuni
 Pávuru. ³⁴⁻³⁵ Sunumyuyadanumatiy ramu
 catera nuchara, sitajadoda jita variñi Pávuru:
 “¿Tesira ji?” Sadatyadanumatiy japubay,
 nutyu nini sanicha Sidísiya mucadimu vichi
 day, suteda variy siva Pávuru: “Riryānumatiy
 jti Judíyuedantiy, ratuvachu ranacho riryatiy
 tuchunuvi vijyomujache jiñijyu, ratuvachuta
 varintyi ji.” Jadchiy jita supajada japubaryi
 sutarumiy, riryatidye jnutya jamu rorivyimuni,
 jiryatiy saroriyada nutyityu Jeródesberya.

24

*Pávurubay tuchoda jiyada rayadaju
 Védisibetyuunu*

¹ Tadjayo rundamusiy jita sitijada
 caserdótevyeda nutyityu, ravichada sitya
 Ananíyasiy. Sisani ruutijada rimyityumiy variy,
 riyadaju niquenu jarye jtijada varintyi, ravichada
 sitya Térutudu. Japumu rudeda variy, riryatidye
 tuchuta variñi Pávuru. ²⁻³ Riñatuyada jitaní Pávuru
 variy, sajotada tuchutada Térutudu variñi. Suteda
 jita variy siva japu: “Ramuni nuñichanatyā
 jita diye ji, jiryatiy samiryā vicharā daryaju ji
 Védisiy. Ramutiy nūvyichasara samiryā variy,

jiryatiy ji jdutyatityirya vutyevay vichada, jiryatiy yinutya daryajura. Ramuni numecho jaryi jchanavye variy ramusiy, titaju vichadiva. ⁴ Rañuma jarupanta junay ji, ramutiy rayasanta riva ji, samirya yecha risa, yatidye tuvachu varirya rañiquejadaderi ratiy ranique. ⁵ Nudyi siva jiñu Pávuru jaryi vuryarupantara, niní jatachunumaya titaju riy Judiyuveda, titaju mucadiva. Niniday Nasaryé jamimu tuvachuvay jiyanti. ⁶ Niní rañi javatyataniryurya Judenu nijyu jachipiyajo, ramutiy nuñi juriy rivani, ramutiy nuñi tanuvunuruy riva jiñiquejadatani. ⁷ Sunichiy sutarumiy nutyityu Dísiyasiy jtyati variy, sasovisiy jita vanuyadamusiy nudyisasiy variñi Pávuru. Sutachiy jita sutarumiy nutyityu riñijyu tuchutavay: Jiryadityanu japumuyu, jasityidye jiryatuchutani Pávuru. ⁸ Jiñi jita raryi jtajanu riva jirya dañi, yatidye datyara sitenu daryaniviy nuñique vijyomujache sanijyura.”

⁹ Rijechipiyajada Judiyuveda variy sisa Térutudu: “Jo, darya niday nuntyi, darya niday nuntyi, darya niday nuntyi.”

¹⁰ Sumutyajada jita Pávuru variy sándujajadanutimiy japubay variy sanacho: “Yanuma nique vijyomujache jita.” Suteda jita Pávuru variy siva: “Tapi jiitya sitenu vichanutyi cadnadu rijyu nijyanvay, rajuura vaata saraju, ramunitiy ranique samiryamu vijyomujache diye radye. ¹¹ Yama jtajanu ti day, nutyu vuyajuy rundamusiy darundajuy ranchaju, rañi jtisiy Jerusarimu, rajechipiyasiy variy sanijyu Judenu jasiy. ¹² Ne ti diy riva rañiquettatiy ti;

dantyamuy ne ratachu ti ridiyi, dantyamuy ne juteryaniyyo vimu, dantyamuy ne vichadamu.

¹³ Dantyamuy ne vanay ridyitanura sitenu tuchutada ranijyu. ¹⁴ Rani jita ritay diye yiva, darya niday rajechipiya sanijyu tariy numyunatyi Judenu, daryani rajechipiya sanijyu, nutyu vadi jachipiyajada rajechipiyantiy. Rutay jita Judiyuveda ranchiy: Va vase riñi siityarira vadi jachipiyajada daque, mityani riñi carevay varidyerya. Rañi tuvachu ramu jiryatiy titaju nuchara darya, titaju vuñiquejada day, titaju jiryatiy riñiquejada Judenuju tuchuvabedyerya.

¹⁵ Daryaday rañi tuvachu ramuntidye, nutyu jivye Judiyuveda tuvachu daryantidye: Judenu ramisaney diibyimusiryi jiryatiy samiy nijyanvaryi, niquevye jarye. ¹⁶ Jiryatiy ratyuvachu sitenu daryaju misadedamu day, ramutiy ravyicharuy samirya vichara. Ne ravyicharuy tara, tarivatya rajadani Judenu variy, tarivatya rajada riy nijyanvay varintyi, ravyichatya tara ridiyi. ¹⁷ Diye pariche,

rajuura vaatamusiy ritusiy rijyu ratyevarya criquiy, ratatiy rimutyariy jantyuyadavay, jadchintyi ritusiy richanayadamu saju Judenura tara, mitya rache richanayadamuni.

¹⁸ Rititasiñumatirya jiryatiy ritu Judenujura, Judenu nijyu jachipiyajomu, richeryeñuvi Judiyuveda tevay varirye, jiryatiy Ásiya mucadi janvaryi. Ritotanimya rapyuchadamusidyerya rajyuuchurveda day. Ne ti jnay vichasiy nijyami rajuu jasiy, dantyamuy ne ti nique variy jasiy.

¹⁹ Jiryatiy ridyi Judiyuveda riva, tama rivyicha

jiyu, riryimyatiy tuchu jidiya daryatiy riñique rañijyu dacyu. ²⁰ Tama tavay jnay jiyu, yajtay ruuva rityevay, riryatidye tuchu vijyomujachera nutyura ravyicha ridiyya, jiryatiy rañi tuchusiy jasiy vijyomujache rimyityumivyara. ²¹ Temusiy taji niquejadamu dyetya rutay rañique jaryi riquebyimu day. Rañiquesiy variy: Tama taji rañicha diye jiyu, jiryatiy jtay riva, samiryavidye ranicha ratiy tuvachu ramu diibyimusiy misasubeda.”

²² Sani datyanuyada japu Védisiberya vadi jachipiyajada, samachotadedada variy tarundamujura. Suteda jita variy ruuva: “Sanumatiy jti Dísiyasiy, jiryatiy sutarumiy nutyityuni, variñi ratuchu jiryivara ravidye tanuvunutaniñi.” ²³ Sabayada jitani sutarumiy nutyityu sunutyiju: “Yajnutyani Pávuru. Ne puchusi yabañi. Ne yajbay riryajisiy sajutyabimiyu, riryatidye jañuya simu, riryatidye jtu tarade saju.”

²⁴ Jadchiy jita tarundamimiyusiy sudeda japu Védisiy savaturutya, ravichada nanitya Dusídyá, nada vichada Judíyutoda. Sutañuejada jita japu variy: “Jiryatanuñi Pávuru, satidye tuvachutaniy Crístumu tuvachoda vuy.” ²⁵ Variy jita sadatyadoda Pávurura vase vichada, vase jachipiyajada jarye sadatyadoda variy: “Tarundamu day sachaniy Judenu tara nta riy taji vichavay; jiryatiy samirya vicharani, nini jitamuy sachaniy tara nta day.” Ramusiñitiy sunteda japu jaryi variy, suteda jita variy siva: “Yanuma jiya diyedemusiy. Ranumatiy vata varintyi ji, varityi ranatutyantinintyi ji.”

26 Mitya sajachipiyajada variy: “Sandyetyate say criquirye, ratiy jmurysiy variñi.” Ramutiy sanatutyadeda japichiñi, satidye tuchu variy sisa. 27 Darajuy vaata saraju savichada variy jasiy. Jadchiy jita sajayada japuju, Pórsiyu Véstu, Védisiy jubivaju. Sani raryuyada Védisiy riyada Judíyueda, ramutiy satanuvunucheda varidyeñi Pávuru day.

25

Pávurubay tuchoda Véstubay tuunu

1 Mumurundamiñumatiy savichada Véstu jivyichajomu, sasubeda jita variy Sesaréyamusiy Jerusarímuju. 2 Jasiñi jita ruutijada caserdótevyeda nutyityumiy simu, Judíyueda jarye, jiryatiy jaryi datyavadyeryi, riryatidye tuchuta variy jasiñi Pávuru. 3 Riyasantada jita variñi japu: “Yajpani Pávuru Jerusarímuju.” Riñi jachipiyajada juveda sanijyu. “Vuryajvay saniyaresiy nütasayu.” 4 Sumutyajada jita japubay variy: “Ne, nutyu tanuvunusinama sanicha Sesaréyamu, radye rajiya radyirya sanachó day. 5 Risanuma jiryajmusa day, jiryatiy jaryi datyavay jiryequemyimisyri. Jasiñi jiryatuchunuve vijyomujache sanchiy Pávuru, sitenuviy savichaniy tara nta jiryey.”

6 Jadchiy jita, savichanuyadanumatiy japu tarundamu ruusa, sumusada jita Sesaréyamuju variy. Ratarimysiy jita samasanuvejada japu cadnadu masajoncha, supajada variy jadchiy sanachó Pávuru. 7 Jasiñumatiy savichada Pávuru, rityuudiyada Judíyueda variñi, jiryatiy

rumusada Jerusarímusiy. Jasiy rityuchoda variy vacha sanchiy, ne vase rityuchoda sanchiy variñundy. ⁸ Saniquejada jita Pávuru variy jiyadaju day: “Tama rañichadede tarara riñiquejada Judíyurveda, dantyamuy ne Judenu nijyu jachipiyajo ravyichadede tara, dantyamuy ne Róma janvay jamu nutyityu ravyichadede nta tara.” ⁹ Sani raryuyada Véstu riyada Judíyurveda, sitajadoda variñi Pávuru: “¿Va ji, yasumiryuvidye, Jerusarímujū? jasityi yaniquenuve vijyomujache ratyūunura, rajtay variy yiva, chira raramirya jiñiquejada, chi.” ¹⁰ Sumutyajada jita Pávuru variñi: “Tama taji rañicha jiyu satuunu cadnadunūday, tama, jiryatīy sabay jamu nutyityu jiyu day ji; jiyunuma riryajtay riva darya, ratiy rutaryuy riva day. Tama jiñi datyisa samiñūday, tama. Tama rañichadede tara riy Judíyurveda, tama. ¹¹ Juvī dyetya ridyi riva, ramutiy riryatanuvunu diiyada saraju ray, ne rañi suvurya ruveda. Va sitenu ranicha rityuchutada cay, nutyichitya ti rasay mitya ray, riryatanuvunujay mitya ray. Ratyuchuruy vijyomujache, Róma janvay jamu nutyityu tuunu.” ¹² Satuchumuyadanumatīy japu Véstu datyavayjsa, sumutyajada jita variñi Pávuru: “Jiyarūtyi jamu nutyityumu, simu nīday yajiya.”

Pávurubay rajti nutyityu Acrípabay tuunu

¹³ Jadchiy jita, rajuu rundamimyusiy sitijada nutyityu Acrípa Bereníseyutya, Sesaréyamujū, nanatidye muchuvañuve variñi Véstu jasiy. ¹⁴ Jasiy nanuvichada rajuu rundamicharaju. Satuchoda jita Véstu jasiy nadiva sanchiy Pávuru:

“Jiyuni tiqui vanu jiryatiy Védisiy tochichiy tanuvunusini. ¹⁵ Rayasiñumatiy Jerusarímu, rityuchusiy caserdótevyeda nutyityumiy variy riva, Judíyurveda rimyityumiy jarye tuchusiy sanchiy Pávuru. Riyasantasiy variy Pávuruva ray: Yatanuvunu diiyada sarajuni. ¹⁶ Rimutyajasiy variryi: Ne rajutyada riy Róma janvay darya day, riryasaje mityani, netimyu ne riryatuchosiy satuchutavay vijyomujache jiñijyu didye, niday ranique jiyadaju day jiryatiy rityuchutani. ¹⁷ Ramunítii, riintyeryanichiñumatiy Judíyurveda jiyuyu, ratarimyusiy ramyasasiy jasiy cadnadu masajoncha, rañatuchiy variñi jiñu vanu. ¹⁸ Rityuchusiy vijyomujache Judíyurvedara, tamajuveda ranicha day, daryani rijechipiyatanichirye. ¹⁹ Raniday jirya rityuchu sadiyada jache, jiryatiy sadatya Judenu jtedamura. Riñi jtay sadiimya Jesús, Pávuru jita jtay variy: Jnuñu dañi. ²⁰ Dantyamuy ne radyetya darya, nutyura vuryidutyara vacha niquejada, ramutiy ritajanuni Pávuru: ¿Yasumiryuvidye Jerusarímuju? jasityi yaniquenuve vijyomujache, jasityi riryajtay variy yiva chira raramirya jiñiquejada. ²¹ Sayasanta jita Pávuru varirye: Yabay tarunda saraju ray, ratidye tuchu jita vijyomujache variy satuunu Róma janvay jamu nutyityu. Rabemya variy ruumura sunutyasada, ripajada saraju, varityi rajpa simu jamu nutyityuni.” ²² Suteda jita Acrípa variy siva Véstu: “¡Nutyichitya ratyuvachutadate dañicu!” Suteda jita Véstu siva: “Tarimyusiñuma, yatuvachutini.”

Berenísejyutya. Naditijada jita samiy jdutyasanuy, vatajuu ruutijada sutarumiy nutyityuvedata, vichada nutyityuta jarye. Darya niday rijeyada titaju ravimu tuchujo. Vestu jtedamu riryityajadani Pávuru variy. ²⁴ Suteda jita japu variy: “Diye jita, Jamu Nutyityu Acrípa, jiryejerye nutyityuveda, jiryajti titajumusiy rimu; jiyuni jita jiryadiy siva jinu vanu, sivani riyasanta Judíyurveda ray, jiryatij Jerusarimu vichavaryi, jiyu vichavay jarye. Riyarovatyaja diye sarajuni: Ne saryi jny junañuday. ²⁵ Tamā rañi jny suvay ti, tarivara riryatanuvunu mitya diiyada sarajuni. Tapi ramu savata jidyirya darya jamu nutyityumu jiyada day, ramunitiy rañi jachipiya jpajadajuni. ²⁶ Netara jnay vase niquejada rimu day, ramutimy ne ranuy nutyityujura. Ramunitiy ritita jiryetyuvachutadajuni, yatidye tuvachu jirya, Jamu Nutyityu Acrípa. Temusiy jiryitajadodamusiy saryityuchu tara, ratidye ny variy jamu nutyityujura. ²⁷ Tamā samirya ranicha rajyu, tanuvunusi jpajada simu jamu nutyityu, tamā tara jnay rañicha catera nuchara jpasara sisa, jasityi ratuchu catera nuchara, nutyuramu rityanuvunuti jasiñi.”

26

Pávurubay tuchoda vijyomujache nutyityu Acrípay tuunu

¹⁻³ Suteda jita nutyityu Acrípa siva Pávuru: “Rañi samya vijyomujache tuchodaju ji.” Sumuyajada jita Pávuru variy sanacho, satuchoda jita variy vijyomujache: “Rañi jchanatyara, ratidye nique

vijyomujache diye jityuunu, ratidye tuchu varyiy yivara Judíyurveda tuchutada, tapi jiitya datyara rivyichada dacyu, jidyetyisatyantirya taranchiy riñiquettayu. Ramutiy rayasanta riva ji, yatidye tuvachu samiryamu rañecho.

Nutyu savichada Pávurubay jityituyadajisiy

⁴ Ridyetyisatya Judíyuedanuday, nutyura ravyichanuyada vaderonu vichadamuju ruusa ratyevay, Jerusarímu. ⁵ Rityi tuchuruy vijyomujachera, varityi riryityuchu dyetyara daryatiy ridyetyanuyada tariy raynchiy, nutyu rañi rañicha Varyisévu. Tapi Varyisévu vitya ray, ramutiy ratyuvachu ramu jaryinra niquejada, Vuryindenu datyadoda. ⁶ Diye tuchutasi jiyu ray, jiryatiy rityuchuta daryaju ray, jiryatiy ratyuvachu daryaju ramu Judenu niquejada, jiryatiy saniquenuyada tariy vumyunatyira. ⁷ Richiityari ratyevañi Judenu, jiryatiy rivyichada ratyevajyuu, vuyajuy danujuy rinchaju. Rumutyasara jnaryani Judenu, nupora jarye, jiryatiy rityuvachoda daryajura, daryatiy saniquenuyada tariy vumyunatyira. Daryaday rañi tuvachu ramu darya niquejadantiy, rivanitiy rityuchuta Judíyurveda ray, Jamu Nutyityu. ⁸ ¿Nutyuramumuy ne jiryetyuvachuruy ramu samisadeda Judenu diibyimusiy, nutyuramu?

Nutyu Pávurubay jarupantanuyada taririyi Jesúsnu tuvachuvabe

⁹ Rani sitenu, daryani rajechipianuyada tariy sanijyu Jesús, radye raryichadeda rajuura sayaroju, jiryatiy Nasaryému vichini. ¹⁰ Daryani ravyichaniñuyadantiriyi Jesúsnu tuvachuvantiyi

Jerusarímu, jiryatíy rítienúyada nupocu rorivyímu ríy, caserdótevyeda nutyityúmiy jtedamu. Ruvañuyadantiñi Jesúsmu tuvachu varintyí, rajerye vatanuyada varintyirya: Dañuma sadiiy jasiy. ¹¹ Ray tanuvununumaya japichiy juteryanijyo vimusiryi, rañi niqetaniryuyada variy sayaroju Jesús riy. Rañiqueyadamu rachiityanumayanuyada riy, raruva janvay vichada saraju.

Pávurubay jatyyada tuchodara jityituyadantiy Jesús siityarinuju

¹² Ramunítíy rayanuyada caserdótevyeda nutyityúmiy jtedamu, Damáscumuju, rítoda varírya catera nuchara, ratatidye rajuriryi Jesúsmu tuvachuvay. ¹³ Vase jiñita radyiryijada riva nono, Jamu Nutyityu, jarichuniy, jaryi vanda ramusiy jiñidara. Raniday danutyadeda titaju variy riro, risa vichavay juro jarye. ¹⁴ Nuñipatyeyajada variy ramusiy, variy ratyuvachodara ti niquejada rañiquejadamu, jiryatíy Ebrévu ravichanuyada ritya rañiquejada. Ratyuvachoda jitara saniquejada: Sávu, Sávu, ¿tarivara yarupanta ray, tariva? Jiidye jivyatajonutanidye ji, nutyu voca vatajonutaniy daryantiyu, sansiñumatiy yibivaju ridcha jivuse monusara, jiryatíy sichityi sajami yipajadamu satudityasa. ¹⁵ Ritada jita variy: ¿Chira jiñicha, Nutyityu, chi? Suteda jita variy riva: Rañi rañicha Jesús, nutyu rañi jiñi jarupantanuy. ¹⁶ Yanubesumiy, yarupichiy jita. Ramunítíy radityanutaniy jiryey, yatidye jvaañumaya rajyu. Yejiriryi tuchoda vijyomujachera jiryatíy

jidy diyede riva, yaday jatyi diyada rivantiy ranumatiy muti yimuntiy. ¹⁷⁻¹⁸ Ray rajantyuy rajisiy yiva, jiryatiy ruvaryuy daryaju jityevay Judiyuveda ji. Rajantyuy jivejyuujisiy yivantiy, jiryatimyu ne Judiyuveda daryi, tapi diye rajpa ruumu ji, yatidye muttanuvera riñisiy, riryatidye janumitye rajisiy nupocudi, vandanachoju; riryatidye janumitye rajisiy Satanasiy vuudoda, Judenumuju. Variñi saryi machotaniy Judenu mityara rijyuuchuveda, sasay riyarurya yisa vichadaju, jiryatiy sajaryetavadyeryi jiryatiy rityuvachu simu day.

Pávrubay tuvachoda ramu jarichumusiy datyadoda

¹⁹ Jadchiy jita, Jamu Nutyityu Acrípa, rachiityarijada varirya sadatyadoda, jarichumusiryá. ²⁰ Munatya rayada Damáscumuju, jadchiy jita rayada Jerusarímujuntiy, titaju Judéya mucadivaju. Jadchintyi rayada ruumuju jiryatimyu ne Judiyuveda daryi. Titaju rijyu rañique vijyomujache: Jiryaparuy riva taji jachipiyajada, jiryajachipiya jita variy saniyyu Judenu, daryaday jiryechaniy varintyirya. ²¹ Rañiquejadamu vijyomujachera jirya, variñi rureda Judiyuveda ravimu Judenu nijyu jachipiyajo ray, riñi jvaryuyadanuma variy jasirye. ²² Judenu jmutyadamuju, rañi datyadoda diye saraju titaju riy jantyuyadavay, taratavay jarye. Daryaday rañi tuchuntiy, nutyu rityuchunuyada Judenuju tuchuvabentyirya, Muyusésibe jarye. ²³ Riñi tuchunuyada tariy: Niñi jita Mesíya jiryatiy vuryitay Judenu

jaryetini, saporutyasara vacha vichadedivayu, sadiiyadivasiy yecha jiyanti diibyimusiyy misi, rata sadityanura vanda variy rijyu Judiyurveda, tavantyi jiryatimyu ne Judiyurveda daryi.”

Pávurubay siityaritaniryuyadani Acrípabay Judenujsaju

²⁴ Saniquejadanumatyy Pávurura vijyomujache niquejada, saniquejada jita japu Véstu variy jaryimyu: “¿Yatavyi, Pávuru? Rátatyaninuma jidyetyada ji.” ²⁵ Sumutyajada jita Pávuru variñi: “Tama rañi jatay, tama, Jaamyi Véstu. Rañique sitenumujura rañiquejada. ²⁶ Ninì jita nutyityu Acrípa datya darya, ramutyi ratyuchu ranisadamu vijyomujache sadiyara. Ranì ritay sadatyanuyada nutyityu sitenu daryaday, ¿va tajiñechoju jvaachara raryichava daque?” ²⁷ Suteda jita variy siva Acrípa: “¿Jityuvachuidye ruumu Judenuju tuchuvabedye? ¡Ray datya jityuvachu ruumu!” ²⁸ Suteda jita nutyityu Acrípa siva Pávuru: “¿Taraqui niquejadademusiyy jichiityaritaniryuy Crístu ray?” ²⁹ Suteda Pávuru variy: “Judenu datya nutyura raryi vata jiiyyu, yatidye tuvachu simu, nutyu ratyi tuvachusara simuntidye. Nutyichitya jityuvachoda taraqui niquejadamusicyu, daryantya rajuura niquejadamusiy, varityi jiryivyichasiyy nutyu ray, ne jita cadyidyajuuta puchusi. Ne vinu ji, titaju nijyanvay jarye jiryatyy rityuvachu diye rañecho, ¡nutyichitya jiryetyuvachodate simu Judenu varintyidyecyu!”

³⁰ Jadchyy jita sanubeseda Acrípa, Véstu jarye, Bereníseyy jarye, titaju sisa vichavay

jiryatiy rimyasada satuunu. ³¹ Riyadanumatiy tuchujomusiy tajidyejyu, riñiquejada nuñi riy variy jasiy: “Tama sanicha jiñu vanu tara, nutyuramura riñi jtay yatanuvunu diiyada sarajuni, nutyuramu; dantyamuy ne nupocu rorivyimu sacha puchusi cadyidyajuuta.” ³² Suteda jita Acrípa variy siva Véstu: “Vuryimya jmuryani jiñu vanu, netimyu ne saryi jiyasanta tuchoda vijyomujache satuunu jamu nutyityu daryaju.”

27

Supajadani Pávurubay Rómamuju

¹ Ridetyadama varidye nuñanuma jiya Itádiya mucadimujucu, richeyada jita variñi Pávuru tanuvunusi, jadchintyi ratarya tanuvunusavantyi sutarumiy nutyityu jpajadamu, runutyisavajyu. Ravichada sitya Júdyu, jamu nutyityu sutarumiy tenu daryajuni. ² Nuñimusada ravimu, Aduramyityu jami cartyequii jiryatiy riichomusiy rupiryara. Tapi rasipyataryuyadanuma Ásiya mucadi jido vichadamuju varidye. Jasiñitiy nudyea, sayada variy nudyisa Aristyárucuntiy, Tesadónica jami, Masedóniya mucadimusi. ³ Ratarya rundamu nudytanuvejada Sitúmu. Jasiñi jita sadiyada Júdyu samirya siva Pávuru. Sapyayada jiyada variy jiyutyabivedamuju, satidye jmutya variy ruumusirya jivyatara. ⁴ Nuchipyatedanumatiy jadchiy, nudyeyada variy Chípyirye ratyuu nutyityudamyuju, riichojisiy. ⁵ Nuryamityedanumatirya Sidísiya jamu nava, Pajídiya jamu nava jarye, nudyitojada jita

vari^y Myíramu, jiryati^y Dásiya mucadimura. ⁶ Jasiñi sadiyada sutarumi^y nutyityu riva cartyequiintiy, ravichada Adejántriya jamí cartye, rayaruñuma vari^y Itádiya mucadimuju. Jasiy sumusadeda ravimu nuy. ⁷ Jadchiy nudyeyada rajuu runda saraju, tapidera nudyeyada. Nupyarutyadamunuma ritojada Cunídusara. Jadchiy jita riicho daryaju vichada ridchoju, ramuti^y nuryamityeryijada Sarumú vataqui jchaju, Créta ratyuu jidoju. ⁸ Jiryati^y nudyeyada vari^y rajidodera, nupyarutyadanube yitojada ramu, jiryati^y ruteda Samirya Musajora. Ne ripya ravichada Dásiya vari^y jadchiñuday.

⁹⁻¹⁰ Jiryati^y nuryicheyada jaryi jiryupijyomu, samirya nuryi machojada jamu nijyajisiy jasiy. Jamu nijyamu racha jaryi riicho, riyerya jarye, ne vanay rupichara rachanuday. Suteda jita Pávuru vari^y: “Radyetya diye, rupiyadamu racha jaryi suvuchara. Temusiy rajarapuchara jvaadyi. Ne vinu ra rajarapuy, cartye jarye, nijyamí jarye racaray.” ¹¹ Ne satuvachuruyada sutarumi^y nutyityu jaryi simu Pávuru, satuvachoda jita vari^y simu cartyejisiy jnuñu, cartye jamimu jarye. ¹² Jiryati^y ruteda Samirya Musajora, ne samirya ravichada jamu nijya ramityadeda jasiy, ramuti^y rijejutada rupivye tevay vari^y jadchiy, rijejutada Venísimyuju vari^y, jasityi riryaramityanirya nijya day. Venísiy ravichada Créta ratyuu musajo, jasityi ritinuyada nijya riicho rayadasiy, jasidye riti ratarya riichontiy, rajimuchoju.

Jamu riicho juredara cartye jamu navamu

¹³ Rajotada jita riichodera tapi varyiy, ravitasasiy, rijechipiyajada jtojada rata ramu Venísiy, riyada varyiy rajidodera raratyuu. ¹⁴ Taraquideju ritada jamu riicho ridchoju, raratyuu nachosiy. Ravichada ritya riicho, Evuráquido. ¹⁵ Ránitiy riicho juredara cartye, ramutimyu ne rarupiryuyada variñuday. Paricheñuma nuñanumityeda yibivaju, rapuryijada riicho varirya cartye tajiñechoju. ¹⁶ Nuvyichadanumatiy rayadasiy raratyuudera, ravichada ritya Cávuda, varicharaju nutyiiyadara cartyesiiy ravimuju cartyequii, parucharimysiy nutyiiyadara. ¹⁷ Riryeyada jita cavujuuta varirya cartyequii, rañuma jotay ravisiiyre. Tapitya richuvuñuyada daryaju, rañuma jatya riicho varunubejura cartyequii, ravichanuyada varu daryaju jasiy, rumusadeda varirya rarupitya sujaquii, rañuma rupityaniy riicho junay variryi, mityanuma rasiityadeda riicho varidyerya cartyequii day. ¹⁸ Rariryijada jureda riichora cartyequii, ratarya rundamu rijyotada jatyatiyada cartyequii vimusirya jvaadyi. ¹⁹ Rurundamu rijetyatiyada marinérumiy jiyomututara ravimu vichara; rijetyatiyada jaamura. ²⁰ Rajuu runda saraju ne sadyadoda jiñiyu, jdarichiy jarye ne dityadodayu, rariryijada varyiy riicho dayu. Rijechipiyajada varyiy: “Ne vuryajnuñuday.”

²¹ Rajuu runda saraju ne riibyeda varyiy. Sanubeseda jita Pávuru varyiy riquebyimusiyy, suteda varyiy ruuva: “Rajyutyabimiy, jiryetyi tuvachuti rañiquejadamu, ne vuchipyateda

vari^y Cré^ta ra^tyu^umusi^y. Ne vu^ryicha di^eye tara n^ta, ra^muti^y vu^cya^rem^urya vu^berya.
²² Ray ra^datyaⁿu di^eye ji^rye. Ji^rya^van^utya^yu, tiⁿuma ra^ryi ca^ray vu^ryisa^si^y. Viⁿu ca^rtye^quii ra^car^ay. ²³ Nu^pora sa^radesi^y Ju^denu j^panu ra^tyu^unu. Su^pa Riⁿdenuⁿi ji^ryati^y riva^aacha^ra si^sa. ²⁴ Su^tesi^y ja^si^y riva: ¡Ne ya^suv^uy, Pa^vuru! Ya^day j^to si^mu ja^mu nu^tyityu. Ya^jn^uy yi^teda^mu^ju ji, ne sa^care^tani^y Ju^denu ri^y yi^sa vi^chava^y.
²⁵ Ra^muti^y ji^rya^van^utya^yu, ra^dyetya da^rya^ju, da^ryada^y ra^chanti^y, ji^ryati^y su^tesi^y Ju^denu da^rya riva. ²⁶ Te^musi^y vu^rya^u dyetya tu^tañu^ve tara ra^tyu^un^ucha.”

²⁷ Ru^utota^deda^ma da^raja^yu si^myaⁿu va^ri^y ja^si^y riⁱchoⁿi^y, mi^tyaⁿuma ra^jatyaⁿu^maya^jada riⁱcho va^ri^y ja^si^y ja^mu na^vava nu^y, ra^vicha^da ri^tya ja^mu na^va Á^tri^ya. Nu^pora^tasa n^tan^uma ri^dyetya^da ma^riⁿé^rumi^y: “¡Vu^tyu^udiⁿu^mara tara mu^cadi!” ²⁸ Ri^jetya^da ji^ta va^ri^rya ni^cha^ri^jya sa^ranu^ju^u, da^raja^yu vu^yaja^yu ju^ri^chara va^ri^rya. Ru^mu ri^jetya ra^yada^jun^ti^rya, vu^yaja^yu ju^ri^chara ta^daja^yo ju^ri^chara raⁿcha^ju. ²⁹ Ri^chu^vya^damu ji^jetya^dara da^rya^ju^yu ra^ttatya, ca^rtye^quii quⁱni^musi^y. “¡Vu^ryaⁿuma tu^tañu^ve ra^vichuⁿcha!” Ru^teda ji^ta va^ri^y ja^si^y: “¡Raⁿu^mati^y ja^sacha vaⁿi^racu!”

³⁰ Ri^beryu^yada^mu, yi^musa^deda ma^riⁿé^rumi^rya ca^rtyesiⁱy, ca^rtye^quii vi^musi^y, ri^qui^vya^damu jiⁿi j^teda ya^jatya^ra ra^ttatya ruⁿo^musiⁿtyi.
³¹ Su^teda ji^ta Pa^vuru va^ri^y si^va Ju^dyu, su^taru^mi^vya ja^rye: “Ne^timyu ne ri^rya^macho ma^riⁿé^rumi^y ra^vimu ca^rtye^quii, ne ji^rya^rami^tya va^ri^y.”

³² Riryechada jita sutarumiy varirya cavujuu, jiryatiy ripyuchoda ratara cartyesiiy riñuma bay marinérumiy ravimu variy, rapupacheda cartyesiiy variy.

³³ Rintuyada nijyanvay varirya rasachada, suteda jita Pávuru variy ruuva: “jiryentya jmyi tara! Darajuy simyanunuma jiryevyicha mitya, ne jiryimyi tara. ³⁴ Ramutiy rayasanta jirye, jiryatidye jmyi taradera, jiryatidye ramitya variy, ne ti racaray daryaju jiryetyenu, dantyamuy ne vinu jiryinojasitye racaray.”

³⁵ Saniquejadanumatiy Pávuru darya, sireda jita varirya pa, sichanatyada variñi Judenu, titaju ridiyi. Sapatada varirya pa, sajotada jibyeda varintyirya. ³⁶ Riimiyryuyada jita tavay variy ranchintyidye, riibyeda jita variy.

³⁷ Titajumusiy nvyichada rupivyejyuu cartyevimu darajuy pacha, darajuñiyate vuyajuy ranchaju, tiquinijyate ranchaju tamityantiy.

³⁸ Ritojadanumatiy jibyeda ruuva, rijetyada varirya jaruusichuy jaamu, rañuma jidye cartyequiivimu.

Rajayada cartyequi

³⁹ Rasachada jita, ne ridyetyaruyada tara mucadi ranicha jiryacu. Jasiy ravichada ticha vatajo, riñi tutaniryuyada jasiy cartye.

⁴⁰ Rijyucheda jitarata rattatya jasiy, rityocheda variy jaamura. Rivyitada jita varirya ratimyu riryatidye tata variy ratantiy. Riryesubeda jita varintyirya rarupitya sujaquiintiy, riryatidye jiya variy tichanchajuntiy. ⁴¹ Ruutojada ramu raruyuvayara, ruutojada variy ranchar tichantiy.

Rajañuvejada runo tichanube, raruvaayada raquini variy riyeryamusiy. ⁴² Sutarumiy rañi jvaryuyada variryi tanuvunusavay, tinuma raryi ramitya nudedamusiy. ⁴³ Sararyuyada jita Júdyu variy sayada Pávuru, ramunītiy subayada varirya ruvachada. Suteda jita Júdyu variy riñijyu: “Jiryajuy munatya jaamu, nītiy datyara nūdeda, jiryatidye jasumiy variy siinumuju. ⁴⁴ Rusijyunuma riryeyiya tavadye, dañuma jiiranča, tīni dyetya rajiya cartye teranča day.” Ramunītiy ruutojada titaju samirya siinumu.

28

Pávurubay vichada Máruta ratyuumu

¹ Nuryamityadanumatiy titaju, rityuchoda jita variy nudyiva: “Raniday raratyuu jtya, Máruta.” ² Ridiryvejada samirya jasiy vichavay nuy, richejada varirya jiiday, riñatuyada jita variy jiidatyuumuju nuy, tapi ruboda daryaju variy, ramunītiy nuchudoveda variy. ³ Saťojada jita Pávuru varirya jicadajuu, sajatyada variy jiidamyura. Jasiñi savichada codiy racamu, sasipyateda codiy variy vaniquimusiy, sasuyada variy sajomotunube Pávuru. ⁴ Runuyada jita jasiy vichavay, sasotayajada codiy ridiyiya sajomotunchiy, rijechipiyajada nuñi riy variy: “Jvi dyetya jiñu vanu, ramunītiy savichaniy codiy riva tarani. Sani ramityadamara diiyada jaamusintyi, ramunītiy ravichaniy tara rivani, nutyichiy sacharuy variy samirya ramusiy.” ⁵ Samuchutyada variy jiidamyujuni codiy, ne ranuvaday codiy sujyo tarade saju, mitya.

6 Mitya runuyada varyiy jasiy sanacho, ne raporyuyada saju, ruteda varyiy: “Mityamusiy sadiiy.” Taripyu riñi nutuyada variñi, runuyada: “Tama ranuvadaryuy saju, tama,” tajiñuma rijechipiyajada varintyi: “Judenu dyetyate!”

7 Jasiñi jita ravichada japu mucadi, ravichada sitya mucadi jami Púbiryu. Nini diryeyada samirya jasiy nuy, sumutyajada jiryorimyu mumurundamicharaju jasiy nuy. 8 Varyiy savichada sajay juvajni majevyimu, saduyani risajuni. Sunuyada jita Pávuru variñi, satuchoda varyiy sisa Judenu satuunu, sabayada jita jiyomutu varyiy rivasiy sancha, samisadedada variñi. 9 Jadchiy jita raratyuu janvay jniñuyada simu Pávuru, jiryatiy jdivajnuvadyeryi, samisaniñuyada varyiy jasiryi. 10 Varyiy richeyada tara mitya nuy, ritojadanumatiy nudyeyada runda jadchintyi, rumusadedada titaju tara nuñimiyisaraju, ratiy nuvyatada.

Pávurubay jtojada Rómamu

11 Munvay jarimyunimusiyy nudyeyada jadchintyi, tajnu cartyequii vimunuma day. Rani vichada cartyequii, jiryatiy raramityadedara nijya raratyuumu, jiryatiy ravichada cartye Adejántriyamu vichara. Savichada parunašiy taryi jantyaši runomu varyiy, ravichada nanitya Castúru, Pódusiyy sataryi jtya. 12 Nudyitarijada Siracúsamu, nuryicheryijada mumurundamiyy jasiy. 13 Jadchiy jita, nudyeyada varyiy rajido jamu nava, jadchiy jita nudyitojada Réjyumuntiy. Ratarya rundamu rajotada riicho ruschiy, nudyitojada darundajumyusiyy

Puteyúdimu. ¹⁴ Jasiñi nudyiñuvejada ruuva Crístumu tuvachuvay, riyasantada variy nuy: “Jiyu jiryamacho nudyisa, darundajuñiyate saraju.” Variñiday nudyitoruyada pariche Rómamu. ¹⁵ Ridyetyadanumatiy Róma janvay: “Jativyenuma riy Pávuruveda,” rudedada jita Crístumu tuvachuvay riidchoju variy, jasiy richeryeñuvejada Ápyumu riy, Mumuri Cantíñumu jarye. Sadiyadanumatiy Pávuru ruuva, sichanatyada variñi Judenu, savanutyada varintiyu. ¹⁶ Nudyitojadanumatiy Rómamu, sutarumiy nutyityu sañuvejada riy jurichavay nutyityumu, sumuryada variy jadchiñi Pávuru: “Yecha jita sitenu jiryorimyu.” Jasiy savichada tiqui sutaru variy sisa, sunutyisiju.

Pávurubay datyadoda Rómamu

¹⁷ Jadchiy jita, mumurundamimiyusiy, sanatutyadeda Pávuru jutyeryadedamuju riy Judíyueda nutyityumintyi. Suteda jita variy jutyeryadedamu ruuva: “Ray, ratyeryiveda, tama rañichadeda tara riy ratyevay, tama, dantyamuy ne tariy munatyavay, rivyichechavañumadayu. ¹⁸ Tama tariva riñi tanuvunu Jerusarímu ray, jadchiy jita richeyada Róma janvay japumu ray. Rityuvachodanumatirya rañiquejada vijyomujache, riñi jmuryaruyada varirye, nutyuramura riryatanuvunu diiyada saraju ray. ¹⁹ Judíyueda jita ne jmuryaruyada ray, ramunítiiy rajechiñuyada ratuchu vijyomujache satuunu jamu nutyityu. Tama rañi jachipiya tuchutada riy ratyevay, tama. ¿Tariva ratuchuta riy, tariva? ²⁰ Ramunítiiy rañatutyaniye jirye, ratidye diy

jiryiva, vuryatidye nique vuryiva. Ramun̄itiy ratyuchu jiryiva, tajitya jiryinuy tanuvunusi jiyu ray, jiryatiy ratyuvachu simu, jiryatiy rintuy Irayenuvedara sitijada, nitidye raray vuryeyada.”

²¹ Ruteda jita Judiyuveda nutyityumiy varyi Pávuruva: “Tama nuñimutyatirya cetera nuchara yinchiy, dantyamuy ne nutyenu jtiti, chita ratuchu tara nta yinchiy. ²² Nutyuvachururya ratiy jijechipiya, jiryatiy nudyetya daryaju titaju tajicharaju riñique nijyanvay raniyare vadi jachipiyajada. ²³ Tarundamu dyetya nuñajniy.”

Variryundamu jita ruteda rajuu nijyanvay sarorimyu Pávuru. Jasiñi sadatyadoda Pávuru Judenu nusuyada riy. Jasiy sadatyadoda varintyiryi jiryatiy saniquenuyada Muyusésibe sanchiy Jesúsra, Judenuju tuchuvabe jarye niqenuyada sanchintyi. Sadatyadoda tarundaqui saraju, tarimyusidyera jidye saraju. ²⁴ Tini tuvachunuyada ramu satuchoda day, titamuy ne tuvachuruñuyada ramu day. ²⁵⁻²⁷ Jiryatimyu ne vanay nta rijechipiyajada vatajuu ranijyu, riyada jita varidye. Riyadanumatiy ritye, suteda jita Pávuru varyi ruuvara jiry niquejada: “Sani jteda day sitenu Judenu Jnutura jiryatiy saniquejada tariy vumyunatyivara. Suteda Judenuju tuchubay jtosi, ravichada sitya Isayiasiy:

Yejiya, yajtay ruuva jivye nijyanvay: Sitenuniviy jiryatuvachu jiry, ne jiryadatya; jiryajnuv ranacho, ne jiryadiy riva. Ne radatya rijechiy, ne riryadatya varyi ramusiy. Rimyutanu dyetyara jiñisiy riñuma jnuv, jaryi surra riberya jityuyu,

riñuma tuvachu, rijechiy jarye jibe surra, riñuma datyara. Riryityi datyara, varityi riryijetyara taji jachipiyajada, variñiday raryi jatya ruuvasirya jjiyuuchueda.

Daryani suteda Judenu Jnutu. ²⁸ Jiryantya datyara, ne jiryinuy supa Judenu diyemusirya jiryia jantyutyada tuchoda ruumu jiryatimyu ne Judíyueda daryi. Riñiday ratuvachu ramu.”

²⁹ Jadchiy jita jiryatiy suteda Pávuru darya, richipyateda Judíyueda, riñiquettacheda jaryi varyiu.

³⁰ Samachojada jita Pávuru varyi jasiy, darajuy vaata saraju jiryorimyu, jiryatiy sajachiñuyada yajijura, samurichenunuyada criquitya ramurichirya. Jasiñiday sumutyanyadani nijyami jiryorimyu, nityi jtinuyada jasiy simu. ³¹ Titaju sadatyanunuyada varyi jasiy, satuchunuyada varyi ruuvara Judenu nusuyada, sadatyanunuyada jichuvuyasadamu sanchiy Nutyityu Jesucristu. Ne ti jubañuyadara saniquejada Pávuru varyi.

Judenu jto nijyanvamyu
New Testament in Yagua (PE:yad:Yagua)

copyright © 2008 Wycliffe Bible Translators, Inc.

Language: Yagua

Translation by: Wycliffe Bible Translators, Inc.

Yagua [yad], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yagua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

741209ce-3bea-5617-a721-dc112d0873cd